

DIKÀNDÀ DIPWÀNGÀNE

KU BUTEKÈTÈ BUPWÀNGÀNE



Mwoyi wenu awu mu dinda emu, nwênù balunda. Mbilenga be bwa kwikala bapatuke cyakabidi mu dinda dya mvula edi, ne nêjè, bisambakane. Ndi mumanye ne bààbûngì beenu mbendeshe mashinyi ne lutatu, bafumina ntanta mule. Ne tudi ne ndambu wa...balunda baa mushinga mukole aba bàdì bàfûminà ku Chicago ne ku Alabama ne ku Géorgie ne ku Tennessee ne ku Illinois ne ku nyungulukilu kwônsò, mu matuku aa, pa nanku tudi...batwishiiabwe ne Nzambi neanupe dikubiibwa Dyende panudi nwenza ngendu apu. Nenku ndisambila dyetu bwa ne Yèyè wanulamaku mu njila, mu njila eyi ya njiwu padiyi yilwa ne busenu mu movù wa mashika. Ne edi ditunga ditu dibi mu movù wa mashika. Ditu ditunga ditambe bulenga didiku mu movù wa bintu bitoloka anyi mu movù wa mabeji apoopoka, kadi mu movù wa mashika ne mu movù wa luuya ditu dibi be.

² Mpindyewu, ncyèna ncinka ne bakaadi babange kukwata mikaba ya mèyì muntu mwamwa to. Kadi ndi anu muswe kwamba dîyi pa bidi bitangila dyalumingu dishaale, mu diyiiisha. Cidi cyenze ne mêmè—mêmè ndame mukaba wa mèyì ne nciyi muswe kulekela basumbisha mukaba awu, bapatuka naawu, ee, mbwalu bidi bikengela ngânji kuwutangilula dyambedi. Bwalu misangu yàbûngì, mu mushindu awu, ndi mufwanyine kwamba maalu mu ekeleeziya emu àndi nciyi muswe kuteeka kumpala kwa bantu bônsò mushindu awu to, bwalu bitu misangu mikwabo bitwala bilendwishi. Ne misangu mikwabo bitu bijuula nkonko munkaci mwa bantu beetu twètù mwab'ewu mu tabernacle. Nenku bidi... .

³ Ncyèna ngamba eci...ngamba maalu awu bwa kwikala nciyi ncyuka maalu to, kadi misangu mikwabo mu dilaabiibwa udi umanya bintu byûtù kuyi mufwanyine... .kuyi mufwanyine kudidinga kubyambila bantu to. Nenku misangu mikwabo mu dilaabiibwa cintu kampana necilasuke, nudi numona's, kadi kuyi ucimona to. Ne cimwe cya ku bintu bîndì ngeela meeji ne bivwa byambiibwe (mu dyalumingu dishaale dyadya) bidi bifwanyine kufikisha muntu ku... .pâmvwà mwambe ne ncitu ngitabuujà dibiikila dya ku cyoshelu. Nwamonu anyi?

⁴ Ndi muswe kwamba bwalu abu ne kubutookesha bwa nwênù kuumvwa. Kakutuku dibiikila dya ku cyoshelu dyenjiibwe mu Bible mujima ewu to. Kakutuku cintu bu nanku mu Mifundu to. Mwaba nansha umwe mu bikondo kacituku cyenjiibwe to too

ne mu cikondo cya ba-Méthodistes, kukaadi bidimu bitwe ku nkama ibidi, nwamonu's.

⁵ Mabiikila a ku cyoshelu mpadi bantu baseemena ne bateeta kuswisha ne kupulumuna bantu ne: “Lwâku's, John. Udi mumanye's, batu...Mamwêbè mmufwe, mwikale ukusambidila wêwè ewu. Lwâku's, John.” Aci kî nditwishisha to, nwênù balunda. To, bya—bya mishindu ayi abi, ntu...mu mpuukapuuka mmunutu nuumvwa muntu wa nanku uya kule menemene. Kabidi, mu ciine aci, nudi nupeta bintu byônsò naka. Ki bwa cinyi ekeleeziya udi yêyè yônsò mu cibwejakaji mushindu udiye leelu wa Ndaaya ewu emu, mbwa bintu bya mushindu awu.

⁶ Ditwishisha, kabyena bikengela wêwè kwamba cintu kampana to, mwaneetu, Nzambi udiku ne ukaadi mumane kwenza mudimu awu. “Pacivwa anu Peetelo wamba Mêyi aa Nyuma Mwîmpè wakatuulukila bavwa bateeleja Dîyi abu.” Nwamonu anyi? Nwamonu anyi? Nwamonu anyi? Kakutu dibiikila dya ku cyoshelu to, nwamonu's, cintu bu nanku to.

⁷ Mpindyewu, cyoshelu mmwaba wa disambidila udi ukengela bwa muntu yônsò udi ulwa mu ekeleeziya kwanjiye kuya dyambedi, kutwa binù ku cyoshelu, kusambila Nzambi mundamunda ne kulambula dilomba dyende dya disambila ne—ne bwa bananga bende, ne kusakidila Nzambi bwa bidibo bamwenzele, pashiishe kwalukila ku kaaba kende.

⁸ Ne pashiishe ekeleeziya mmwaba udi Dîyi dya Nzambi... “Nenku cilumbulwidi cidi cibangila ku Nzubu wa Nzambi,” kudi cilumbulwidi cya Dîyi cipatukila. Pashiishe...Kadi leelu ewu, tukaadi—tukaadi tushintulula aci tucikudimuna bikole emu ne emu.

⁹ Mpindyewu, ncyêna cilumbu ne muntu udi wenza mabiikila a ku cyoshelu to, nwamonu's. Aci cidi...Ne mêmè mwine's nkaadi muënzènze àbûngî, ne pàmwâpa nêngênzè makwabo kabidi àbûngî bu mêmè mwa kutungunuka. Kadi anu bwanyi mêmè mwine...Nwamonu's, nudi—nudi—nudi nutamba kwenda kwangula bintu bipitepiteme bûngî. Ne kakwena cilumbu ne biine abi to, kamwena bubu to. Bidi anu bîmpè. Nwamonu anyi?

¹⁰ Bwalu, teejejaayi, Yesu wakamba ne: “Muntu nansha umwe kêna mwa kulwa kûndi Mêmè padi Taatù kayi mumukoke dyambedi nansha. Ne bônsò badi Taatù muMpe nebalwe kûNdi.” Aci ncyà bushuwa. Pa nanku, nwamonu's, badi...Aci's cidi ciimansha dibiikila dyenu dya ku cyoshelu adi dyônsò nkòòng. Nwamonu anyi? Nudi numona aci anyi? “Bônsò badi Taatù...” Nudi...

¹¹ Bujitu butudi twêtù—twêtù bambule mbwa “kuyiisha Dîyi.” Bible mmwambe ne: “Bûngî bwônsò bwa bààkiitabuujà abu baakabatiijilbwa.” “Nyngalalaaayi, nubatiijilbwe mu Dîna dya

Yesu Kilisto bwa dilekelediibwa, difwidiibwa dya luse ku mpekaatu.” Cinyi? “Nubatiijiibwe mu Dîna dya Yesu Kilisto bwa dilekelediibwa dya mpekaatu, nwamonu’s, nenku pashiishe nenupete kupà kwa Nyuma Mwîmpè.”

¹² Kadi paudi uswisha bantu ne ubapulumuna ne ubumvwija bwôwà, ne wenzeja bantu bwa . . . Bantu badi ne cya kudivwila mu didyelela dya meeji, ne dicincika dya maalu, mu ditwishiibwa, ne bapeta Kilisto. Pashiishe cintu cya kumpala cidibo benza padibo bapeta Kilisto biikale basombèle mu myaba yabo, cintu cidi cìlondà nkubatiijiibwa mu Dîna dya Yesu Kilisto bwa dilekelediibwa dya miine mpekaatu yidibo batwishiibwe ne mbapiile ku yôyi ayi. Mushindu awu ki udibo balekelediibwa mpekaatu yabo, nwamonu’s. Bwalu baamanyi kunyingalala; bãbàtiijiibu bu civulukilu kudi bantu, ne: “Ngăkididì Kilisto bu Musungidi wanyi sungasunga”; pashiishe udi muntu mulongolwela Nyuma Mwîmpè.

¹³ Nenku, mpindyewu, bantu bààbûngì badi batungunuka, baswishangana ne babiikilangana ku cyoshelu, ne bikwabo bya mushindu awu, ne ciine aci cidi anu cîmpè. Mêmè nêntwe ku ciine aci, cidi anu cîmpè bwa ku dyanyi dimona, muntu yônsò udi muswe kucyenza awu. Kadi, bwanyi mêmè, kî ncyà mu Mifundu to, nudi numona’s, nenku ndi—ndi muswe mêmè kushaala anu ne Mifundu.

¹⁴ Nenku ki bwa cinyi kabingila kavwa kenze ne ndame mukaba wa mêyi awu mbwalu nudi bafwanyine kuwupatula kadi twètù kupeta mikanda mitufundila nkama itaanu ku lumingu ya twètù kwandamuna. Yônsò . . . Ukadyata anu pa kaacilele kakese kadi muntu naaku nunku, ki cyônsò cyûdi ne cya kwenza, pashiishe byônsò byalukila cyakabidi mu butuwi.

¹⁵ Nenku ndi ngeela meeji, misangu yàbûngì, ne ntu ndambu ntamba kudyula be bintu bishiileshiilangane bya mushindu awu. Kadi ncyêna ne meeji a kwikala mushindu awu to, kadi misangu mikwabu midimu mikubiikidila nyidi yikukoka mu mushindu awu, nudi numona’s, yi—yikwenzejane wikale mukeeyemene ku luseke alu. Pa nanku ndi mutwishiibwe ne bantu mbumvwe aci.

¹⁶ Mpindyewu, tudi ne kusakidila kwàbûngì bu mutudi ne Taatù wa mu Dyulu wa musangeelu Udi—Udi ukenketa bilema byetu kadi kayi utubalulwilabi to.

¹⁷ Mwya mbala mu Mukanda wa—wa Loomo, mu nshapita mwi4, mwaba udi Pôlò mufunde dibalulula dya maalu a mu nsombelu wa Abraham kudi—kudi Nzambi. Mpindyewu, tudi bamanye ne Abraham misangu yàbûngì uwya anu ne dilubakana mu mushindu kampanda anu bu mutudi peetu emu. Kadi paalu . . . paalu dibalulula dya maalu ende kufundiibwa, kabaakateelaku dilubakana dyende adi nansha dikese to, nwamonu’s, kabaakaditeelaku to nansha kakese. Mbambe ne:

*Abraham kaakatenkakanaku ku mulayi wa Nzambi
ku bupidya to; kadi uvwa ne dikanda . . . ufila butumbi
kudi Nzambi.*

¹⁸ Nwamonu's, nenku ndi ntekemena ne ki mwikala dyanyi paanyi mwa kufundiibwa muulu Mwamwa, kacyi bilema byanyi ne bikwabo bintu to, kadi anu bîndî nditacisha bwa kwenza abi, meeji a mwoyi wanyi a bîndî njinga kwenzela cisamba cya Nzambi abi.

¹⁹ Nenku mpindyewu tudi balwe mu dinda emu bwa—bwa kuteeta kutwala kaadiyiisha kakese mwab'ewu kàdî pàmwâpa Mukalenge mutwâmbike bwa kukâpa bantu. Nenku ne ditekemena dya ne nekânwénzèlè bimpè ne nekangenzele paanyi bîmpè, bu mutudi pamwe ne biikale ne mwoyi mu cikondo cilenga be, ne mu matuku a ndekeelu. Nenku kumpala kwa twètù kwenza disambila, ndi njinga kubala myaba ibidi mu Dîyî; umwe kumpala kwa disambila, ne mukwabo paanyima paa disambila. Nenku dyambedi, bwa kukangula disangisha dyetu, anyi, eci citupa cyàDî, ndi njinga kubala mu Mukanda wa Ebelu. Nshapita wa 11 wa Ebelu, ku makumi asatu ne . . . mvensa wa 32, utwabanga nende, biikale twakula pa diitabuujja.

*Mpindyewu ncinyi cikwabo cîngâmbâ? anyi
dîbâ ndifwanyine kunkeepa bwa kulonda bwalu
bwa Gideonâ, . . . bwa Baalaka, . . . Shimishoona, . . .
Yefete; . . . Davidi. . . Samwele, ne bwa baprofeta,*

*Bavwa ku diitabuujja bacimune makalenge, benze
bwakane, bapete mulayi, bakange mukana mwa nyama
ya ntambwe,*

*Bajime lwonji lwa kapyâ, bapanduke ku mwele wa
mvita, ne buumushiibwe ku butekete. . . bavwijiibwe
ne dikanda, balwe ne bukutu bubândile mu mvita,
banyeeshe baa ku baabèndè. . . bilwilu bya bantu baa
ku baabèndè.*

*Bakaji baakapeta bafwe baabo babiishiibwe ku lufu
balwe ne mwoyi. . . ne bakwabo baakakengeshiibwa,
kabayi biitaba disungidiibwa to; bwa baamona mwa
kupeta dibiishiibwa dya ku lufu ditambe bwîmpè.*

*Ne bakwabo baakapeta mateeta. . . baakasekiibwa ne
lwonji lwônso. . . dituuciibwa dya mfimbu, eyo, kabidi
mu nkanu. . . dyediibwa dya mu maloko.*

*Baakatuuciibwa mabwe, baakakoshiibwa bitupa ne
ma-scies, bôbô kuteeciibwa, . . . kushiipiibwa ne mwele
wa mvita: . . . baakalalakana biikale barwale biseba bya
mikooko ne biseba bya mbuji; babanyenge bintu byabo
byônso, . . . ne babakengeshe;*

²⁰ Tangilaayi bidi byela mu tuboko ebi:

*(Bòbò bàvwà panwapa kapayi pabàkànyine:)
baakalalakana mu bipeela, ne mu mikuna, ne mu meena
a nyama ne mu nyongolo ya buloba,*

*... bònsò aba, bamane kupeta bujaadiki bwîmpè ku
diitabuuja, kabaakapeta mulayi to:*

*Nzambi mwikale mutulongolwele twêtù cintu
kampanda citambe bwîmpè, bwa bòbò kabavwijiibu
bapwangane twêtù katuyiku to.*

21 Pândi mbala maalu malonda awu a masalaayi a bukutu awu, ntu ngaadikonka ne keetu kaabujaadiki kakese aka nekiimanyine penyî kumpala kwa bantu abu mu Dituku adi.

22 Anu kumpala kwa disambila, kudi muntu mufwanyine kuswa bwa kumuvuluka kudi Nzambi anyi? Ela anu cyanza cyebe muulu, ne cyònsò ciwikala naaci dijinga aci bwa Yêyè amone ne ùmvwè ne akupeesheci mpindyewu patudi twinyika mitu yetu apa.

23 Taatù wetu wa ngàsà ne dinanga, nyewu tuseemena ne kudipwekesha kwònsò ku Nkwasa Webe wa butumbi mu dinda edi mu Dîná dya Yesu, Mwânà Webe, bwa kulambula disambila bwetu twêtù biine ne bwa bakwabo. Anyishaku dyambedi, Mukalenge, utufwile luse ku matomboka etu ònsò ne ku bubu bwetu. Ne pashiishe tudi baswe kulombela bakwabo, Mukalenge, bwa baamona paabo mwa kufwidiibwa luse.

24 Nenu Ekeleeziya Webe mmufwanyineku kuseemejiibwa pabwîpî Neebe menemene. Bwalu ncyà bushuwa, Mukalenge, mu myoyi yetu tudi twitabuuja ne Wêwè udi pabwîpî ne kukwata mudimu ne Ekeleeziya Webe, pabwîpî ne kuMuumusha pa buloba bwa atentemunyiibwe mu Bukalenge bwa Nzambi. Kadi, Mukalenge, utukwacisheku bwa twikale badilongolole bwa diine dîbà adi. Swaku bwa dinda edi diikale dîbà adi mene, Mukalenge, kubangila ku umwe too ne ku twêtù bònsò ditwikala mwa “kuteeka ku luseke bujitu bwònsò ne mpekaatu udi utùjìngilà anu bipeepele ewu ewu, bwa twamona mwa kunyeema ne lutulu lwònsò lubilu ludi lututeekela kumpala elu.”

25 Nenu ndi ndomba, Taatù wa mu Dyulu, leelu ewu, bwa Wêwè kwondopa babeedi ne badi ne ntatu. Bààbùngî badi bàsaama mu ditunga dijima emu, ne bipupu, ne twishî twa “virus” bu mudi bangangabuka babyamba. Ndi ndomba bwa makole Ebe a dyondopa, Mukalenge, ikale kudi bantu abu.

26 Nenu bwa kupweka ku disangisha dyetu dikese edi mu dinda emu. Bààbùngî mbendeshe mashinyi nkama ya kilomeeta, baase lwendu dîbà dimane kupita makeelela diloolo too ne bufuku bujima too ne mu dinda emu, leelu ewu, biine abi bendesha bikole anu bwa kufika ku tabernacle. Bya bwalu nêjè wenda umata njila mujima. Nzambi, tudi tulomba bwa Wêwè kubabenesha mu mushindu wa pabwawu. Kakuyi mpatà to bivwa bikengela bààbùngî batuule citupa cinene cya màkutà

a byakudya byabo bya lumingu lujima lùlwalwà elu, anyi nî ncinyi cyônsò civwa cifwanyine kwikalaku aci, anyi bintu bivwabo mwa kwikala bafwanyine kutuudila mfranga yabo, bwa kasoloonyi ne bikwabo, bwa kulwabo.

²⁷ Nzambi, ewu wâlwa kûdì munda mutupu neapingane mùle tente. Wêwè ngutu mulaye nanku. Nenku ndi ndomba bwa Wêwè kuuja myoyi yabo ne bisaka byabo (bya misuuka yabo) tente ne bintu bîmpè bya Nzambi mu mushindu wa bapingana benda bàtùtuka bwa bûngì bwa “disanka didi kadiyi kwamba ne bùle tente ne Butumbi.” Mpanza ya bantu baa mushinga mukole aba yûle yiyiile ne panshi, ne bintu bya nyuma ne bîmpè bya kudi Nzambi.

²⁸ Benesha cyanza cyônsò, Wêwè ngudi mumanye dijinga divwa paanyima paa ciine cyanza aci, Mukalenge. Ndi ndomba nangananga bwa Wêwè kubabenesha. Twamonu mu lumingu lushaale elu Wêwè muwândàmùnù ku disambila mu mushindu wa cishima mu tusunsa tukesèè, bikondo bya njiwu ya cimpicimpi ne màsaamà ne ntatu. Wêwè udi Nzambi, utu myaba yônsò, utu wimana ku luseke lwa basadidi Bende. Ndi ndomba, Nzambi, bwa Wêwè kwimana ku luseke lwa aba nunku mu dinda emu. Ubape dijinga dyabo, Mukalenge, dya myoyi yabo. Ncyêna ngiitabuja ne civwa mbwa cintu kampanda cya budisu nansha, kiipacila kampanda—kampanda kabi paanyima paaci to. Ndi ndomba bwa Wêwè kubabenesha.

²⁹ Nenku mpindyewu, Taatù, wamvulukaku mêmè, twètù, leelu ewu, ne wanyisheku nkumbane bwa kudyumusha mu njila mu mushindu wa . . . Twètù bônsò, kuumukila anu ku mpaasata kadi kupweka too ne ku bâ—bânà, twikaleku bakumbane bwa kuditeeka ku luseke pa cyoshelu cya Nzambi ne kukangula myoyi yetu ne kuteeleja Nyuma Mwîmpè piikalaYe wakula neetu. Kudimuna mpanza yetu ya Dyebe dibenesha . . . bwa kwakidilayi mabenesha Ebe, ne luseke lùdì mu lwôlò alu lutangija muulu. Pa dîbà adi upongolole bukole bwa Maanyi a dilaabiibwa munda mwabo. Ne utupe dikanda, Mukalenge, didi ditukengela bwa matuku acidi kumpala. Tùpèshèku dibenesha edi. Tudi tulomba nunku mu Dînà dya Yesu. Amen.

³⁰ [Mwaneetu Branham udi wandamuna muntu kampanda uvwa mumwele lukonko pa dibiikila dya ku telefone—Muf.] Hmm, ncyêna mumanye to. Angata wêwè anu nomba wende wa telefone awu umwambile ne mêmè nêmmubiikilè paanyima paa disangisha. Ncyêna mumanye to.

³¹ Nwânsambidilaayikù. Mêmè . . . Mwaneetu Jack Moore ku telefone, mwikale anu unswisha bwa mêmè kwikala kwôkò aku lumingu elu. Nwamonu anyi? Mêmè ncyêna anu ndyumvwa mwa . . . mukumbane bwa kucyenza to, nudi numona’s, ne pa nanku ncyêna mumanye cya dycenza to. Ntu munange Mwaneetu Jack. Ne cibilu cinene cilwalwà kuntwaku aci kadi yêye

mubengele bantu, bu mudi Booth Clibborn ne bakwabo abu, bavwa mwa kulwa. Kadi udi anu musuminyine, mwikale anu ufila dimanyisha dyende ne bikwabo byônsò mushindu awu, kacya anu wasuminyina bwa mêmè kulwa. Pa nanku ndi—ndi muswe ngiikale mudyûmvwè menemene musakiibwe bwa kuya, nudi numona's. Nenku ndi . . .

³² Nenku, mpindyewu, patudi tubuulula cyakabidi mpindyewu mu Kolinto Mwibîdi apa, netubangile ku mvensa wa 12 wa Kolinto Mwibîdi awu, bwa kubala mvensa umwepele wa Mufundu bwa cyena bwalu, bu Nzambi mwa kwanyisha nanku. Kolinto wa Kumpala, ku . . . Anyi Kolinto Mwibîdi's we, eyowa, nshapita wa 12 ku mvensa wa 9. Ndi njinga kubala katupa kaa cyambilu kaa kumpala aku . . . Anyi katupa kaa cyambilu kiibîdi kaa mvensa wa 9, katupa kende:

Ki kungambilaye ne, Ngâsà wanyi mmukukumbane: bwalu dikanda dyanyi didi divwijiibwa dipwangane mu butekete . . .

³³ Imanaayi nCibalulule mpindyewu bwa nwikale batwishiibwe bwa kuumvwa cyena-bwalu:

Ki kungambilaye ne, (ewu n'Nzambi udi wambila Pôlò), Ngâsà wanyi mmukukumbane: bwalu dikanda dyanyi didi divwijiibwa dipwangane mu butekete . . .

³⁴ Nenku byôbî ne ndi mufwanyine kucibiikila ne ncyena-bwalu, ndi njinga kukwata mudimu ne eci nunku, dikanda . . . *Dikàndà Dipwàngàne Ku Butekètè Bupwàngàne*. Patudi ne butekete mpatudi ne dikanda. Ncyena-bwalu cya pabwaci pa . . . mu disangisha dya beena Mpenta, bwa kwenza . . . bwa kwangata cyena-bwalu cya *butekete*, bwalu tutu anu misangu yônsò tufila bujaadiki ne “tudi ne dikanda dya kanzèkelè.”

³⁵ Nenku ngâmbî kumpala, ne, ntu anu nditacisha bwa kusambila mu lumingu lujima bwa kujandula ne ncinyi cidi cifwanyine kwikala cîmpè cya mêmè kulwa naaci kumpala kwa disangisha. Bu ne bivwa mbwa kufika apa anu bwa kunteelejabo, mbipiciibwe ne mêmè muteeleje muntu mukwabo mu dinda emu mwimane mwab'ewu.

³⁶ Bwa kwamba menemene, too ne matuku abidi aa, mvwa nsanganyiiibwa mu Kentucky ne baa ku ba-Mwaneetu Gabehart kuntwaku. Ndi mwenze anu ngumuka kumbelu kwabo aku, kwa mwaneetu wa balume wa mushinga mukole ewu ne mukajende ne famiye wende ne bakwabo abu, ki pângâàlu kupeta meeji aa.

³⁷ Mvwa mukabwele mu nzubu kampanda kumpala ndambu kwa ciine aci. Mvwa mwimanyine lwâ pambelu, ki inâbânzâ awu kwambaye ne: “Ndi njinga kuyiikilanganaku ne mwambi wawa.” Ki mêmè kubwela mu kazûbù kaabo kakese aku. Nenku muvwa . . . Yèyè ne: “Wèwè ki Mwaneetu Branham anyi?”

Ki mêmè ne: “Eyowa's, mandamu.”

38 Yèyè ne: “Ndi ne bundu bwàbùngì be bwa mmwenekelu wa nzubu wanyi,” kwambaye ne, “bwa dikubiikidilamu.” Yèyè kubanga kudila mwadi. Yèyè ne: “Kadi ndi—ndi ne dijinga dinene be ne ndi ne dikweyemena dyàbùngì menemene.”

39 Kadi nkaavwa mujandule ne uvwa mmwaba uvwa Mwaneetu wa bakaji mukese Cox ututu tushaala nende ne bakwabo lwà kwinshi—kwinshi kwaka awu, kaa—kaakaaku kampanda kàvwà ne cisanji cya mikaba ya mèyi aku kaya mu nyungulukilu amu kenda kendesha mikaba ayi. Ki cyôci aci’s! Ki mmwenenu nyèyè awu! Nwamonu anyi?

40 Mêmè kuzakana mu kazùbù amu, kazùbù kakese kaa bupwekele, kenze anu bu kâmvwà mukolelemu aku, kadi ku cimanu kùle tente ne bimfwanyi bya Kilisto. Kuvwa Bible muteeka pa meesa apu. Mêmè kwamba ne: “Ncyênàku mufwanyine kutwa cintu cikwabo mushinga kupita eci to mu nsombelu wanyi, nzubu wa mushindu ewu ki ûntù mêmè munange kubwela.” Kufilaye dilomba bwa muntu kampanda. Nenku mèbà ataanu paanyima paa twètù bamane kusambila pamwe, kaakaaku aka ne mêmè bamane kusambila pamwe, Nzambi ukaavwa mwandamune.

41 Pa nanku twètù kusambila cyakabidi, ne Maamu Cox awu ne mêmè ne bôbò bônso banyungulukile meesa mu dinda amu, biinyike mitu yetu balombe Nzambi bwa atupeku mpunga bwa kwenza cintu kampanda ku didifila divwaye mwenze adi. Nenku, ku dilomba dya cyôci aci, ki Nzambi kukangula njila kampanda. Nudi numona anyi? Yèyè’s udi Nzambi!

42 Twètù tutu tukeba bwa kuvwija matekètè etu bu ne ntubingila. Tutu baswe kwambilangana mutudi banene, mutudi bantu baa mushinga. Ndi ngeela meeji ne ki cimwe cya ku bintu bimvwà . . . bidi Nzambi mumpeeshile cyena-bwalu eci, civwa mbwa kuumusha aci mu meeji etu. Nwamonu anyi?

43 Kùtu tuntu tukese tutùtù twenza. Nenku ki citudi tuvwila mu ekeleziya, mbwa kujandula ne mmwaba kaayi udi bilema byetu, ne bintu bitudi bafwanyine kutamba kudivwija naabi balenga. Twètù tulwa mu ekeleziya bwa kiipacila kakwabo—kakwabo pa kuumusha aka, ndi nciina ne katwakupeta cya nsongo ku dilwa dya mu ekeleziya to. Tudi ne cya kulwa bwa kujandula butekètè bwetu, kujandula myaba yetu idi mibi ne yetu . . . mushindu kaayi . . . kumona mutudi bakese, ne kuteeka dyeyemena dyetu mu Kampanda udi wa dikanda. Kadi patudi ne butekètè . . .

44 Kudi bààbùngì baa kutudi batu baswe kufila majaadiki anyi baswe kwikala kudiyambidila mutudi katuyi bakumbane ne, pa nanku, tuvwija ciine aci bu kabingila ne: “Ncitu mulonge to, ncitu ne dikumbanyina to, ncyèna mukumbane bwa kwenza *cikampanda* to.” Kadi wèwè anu kacya wâsumba ciine aci muulu ne mwikale wenza aci mu mushindu awu, mutungunuke ne kuya

mu mushindu awu, pa dîbà adi kwakuyaku kumpala ne kufika ku cintu kampanda to. Kadi cintu ciine citudi tufidila tubingila aci, ku butekètè bwetu, Nzambi udi wangata ciine cintu aci bwa kubundula naci mudimu. Nwamonu anyi? Yèyè utu windila bwa twètù kufika ku ngiikadilu awu bwa kumonaYe mwa kukwata neetu mudimu. Twètù tudi—tudi tufila tubingila twamba ne: “Ee, ndi—ndi—ndi—ndi. . . ncyèna mwa kwenza eci to, ncyèna nkumbana to. Ncyèna—ncyèna mwa kucyenza to.” Kadi Nzambi udi wangata ciine cintu aci bwa kukwata naaci mudimu. Ncya bushuwa.

45 Ki bwa cinyi Yèyè—Yèyè udi utusungula twètù aba, s’mbwalu tudi mu ngiikadilu awu. Mpindyewu, aci cidi cimweka cya pabwaci, kadi anu mu tusunsa tukese netufike ku kabingila kaa cyòci aci, bu Nzambi mwa kwanyisha.

46 Tudi—tudi tujandula, anu bu mutwáfumu ku dibala ne, matekèkè awu ne dibengiibwa. . . ne tudi tujandula ne bantu biine batu batambe kwikala ne butekètè abu ne badi babengiibwe kudi bantu baa pambelu abu, ki bilobo bya Nzambi, bàdi bàcimunà ku mwalu wa mvita, wàngata bôbô badi—badi. . . badi badyumvwa kabayi bakumbanyine abu.

47 Kuvwa mwaneetu mukwabo wa ba-Méthodistes, basatu baabo bàtù bàlwa mu ekeleeziya emu bafumina ku Ohio, anyi mu Indiana wa ku nord. Bavwa bangambila abidi adi panshi aa, ne: “Mwaneetu Branham,” bamba ne, “nyewu twafumu ku dipeta Nyuma Mwîmpè, bikengela mpindyewu tuditwe mu dikeba dya mapà bwa mudimu wetu wa bwambi anyi?”

Mêmè kwamba ne: “Kanwenjiku aci to! Lekelaayi bwalu abu anu mudibu amu.”

48 Ki kukudimukaye e kuntangila, kwambaye ne: “Ndi mfuma ku dibala mukanda wa mwaneetu kampanda utwambila ne paanyima paa dipeta dya Nyuma Mwîmpè bivwa ‘bikengela tuditwe mu dikeba dya mapà,’ bwa ôwò aa kukwatawu mudimu ne Nyuma Mwîmpè.”

Mêmè kwamba ne: “Kadi kulwa muntu mudyambi’s!” Nwamonu anyi?

49 Nwènù baswe kumona mu Bible, misangu yònsò anu batu bakeba kwepela bwalu abu abu, ki batu Nzambi ukwata naabo mudimu. Padi anu muntu. . . muswe kwenza cintu kampanda ne wela meeji ne udi ne dikumbanyina dikumbane dya yèyè mufwanyine kujikija mudimu awu, Nzambi kènàku mwa kukwata mudimu ne muntu awu to. Tangilaayi Mòsà, unyeema; tangilaayi Pòlò, unyeema; ne bakwabo baa kudibo abu, bakeba kuwepuka.

50 Mêmè kwamba ne: “Kanuditu mu dikeba dya cintu nansha cimwe to. Nzambi Yèyè ne cintu kampanda bwenu nwènù, Yèyè ki wanupeeshaci.” Nwamonu anyi? “Nenku nwènù Mulekelaayi Yèyè—Mulekelaayi Yèyè atangile bwalu abu.” Mêmè ne: “Nenku

angataayi bimwe bya ku bikondo bu bitudi naabi ebi, bitudi naabi leelu ewu ebi, mudi muntu yônsò ujinga anu kwenza *cikampanda* ne kwenza *cikansanga* ne kushaala muntu munene kampanda emu. Tangilaayi numone ne mmu cinyi mutukaadi babwele ne ciine aci, nudi numona's."

⁵¹ Pamutu paa kukeba bwa kwikala banene bivwa bikengela twêtù kukeba—kukeba bwa kujandula mushindu utudi mwa kushaala bakeke. Nwamonu anyi? Pa dîbà adi Nzambi udi mwa kukwata neetu mudimu. Ndi ne Mifundu mulongolongo mifunda mwab'ewu yidi yikengela mêmè kuteela, ngeela meeji, kadi ndi . . .tudi . . .Pâmwâpa ncyakupeta dîbà dya kuyiteela to. Kadi tudi . . .

⁵² Monaayi ne bidi bikengela badi—badi batambe kwikala mu butekètè ne babengiibwe, misangu kana yônsò cilobo cyônsò cikaadiku Nzambi muteeke ku mwalu wa mvita civwa mmuntu wa mushindu awu. Muntu uvwabo babenge, muntu uvwa udyelela meeji ne kavwa ukumbana awu, muntu uvwa kayiku ne dikumbanyina nansha dya kânà awu, pa dîbà adi muntu awu ki udi anu mu mushindu mwîmpè wa ne Nzambi udi mwa kubanga kukwata nende mudimu. Ncya bushuwa. Mpadiye udyumvwa mushindu awu bu udi kayi ne mushindu to, bu udi kayi ne kantu nansha kamwe, ki padi Nzambi mwa kumupya mu cyanza kadi kwenza nende cintu kampanda. Nwamonu anyi? Padi . . .Kadi patudi tudyelela meeji ne tudi ne bukole bwa kucyenza, pa dîbà adi Nzambi kèna mwa kukwata neetu mudimu to bwalu tudi baswe twêtù biine kudyenzelawu.

⁵³ Ne, pashiishe, luseke lukwabo, tudi tudyumvwa mushindu ewu ne tudyelela meeji pa dîbà adi ne katwena tukumbana to, ne katwena baswe kuwenza to; kadi pa dîbà adi twêtù anu bateye maci ku dibiikila dya Nzambi, ki cintu mene cidid Nzambi muswe bwa twêtù kubwelamu ncyôci aci, mushindu wa nanku awu, bwa Yèyè kumona mwa kuwenza.

⁵⁴ Patudi katuyi tukumbana to, twêtù biine, pa dîbà adi mpatudi baswikiibwe ku didilekelela kudi Nyuma wa Nzambi. Patucidi anu tudyambidila ne tudi mwa kucyenza, pa dîbà adi katwena mwa kucyenzaku to. Kadi patudi tufika pa kaaba kaa tumanya ne katwena mwa kucyenza to, pa dîbà adi mpatudi tudilekelela kudi Nzambi ne Yèyè udi ucyenza. Nenku byôbì ne ntwêtù badi bakeba bwa kucyenza apu kaayi netupangile, kadi twêtù anu badilekelele kudi Nzambi pa dîbà adi Nzambi kèna mwa kupangila nansha. Kudi cintu anu cimwepele cidid Nzambi kayi mwa kwenza to, ncyôci eci, kupangila. Yèyè udi mwa kwenza cintu cikwabo kana cyônsò pa kuumusha kupangila. Kadi Yèyè kèna mwa kupangilaku to.

⁵⁵ Nenku patucidi anu tuteeta mu twêtù biine ne tweyemena makumbanyina etu twêtù biine, ne bikwabo apu, ee, katwakwenzaku cintu nansha cimwe to. Kadi patudi tukafika

pa kaaba kaa tudimanya ne tudi cintu cyanaana, pa dîbà adi Nzambi udi mwa kukwata neetu mudimu.

⁵⁶ Cintu cidi ne mushinga, cimwe cya ku bintu bidi ne mushinga citudi ne cya kushikuluja...Mpindyewu vulukaayi eci, nangananga nwênù bayiishi baa twânàtwànà aba, bya mwomumwe ne nwênù beena kwitabuuja baa cyanaana. Kudi cintu cimwepele cidi cikengela bwa twètù kushikuluja patwikala baswe bwa kukumbaja dijinga dya Nzambi mu nsòmbelu wetu, ncyà ne, bikengela tushikuluje dyeji dya *dikumbanyina dya buntu*. Bu twètù mwa kufika pa kaaba kaa tudyelela meeji ne tudi mwa kucyenza ku meeji etu twètù ne ku makumbanyina etu twètù biine, bikengela tushikuluje cyôci aci mu mushindu utudi mwa kulekela cintu aci kadi kuciteeka ku luseke bwa Nzambi wamona mwa kukwata neetu mudimu. Ncyà bushuwa.

⁵⁷ Nunku enza kudilekelela kwa mu kaabujima! Katwena mwa kukwata mudimu ne dikumbanyina nansha dimwe to. Bikengela twètù kwenza kudilekelela kwa mu kaabujima! Kabidi, bwa kulwa kudi Nzambi, bikengela uMulekelelele musuuka, mubidi, ne nyuma byònsò. Bikengela bwa cyònsò cyùdi aci ciikale cilekelela Nzambi, bwa Yèyè kumona mwa kwenza ne diswa Dyende dikwate mudimu munda mwebe ne munda mwanyi.

⁵⁸ Mpindyewu, aci ncikole, ndi mumanye, bwalu twètù tutu anu tujinga kwelamu cyetu citupa, cintu kampanda citudi twètù *bamanye*, tudi bamanye ne tudi baswe kucyenza. Tudi twamba ne: “Ee, mêmè—mêmè ndi anu mumanye ne bivwa bikengela kucyenza mushindu ewu.” Kadi paucidi anu ucyenza mushindu awu apu neciikale kacyi mu cyôci to, ne Nzambi pende kaadyakukwataku mudimu ne didifila adi to. Pàmwâpa (ne dikwacisha dya kudi Nzambi) netukabwele mu cyôci aci mu ndambu wa tusunsa emu, bwa kunuleeja anu mushindu udi Nzambi kayi mwa kukwataku mudimu ne dikumbanyina dyebe wêwè adi to.

⁵⁹ Nunku ki lutatu ludi naalu baa pa buloba leelu ewu ndwôlò alu: kudi malabula a ku seminere mapitepite bûngì, mapitepite bûngì mateekela mu tulaasa tulonga, mapitepite bûngì mateekela mu malanda anyi buunyaana bwa mu dingumba, tweyemenangana ewu ne ewu, tweyemena bantu badi ne dikumbanyina.

⁶⁰ Bible mmwambe ne: “Mmunyi munudi mwa kwikala ne diitabuuja panwikala—panwikala...” Twânjàyàybì kumona tûng, Mufundu awu udi bishi? “Mmunyi munudi mwa kwikala ne diitabuuja panwikala nusungulujangana munkaci mwenu?”

⁶¹ Patudi batekemene, twamba ne: “Mulumyana ewu, mmuntu munene padiye apa. Ewu mmuntu munene, anu yèyè ki ûndi ngeeyemena,” aci cidi cibiipila Nzambi panudi nwenza nanku. Tudi ne cya kweyemena Nzambi kabidi anu Nzambi nkaayende!

Katwena ne cya kweyemena dikumbanyina dyetu twêtù anyi dya muntu kana yònsò ewu to. Tudi ne cya kudilekelela mu kaabujima kudi Nzambi.

⁶² Kakwenaku dikumbanyina to, nansha badyamba ne ndya nganyi, diìkalà mwa kukwaciibwa naadi mudimu ku mèsù kwa Nzambi. Bikengela Nzambi umushe makumbanyina etu ônsò awu mu twêtù kumpala kwa Yèyè kumona mwa kukumbaja kiipacila Kende. Yèyè ne cintu kampanda cya twêtù kwenza, ne patucidi anu tudyumvwa ne tudi twenza mu cyôci aci mudimu mulenga wa dikema, pa dîbà adi katwadyakukumbanaku bwa Nzambi kukwata neetu mudimu to.

⁶³ Mpindyewu, wèwè udi wamba ne: “Wèwè udi wamba byabûngì be mwaba awu, Mwaneetu Branham.” Ne mmwômò dîyì adi—dîyì adi didi dyamba byabûngì, kadi kenzakanabi tûng ujandule nî ndya bushuwa nî ndya mafi.

⁶⁴ Kenzakanaayi leelu wa Ndaaya ewu numone bintu byònsò bya binene bitudi tudyelela meeji ne tudi benze ebi, kadi bwena Kilisto mu États-Unis budi penyi? Tangilaayi ekeleeziya yetu yònsò ne mangumba ônsò, ne batangadiki beetu ne tumpanye twa dyondopa, ne bikwabo byònsò bitukaadi bapete ebi, kadi ncinyi ciine aci? Bibi kupita muvwabi kacya kwònsò eku! Mbibi leelu wa Ndaaya ewu kupita kacya kwònsò eku, s’mbwalu tudi bateete kubyenza mu dikumbanyina dya buntu.

⁶⁵ Badi badikungwija kadi kwenza masambila malemale ne kupatuka mwab’ewu. Nenku bavwa dituku dikwabo ne mwaba uvwabo bûngì cyanaana, binunu lukama ne makumi ataanu, anyi cintu kampanda cya mushindu awu, badikungwije, ne beena Mishònyì ne beena Katolike bònsò basanga; benza masambila kampanda, ne basambila masambila kampanda, ne bakwatakaja masambila kampanda, ne bikwabo. Aci’s mbipiciibwe ne bôbò biine kabayi badikungwije’s, kacyna ne mushinga nansha mukese ku mèsù kwa Nzambi to.

⁶⁶ Mpindyewu, mèmè mwikale ndyula, numfwileku luse. Nwamonu anyi? Kadi ndi—ndi ne. . . Bikengela kubweja cintu aci bikole. Nwamonu anyi? Bikengela kwenza bwa kukalengaci pa bwalu bwine.

⁶⁷ Kadi mbifile dikwachisha kaayi? Cijengu. Ne cyôci ciine kacyakukwachishaku to anu piikala muntu yònsò udi udyamba mudiye mwena Kilisto awu mupwe mwoyi dikumbanyina dyende yèyè mwine ne mudilekelele kudi Nzambi.

⁶⁸ Pa dîbà adi Nzambi udi mwa kukumbaja kiipacila Kende pa kutuma. . . kî nditabuluja to, kadi, mwaneetu, cidiYe naaci dijinga dya kwanji kwenza dyambedi nkutuma didishipa, ncyà bushuwa, bwa *twamona mwa* kufuululuka. Bikengela ufwe kumpala kwa wèwè kumona mwa kulediibwa cyakabidi, ne bidi bikengela bwa wèwè ku- . . . Yèyè udi dijinga ne didishipa dyetu twêtù biine. Tabernacle ewu udi dijinga ne didishipa, ne mèmè

pamwe nende. Twètù bônso, bidi bitukengela di—didishipa bwa twamona mwa kufuululudiibwa mu mwoyi mupyamupya, mu dikwaciibwa dipyadiipya, ditekemena dipyadiipya, dilabula dipyadiipya! Bidi bitukengela dyambedi dituku dya madilu.

⁶⁹ Bidi bitukengela kaaba kaa kudilekelela kudi Nyuma pamutu paa ditamba kweyemena tulaasa tulonga ne ndongamu yetu, nenku tudi. . . tumpanye twetu ne byônso bitudi naabi ebi. Tudi—tudi—tudi tweyemena dyelangana dya mu diboko dya twètù ne bambi bashiileshiilangane bûngì cyanaana bwa kwelangana naabo mu diboko. Tudi twitabila bintu bipitepite bûngì. . . “Patwikala katuyi mwa kufika bûngì kampanda, mona’s, katwakucyenza to. Katwakuya mu bimenga katuyi ne aci to.” Ne pa dîbà adi, patudi twenza ciine aci, tudi tucyenza mu cishinyishinyi cinene menemene cidi cituuka mwîshì munda cikwate ne dikala, nwamonu’s.

⁷⁰ Pa nanku bikengela twe—twepuke aci, dikumbanyina dya buntu adi. Bikengela tukafike pa kaaba kaa twètù mwa kulekelela misuuka yetu ne nsòmbelu yetu, nansha mene mukaji wa nzubu, cidime, mulongolodi wa mashinyi, anyi ní tudi nganyi, bikengela twètù kudilekelela mu kaabujima kudi Nzambi biikale tumanya ne “tudi bintu cyanaana.” Nenu kulekela Nzambi ubangila mwaba awu. Pa dîbà adi Yèyè udi ubanga kutwa eku ne eku, ukwata mudimu. Ne aci cidi citwangata twètù bônso, muntu ne muntu. Aci ki ci—cintu cidi cikengela twètù kwenza.

⁷¹ Maalu malonda adi ajaadika, ajaadika mpindyewu, ajaadika (mmaalu malonda’s) ne Nzambi misangu yônso uvwa usungula anu bantu cyanaana bwa kulwabo baakampanda Bende. Nzambi utu wangata muntu udi cintu cyanaana awu.

⁷² Leelu wa Ndaaya ewu, wêwè kuyi ne nshindameenu mwîmpè mu teoloji, kudidingi nansha bwa kuteeta kuseemena mu cimenga to, kudidingi nansha bwa kuteeta kuseemena padi disangisha to. Kadi wêwè ne nshindameenu minene, mwikale ne malonga manene ne bikwabo paanyima peebe, udi mwa kuya mu cimenga kana cyônso ne kupeta dikwela dya mu diboko, kwenza disangisha dinene. Ee, kî ndisangisha. . . Ndisangisha’s, anu mudi cintu cikwabo kana cyônso eci, kadi cidi ne dikwacisha kaayi? Nwamonu’s, udi—udi anu. . . Udi upeta twânà tukese twa bakaji ne twa balume etu tulwa, twenda tucyankunya bázòkà tutangile ku cyoshelu, ne bakaji ne balume benda baya kuntwaku anu bwa kwamba ne bavwa “baye ku cyoshelu,” babwela mu cibambalu cya dileejangana dya njila ne bamupatuka babamyamine mâyi anyi babînyije mu mâyi, anyi ní ncinyi cyônso cidibo bakabênzè, kadi ci—cidimu cijima cipita nunku kubangila piine apu. . .

⁷³ Umwe wa ku batangadiki beetu baa batambe bunene uvwa wamba ne, bu yèyè mwa kumanya ne uvwa mwa kusungilaku

dikumi pa lukama dya badiye ukudimwisha mucima mu cidimu cimwe, mmufwanyineku kusanka. Paabi, dîbà adi, pavwaye mwa kupeta bantu cinunu bakudimune mucima, cidimu civwa cilonda, nunku's bivwa bikengela kwikalabo binunu dikumi. Nwamonu's, tudi twenda tutuuta kwa cyanaana, tudi munkaci mwa kupangila kiipacila.

⁷⁴ Bamwe baa kutudi badi baciibakila pa mmwenenu wa mamanya a mu mitu ne: “Kaa,” ne, “cimanya-byônsò ewu, ewu muntu's mmumanyi wa dibàla mulonge tulaasa. S'bivwa bikengela twêtù kulongesha beetu bantu ne kubabweja mu tulaasa.”

⁷⁵ Udi ulonda pende ucishindamijila pa disaluka kampanda dya—dya dinyungakana, dizakala, didila dya mwadi, dyela dya mbila, dija dya maja mu Nyuma, anyi cintu kampanda, cyenzedi cya disaluka dya pambelupambelu. Kadi aci's ncibi anu mudi dilonga dya tulaasa amu! Piikala dyabulu kayi mwa kukupetela ku *elu* luseke, neakusake bwa uye ku *lwalwa* luseke.

⁷⁶ Kadi cintu cidiku cidi ne, kubenga kwikala ne cintu kampanda nansha cimwe cyûdî mwa kweyemena mu wêwê mwine anyi cintu kampanda cyûdî mwa kwenza, anu dilekelela mu kaabujima, dya butekètè bwebe bwônsò nkòdng kudi Nzambi, wamba ne: “Ki mêmè ewu.” Kuyi ne cintu nansha cimwe, dikumbanyina nansha dimwe dyûdî mwa kweyemena!

⁷⁷ Kebulula mu Mifundu yônsò ujandule, bu mûndî ne Mifundu mifunda mwab'ewu emu yîndî nteela. Bamwe bantu baa kale mu Mifundu emu, tudi tujandula ne, Nzambi uvwa misangu yônsò ukwata mudimu anu ne bantu cyanaana bwa kulwabo kampanda Wende. Yêyè ukaadi misangu yônsò anu mwangate aba bavwabo babengebenge kudi baa pa buloba abu, bakaavwabo babenge kudi baa cikondo cya bwena leelu abu, ki baa mushindu awu bavwaYe wangula bwa kukwata naabo mudimu.

⁷⁸ Tangilaayi ba—bapostolo. Elaayi meeji bwa Peetelo, mulobi wa mishipa awu, kayiku ne kalaasa kiine kalonga kakumbane bwa kufunda dînà dyende to. Yone, cinyonga kayi mulonge to. Bantu abu's! Yêyè wakacinguluka banene baa luumu ne mwakwidi mulonge tulaasa awu ne bantu bamanyiike bikole baa mu matuku awu, bamanyi baa mabàla, bidimba bya ekeleeziya, ne wakangata... bantu bavwa badyelela meeji ne bavwa baakampanda abu, kadi wakangula aba bavwa bantu cyanaana ne wakakwata naabo mudimu.

⁷⁹ Mpindyewu, kampanda mwine awu udi mwa kulwa umwe wa ku bantu Bende, Nzambi udi mwa kukwata nende mudimu bu yêyè mwa kwikala mudilongolole bwa kupwa mwoyi ne yêyè nkampanda. Pawikala mudilongolole bwa kupwa mwoyi ne udi *kampanda* bwa kulwa *muntu cyanaana*, pa dîbà adi Nzambi udi mwa kukwata neebe mudimu ne kukuwijia kampanda.

Nwamonu anyi? Kadi bikengela upwe mwoyi ne udi ne mushinga wa búngì.

⁸⁰ Kudi bààbúngì baa kutudi, bààbúngì baa kutudi batu benza ciine aci mu—mu nsòmbelu yetu. Padibo anu. . . Bamwe bantu, padibo anu balwa beena Kilisto, badi balwa beena dyambu, kabayi bacyuka myanda, ncyá bushuwa, padibo anu bangata kajila kaa lùntù-kùbìdì. Badi benda baya cyanyima pamutu paa kuya kumpala. Padi. . . Paudi utamba kupatuka mu wèwè, mpaudi utamba kupeta mwaba wa Nyuma Mwímpè kubwelaye.

⁸¹ Muvwa Elisha mwambile Yehoshafata ne bakwabo abu, ne: “Umbulaayi mu mwaba ewu wùlè tente ne biinà. Panudi nutamba kuumbula mu ndondo, mpanudi nutamba kupeta mwaba bwa màyi.” Nenu mu twètù biine, patudi mwa kutamba kwimansha bisota bya—bya makumbanyina etu twètù biine tubyumusha mu twètù, ki pààtàmbàmu kwikala mwaba wàbúngì bwa kuujiibwa tente ne Nyuma wa Nzambi; patudi mwa kwenza ciine aci.

⁸² Pòlò, mwena bwalu butwǎfumu ku dibala mwab’ewu mu—mu Kolinto emu ewu, mu Kolinto Mwibìdì, tudi tusangana ne muntu ewu uvwa muntu munene. Ùvwa mumanyi wa dibàla, muntu munene. Kadi byakakengela bwa kupwaye mwoyi byònsò bivwaye mumanye abi, bwa kumanyaye Kilisto.

⁸³ Nèndekelè. . . nèmbalè umwe wa ku Mifundu eyi mwab’ewu, bwa nwènù—panwikala baswe kuwubala pamwe naanyi. Tubuululaayi mu Kolinto wa Kumpala, nshapita mwi2 ku mvensa 1, katanci kakese cyanaana. Nenu tubalaayi katanci kakese cyanaana mwab’ewu cidi Pòlò mwamba, mumanyi munene wa dibàla ewu, cyakambaye bwende yèyè mwine, cyàkakèngelà bwa kwenzaye. Kolinto wa Kumpala, nshapita mwi—mwi2 wa Kolinto wa Kumpala, nenu kubangila ku mvensa 1. Teelejaayi mumanyi wa dibàla ewu.

⁸⁴ Muntu ewu uvwa mulongeshiibwe. Ùvwa mwa kwakula pabwìpì ne mwakulu kana wònsò uvwaku pa buloba. Bivwa bikengela kuditambishaye bwa ciine aci. Ùvwa mukoleshiibwe mu kulonda kwa ntendelelu muumisha ncyoncyoncyo wa kasumbu kaa Bafaalesa awu, ne tatwèndè uvwa Mufaalesa. Paanyima wakalwa “Mufaalesa wa Bafaalesa,” nenu aci nciswe kwamba ne kakuyi mpatà to yèyè uvwa—yèyè uvwa wa ku Bafaalesa baa—baa maalu matambe kuumisha ncyoncyoncyo abu. Ùvwa muntu munene. Kabidi ùvwa ne bukookeshi, ne ùvwa ne meeji matwe.

⁸⁵ Tatwèndè uvwa mumukoleshile mu dilongesha dya mulongeshi mutambe bwímpè uvwaku mu ditunga, Gamaaliele, uvwa mu ciine cikondo aci mulongeshi mutambe kumanyika wa bilongelu kana byònsò. Pòlò wakalwa muntu wa mushindu awu. Ùvwa mulonge mwakulu ne mwakulu wònsò. Ùvwa mulonge maalu a mudi kusòmba. Ùvwa mulonge bintu

bishiileshiilangane byònsò bìdiku mu—mu... bivwà bikèngelà kulonga mu mushindu awu abi. Ne ùvwa mweyemene bikole taber—tabernacle wa baa—baakwidi ne mwine mu—muntu munene awu. Ne ùvwa uya eku ne eku bwa kunyangakaja Ekeleeziya.

⁸⁶ Teelejaayi yèyè muntu umwèumwè ewu, ne kalaasa kònsò kalonga aka, paanyima paa mumane kupeta Kilisto. Teelejaayi nūmvwè cyakambaye. Mushindu mwine uvwaye ne dikanda ne munene awu, byakakengela bwa kubipwaye mwoyi. Byakakengela bwa kufikaye ku dyumvwa ne kavwa mwa kwikala mudyèyèmène yèyè mwine to. Byakakengela bwa kufikaye ku dyumvwa ne kalaasa kaakalongaye aku kavwa cyanaana. Byakakengela bwa kufikaye ku dyumvwa, bwa ne dilongeshiibwa dyònsò dyakapetaye adi, bivwa bikengela bwa kupwaye mwoyi cyònsò ciwabo bamulongeshilebi aci. Muteelejaayaaku nūmvwè mpindyewu.

...mêmè, bânà beetu, pângàkafikà kunudi, . . . kî nne bulenga bwa muyiiki. . . wa lungenyi to, nwamonu's, bwa kunwambila bujaadiki bwa Nzambi.

“Kacya ncitu mulweku kunudi bwa kunwambila ne: ‘Mpindyewu, mêmè ewu ki Docteur Shawula wa mu Cilogelu cya *Kampanda*, ndi. . . mupatukile mu kasumbusumbu kanene kaa dingumba edi’ nansha. Kacya ncituku mulwe kunudi mushindu awu nansha.”

Bwalu ndi mupangadike bwa kubenga kumanya cintu kana cyònsò munkaci mwenu, pa kuumusha Yesu Kilisto, ne yèyè mene mupoopela pa nkuruse.

⁸⁷ Mwaba awu, teelejaayi bujaadiki bwa muntu wa nanku.

“Ndi mupangadike bwa kubenga kumanya cintu nansha cimwe cidi citangila makumbanyina enu. Ndi mumanye ne kakwena cintu nansha cimwe mu nwènù amu to nenku ndi mupangadike anu bwa kumanya cintu cimwepele cîndi mmona mu nwènù amu, ki Yesu Kilisto ne Yèyè mene mupoopela pa nkuruse. Musungidi mupoopela pa nkuruse munkaci mwenu, ki cyònsò cîngiikàlà mwa kujingulula.”

⁸⁸ Muteelejaayi.

Nenku mêmè mvwa neenu mu... (bunene anyi? Mu cinyi?). . . butekètè, ne mu diciina, ne... muzakalu mukole.

⁸⁹ Nudiku bafwanyine kudifwanyikijila muntu, Mufaalesa wa Bafaalesa, mulongeshi wa balongeshi, muntu wàkalongeshiibwa kacya ku bwànà (bwa mudimu wa bwambi) bwa kwikalaye muntu wa ngaakwilu wa kapelu uvwa ne meeji matwe ne meeji a njàjàmà, bwa kulwa kumpala kwa kasumbu kaa bantu bu mudi beena Kolinto kadi kwamba ne: “Mvwa neenu mu butekètè, ne mu diciina, ne mu muzakalu mukole” anyi? Muntu

uvwa utwisha buloba katungu, missionnaire mutambe bunene wa kacya baamanya, ùtonda ne ùvwa “mulwe mu butekètè,” kabiya bu mumanyi wa dibàla uvwa mulongeshiibwe to, kadi “mu butekètè, mu diciina,” bwa kalu kusambukila Kajila aku mwaba kampanda to. “Mu muzakalu mukole,” bwalu kavwa mwa kweyemena dikumbanyina dyende yèyè mwine to.

⁹⁰ Kabingila kavwa kenza ne ikale mu “diciina,” kabivwa ne mbwalu uvwa ne bwôwà bwa cintu kampanda to, kadi ùvwa ne bwôwà bwa ne nkwèpì kuvwaye mufwanyine kubiipila Nzambi mu mushindu kampanda, bwa kalu kubwejakajaMu dikumbanyina dyende yèyè mwine adi; cintu kampanda cyakalongaye, civwaye. . . Ùvwa ubambila ne: “Ncyakalwa kunudi ne bulenga bwa muyiiki ebu to (Ngâkalwa kunudi mu *diciina* dya ne nkwèpì kùndì mufwanyine kulwa mu mushindu awu), kadi ngâkalwa kunudi nciya mmanya cintu nansha cimwe to pa kuumusha Kilisto, ne Yèyè mene mupoopela pa nkuruse.”

*Nenku ngâkalwa kunudi mu diciina, ne mu butekètè,
ne mu muzakalu mukole.*

*Ne muyiiki wanyi ne diyishi dyanzi kabivwa ne mêyi
a akokangana ntema a lungenyi lwa bantu to, kadi mu
dileja patooke dya Nyuma ne . . . bukole.*

⁹¹ Teelejaayi muntu ewu uvwa mulwanganyi wa mvita uvwa mudivuule yèyè mwine awu. Amen! Piikalaku cintu cidi cikengela bilongelu byetu leelu ewu, piikalaku cintu cidi cikengela ekeleeziya yetu leelu ewu, ndividuula dya bôbô biine, dya meeji enu nwênù biine ne madikumbanyina enu nwênù biine. Divuulaayi nwênù biine kumpala kwa Nzambi bwa kanwikadi bafwanyine kuteeta bwa kudyenzeja cintu kampanda mu nwênù biine.

⁹² Ndi ntekemena ne nudi. . . aci cidi citubwela too ne mu ndondo, ne badi apa ne badi mu myaba yidibo bateeleja mukaba wa mêyi, bôbô paabo, bwa nufike ku dyumvwa ne bidi bikengela nulwe bintu cyanaana. Kî ncimanya-byôsò to, kî nkampanda wa munene to, kadi *muntu cyanaana*. Wikale. . . bikengela ulwe lupwishi. Bikengela ukafike pa kaaba kaa umanya ne udi cintu cyanaana. Nenku kubândikù kumutu kwa aci to, bwalu paudi anu ubànda kumutu kwa aci udi ubànda kumutu kwa Nzambi. Bikengela wèwè kudilama mu lupwishi ne mu njila wa ku Damaseke. Bikengela nudilame kanuyi babànde pa tubalu twenu tutumbuke atu to. Ne aci mbwa myaba yôsò, apa ne mu myaba yidibo bateeleja mikaba ya mêyi.

⁹³ “Muyiiki wanyi,” mwakambaye, “kawena. . . mu mêyi a akokangana ntema a bantu ne a lungenyi lwa bantu to, kadi mu dileja patooke dya Nyuma wa bukole.”

⁹⁴ Mpindyewu tangilaayi! “Mbwa cinyi, Pólò? Udi muswe kwenza nunku bwa cinyi?”

Bukole! *Bwa diitabuuja dyenu kadiikadi diimanyine mu lungenyi lwa bantu to, kadi mu bukole bwa Nzambi.*

⁹⁵ Kaa, ewu muyiishi's we! Muntu munene ewu uvwa . . . Ûvwa ùkèba Nzambi, wamba ne: "Nzambi, ndi ne butekètè ne ncyèna—ncyèna mumanye cya dyenza to. Ndi anu nKulomba, Nzambi, bwa umpe dikanda ne ungumushe mateketa, ne bintu ebi, bwa ntambe kwikala ne dikanda."

⁹⁶ Nzambi kumwandamuna, kwamba ne: "Pòlò, bukole Bwanyi budi buvwijiibwa bupwangane mu butekètè bwebe."

⁹⁷ Ki Pòlò kwamba ne: "Pândi mutekete ki pândi ne dikanda. Eyowa's!" Yèyè ne: "Nenku. . . Nènditumbishilè mu mateketa a butekètè bwanyi ne bikwabo. Ndi nsakidila Nzambi mûndi mupatule byònsò abi mu mêmè. Nenku pândi mpatula byònsò mu mêmè, pa dîbà adi Nzambi udi mwa kubwela. Kadi pâncidi anu ne ndambu wa mêmè mwine muntwamu, pa dîbà adi Nzambi kêna mwa kubwela to."

⁹⁸ Mwaba awu, ki bwalu abu's, tudi—tudi tuMupangisha mwa kweyela. Tudi tuMusaka kule ne yetu . . . Kuumukila anu ku udi mutambe kulandika wa kutudi too ne ku udi mutambe kubanjika wa kutudi, kuumukila ku udi mutambe bukesa too ne ku udi mutambe bunene, tudi tupangisha Nzambi bwa kubwela mu nsòmbelu yetu bwa bwalu bwa buutwètù biine.

⁹⁹ Misangu yàbùngì ntu anu ngâmbamba ne: "Mwena lukuna mutambe bunene ûndi nende ng'William Branham." Yèyè ngutu ucyamakana Nzambi mu njila. Yèyè ngutu ulwa mwena lulengu. Yèyè ngutu misangu mikwabo ufika pa kaaba kaa ùdyèlela mееji mudiye mwa kwenza cintu kampanda pa bwalu abu, nenku, padiye wenza nanku, aci cidì ciipata buludi Nzambi mu cyalu. Kadi pândi mwa kulekela muntu awu, pândi mwa kufika pa kaaba kaa yèyè usanganyiibwa pambelu paa njila, pa dîbà adi Nzambi udi mwa kulwa kadi kwenza bintu bidi William Branham kayi mumanye ne bidi bishi to.

¹⁰⁰ Mpa dîbà adi padi Nzambi mwa kukwata neebe mudimu. Mpa dîbà adi padiYe mwa kukwata mudimu ne yònsò wa kunudi. Yèyè udi mwa kukwata mudimu ne muntu kana yònsò patudi tuumuka mu njila. Kadi patucidi anu baditeeke twètù biine mu njila, pa dîbà adi katwena tukumbana to. Eyo.

¹⁰¹ Mpindyewu tudi tusangana ne, mulumyana munene ewu, Pòlò, ùvwa—ùvwa mwànà wa mfumu munkaci mwa bayiishi. Ûvwa muneemekiiibwe kudi dingumba ne dingumba dyònsò. Muntu awu uvwa mwa kuya mu cimenga kampanda ne kwenza disangisha mwaba kana wònsò. Bwa cinyi? Ûvwa ne mikanda ya dijaadikiibwa naayi. Mona's, yèyè uvwa munene menemene, ne mupangadike menemene bwa kuvingutula bantu bònsò bavwa baa butekètè abu, mu mushindu wa ne wakapeta bukookeshi kudi mwakwidi munene, bukookeshi bunene bwa kumutu menemene, bwa kuswika yònsò wa ku beena Kilisto abu. Bukole

bwa cidiidi bwa kudi ekeleeziya wende, bwa kubaswika bônso! Kaa, yêyè's uvwa ne dikanda! Úvwa mwa kuswika beena Kilisto kadi kubeela mu buloko bwalu kabavwa baswe kupetangana nende pa malongesha ende a teoloji to, pa malongesha a Bafaalesa ne Basadoka. Úvwa wenda uswika beena Kilisto.

¹⁰² Kadi, tangilaayi, byakakengela alwe muswikiibwe, yêyè mwine, bwa wamona mwa kujimija aci, wamona mwa kujimija dikanda dyende ne bukookeshi bwende. Kulwaye muswikiibwe, yêyè mwine, bwa kujimijaye ciine civwa cimupa bukole bwa kuswikangana naaci aci. Byakakengela bwa kujimijaye civwaye aci, bwa kumonaye mwa kwikala muswikiibwe.

¹⁰³ Nzambi utu upita bantu banene baa luumu! Wakapita baakwidi. Wakapita bavwa beena dyambu abu. Nenu Yêyè kusungula Pólò, muntu munene ewu, kumushindishaye mu lupwishi lwa buloba ne kumwenzeja bintu bivwaye. . . muvwa bakwabo abu benza. Yêyè kubenzeja maalu mu. . . kumwenzeja maalu mushindu umweumwe uvwa bavwaye wenda ukwata abu benza's. KuswikaYe Pólò ku Nyuma wa Nzambi, bwa kumusuilula ku bukole buvwaye naabu bwa kuswika naabu beena Kilisto abu. Ngambilaayaaku tũng mudi Nzambi kayi mumanye cidiYe wenza? KumuumushaYe dikanda dyende bwa wamona mwa kumusuilula ku dyende—dyende dikwata adi.

¹⁰⁴ Mbambi bũngì kaayi badi Nzambi mufwanyine kukwataku naabo mudimu mu dinda emu bu bôbò anu mwa kulekela Nzambi ubaswika ne Dîyì Dyende ne bukole Bwende, ne ubasuulula ku dikanda dya mangumba ne malongolodi awu! Mbantu bũngì kaayi baa meeji matooke mu cimenga emu, mu dinda emu, badi baya mu ekeleeziya ya malongolodi manene eyi, mbũngì kaayi badiYe mufwanyineku kuuja tente ne Nyuma Mwîmpè, ne kushiya ditunga edi dilakuka kapya kaa Evanjeeliyo ne bukole, bu bôbò anu mwa kwangata ne kudisuulula ku bukole budibo naabu ne kulwabo baswikiibwe kudi Nyuma, bwa kwikalabo mwakadi Pólò amu, mupika wa dinanga kudi Nzambi!

¹⁰⁵ Nzambi wakangata Pólò e kumuvwija mupika, kumuswikila kudiYe ne kumutuma kudi baa Bisamba bya bende bavwaye mukine abu. Kadi, nudi numona, byakakengela asuuludiibwe ku bukole bwende bwa ntendeleelu abu, bwa kwikalaye muswikiibwe ku bukole bwa Nzambi. Byakakengela ajimije dikanda dyende bwa kulwaye mutekete ne cintu cyanaana, bwa kupetaye dikanda dya Nzambi, bwa kwikalaye muswikiibwe kudi Nzambi, bwa kwenzaye civwa Nzambi mwa kumwambila bwa kwenza.

¹⁰⁶ Ki cidi cikengela twètù kwenza leelu ewu. Ki cidi cinkengela mêmè ewu. Ki cidi cikengela muntu yônso ewu, ndidijimija dya yêyè mwine, dijimija dya dikumbanyina dyende, dijimija dya cidiye, bwa amone mwa kupeta didilekelela mu kaabujima kudi

Nyuma Mwîmpè. Ki cidi cikengela mukaji wa nzubu. Ki cidi cikengela nsongaalume mulongi wa kalaasa. Tudi twangata... nansha bânà beetu balela baa batekete.

¹⁰⁷ Mwânà wa balume kampanda mutekete ûndi mvuluka, makeelela mu mapingaja anyi makeelela mushaale wawa, anyi dituku kampanda, ùvwa mubwele e kulombaye yàyëndè bwa kumufundilaye dileesona lukasalukasa, kupatuka kwambila nsongaalume mitekete, ne: “Yoyöyò! Nshinga ayi’s yivwa mipepele be.” Nwamonu’s, mbalongeshiibwe, bu nanku, bwa kwikala kwibila.

¹⁰⁸ Mushindu mwine udibi bifwanyine kwikala bitambe bwîmpè... Ne biine bantu abu’s mmakunji mu ekeleeziya. Mushindu mwine udibi bifwanyine kwikala bitambe bwîmpè bwa Papa, mu dinda kampanda pa dîbà dya didya dya mu dinda, wamba ne: “John neikale ne diteeta leelu ewu. Éyì Nzambi, ikalaku ne John! Kwacishaku John! Mmundombe mu nzubu wa bulaalu mu dinda emu, wamba ne: ‘Papa, unsambidileku leelu ewu, nebikengele mêmè kwenza diteeta dyanyi. Nsambidileku.”

¹⁰⁹ Mbipiciibwe ne mwanaanyi wa balume mupete “M” wa—wa mwîmpè, wa kaneemu mu cilètè cyende, mubule, pamutu paa mêmè kumanya ne mmupete “TB” wa buludi cibì mwikale mwibile mu cyôci aci. Eyowa’s, mukalenge! Cidi citukengela nkudijimija twètù biine, kweyemena mu kaabujima bukole bwa Nzambi.

¹¹⁰ Mpindyewu, “muswikiibwe.” Nzambi upita bantu banene baa luumu ne wangata butekètè. Nzambi upita aba badi badyelela meeji mudibo cintu kampanda, bwa kwangata muntu kampanda udi kayi mumanye cintu bwa kwenza ne kiipacila Kende kakwate mudimu mu nsòmbelu wende. Ki citudi tupeta ncyaci.

¹¹¹ Nzambi kwambilaye Pòlò ne: “Dikanda Dyanyi ndipwangane mu butekètè bwebe. Dikanda Dyanyi—Dyanyi didi dilwa ditambe kupwangana paudi wêwè utamba kulwa ne butekètè. Paudi mwa kutamba kudilekelela kûndi Mêmè ki pândi Mêmè mwa kutamba kukwata neebe mudimu bîmpè. Paudi mwa kutamba kupwa mwoyi tulaasa twebe tulonga atu, paudi mwa kutamba kupwa mwoyi dingumba dyebe adi, paudi mwa kutamba kupwa mwoyi bintu byebe abi ne kudilekelela kûndi Mêmè, ki pândi Mêmè mwa kutamba kukwata neebe mudimu. Bwalu udi ulwa ne butekètè, Mêmè—Mêmè nêmvwijè kiipacila Kaanyi Mêmè mwine ne dikanda.”

¹¹² Nzambi udi mwa kuvwija butekètè kulwabu dikanda! Ki bwa cinyi Yèyè utu ucyenza misangu yònsò. PaakasungulaYe bayiidi Bende, nganyi uvwaku mufwanyine kwela meeji ne... .

¹¹³ Didipwekesha dya Mwan’Ende Yèyè Mwine paakalediibwaYe mu cidiilu cya nyama apu, mu cikumbi cyûle ne tûmvì twa nyama, mu cikumbi cya ngombe, ne mwikale

mujingila mu mikusu! Nwamonu's, Yèyè nunku's mmulwile ku nzubu wa bukalenge. Yèyè nunku's mmulwe utuulukila mu tujila twa mu Dyulu, ne bônso... musumba mujima wa Banjelo bakosa mpala. Kadi Yèyè wakasungula bwa kuvwija Kilisto cileejilu cyetu, bwetu twètù, ki Yèyè kuMutwala mu didipwekesha.

¹¹⁴ Yèyè kaakaMulongeshishaku mu bilongelu bya pa buloba ebu to, kadi Yèyè wakaMulongesha ku bukole Bwende Yèyè mwine, bwa...bwa kumonaYe mwa kuDilekelela mu kaabujima, kabiyi ku meeji a bantu anyi ku dikanda dya baa pa buloba to, kadi kuDilekelela ku bukole bwa Nzambi.

¹¹⁵ Nenu ki citudi twètù leelu ewu, tudi tudilekelela leelu ewu ku mangumba manene ne makalenge etu. Tudi tudilekelela ku dingumba, ku cidi dyôdi adi ne cya kwamba, cidi bôbô bamba pa bwalu abu. Kadi aci ncibengangane ne diswa dya Nzambi. Bidi bikengela tudilekelele kudi Nyuma wa Nzambi ne tuye kudi Nyuma wamba bwa kuya aku. Ncya bushuwa.

¹¹⁶ Beena Ebelu baa Nzambi batudi...Masalaayi a Nzambi's we, eyo, "bilobo." Twafumu ku dibala mu Mukanda wa Ebelu, nshapita wa 11 ku mvensa wa 34.

... mu matekètè baakalvwijibwa baa dikanda, ...

¹¹⁷ Byakakengela kulwabo baa butekètè kumpala kwa kulwabo baa dikanda. Mu butekètè bwabo baakavwijibwa baa dikanda. Nwênù badi bafunda Mifundu abu, nwênù bàdi aku abu, Ebelu 11.34. Eyo.

¹¹⁸ Cintu cidi mwa kutusamba ncyôci eci. Cintu cidi cikoleshà ku mwoyi ncyôci eci. Mu butekètè ne didipwekesha ki mudi Nzambi usungula bantu bwa kwibaka naabo Bukalenge Bwende. Bu twètù mwa kufikaku mu Dyulu, bu twètù mwa kwimanaku mu Bwikadi bwa Nzambi pamwe ne Ekeleeziya Wende, netwikale biimane mu musumba wa bantu bavwa biikale baa butekètè ne babengiibwe ne beedibwe pambelu kudi baa pa buloba, ne badi kabayi ne cintu nansha cimwe cidibo bamanye to.

¹¹⁹ Kabyena bikemeshaku mudi Nzambi mutufwanyikije ne mikooko anyi? Mukooko ncintu cidi citambe kwikala kacyi mwa kudikuba cidiku. Kakutu cintu cidi ne didilama kadiyi dikumbane kupita mukooko to. Kâlulù kadi mwa kunyeema kuya; nshindi udi mwa kubànda ku mucu; mbwa udi mwa kusumangana; ntambwe udi mwa kusunsululangana; kbalu kadi mwa kutwangana bikono; nyuunyi udi mwa kubuuka kuya; kadi mukooko udi wôwò ushaala mwinane kawuyi mwa kudikuba to.

¹²⁰ Nenu mushindu awu ngudi Nzambi muswe bwa twètù kwikala. Kufika ku dyumvwa ne tudi anu menemene katuyi bakumbane to, pa dibà adi Nzambi udi wangata muntu awu ne ubanga kuDifwimba mu muntu awu; ufikisha byanza byende

ku dyenza cidi Nzambi muswe bwa byanza kwenzabi, ufikisha mishiku yende ku dyamba cidi mishiku ya Nzambi mifwanyine kwamba; bwalu kî nyende yêyè to, nya Nzambi. Yêyè udi ubanga kwibaka ngiikadilu kampanda, ùbanga kwangata butekètè ebu ubuvwija Bwende Yêyè mwine.

¹²¹ Yêyè udi utufikisha pa buloba apa, bwa pa dîbà adi . . . Tudi balonge tulaasa, tudi ne meeji matwe. Nukaavwaku bamone dilondangana, ndelanganyi anyi? Patudi twangata, cileejilu, bu mudi mu Abele, ku Abele nkupatukile Sete; ndelanganyi ya Sete kulondanganayi, anu nanku too ne ku cikondo cya Noa, bwônso bwabo bavwa anu baabidime baa kupwekele. Kadi bâna baa Kaayina bôbò baakalwa baa meeji matwe, beena budimu, balonge tulaasa, bantu banene, biibaki, bantu baa dimanya dya midimu ya byanza.

¹²² Kadi baa luseke lwa Nzambi bavwa baa butekètè ne didipwekesha. Mushindu awu nguvwa Nzambi ukwata naabo mudimu. Ki mpunga utu Nzambi ubwelela. Ki mushindu utu naawu Nzambi bwa kufika kutudi, mpatudi ne butekètè. Pa dîbà adi mpatudi tupeta cintu kampanda. Eci cidi cikoleshaku ku mwoyi, mu bushuwa bwa bwalu, bwalu Bukalenge bwa Nzambi mu kaabujima mbwibaka ne bantu baa mushindu awu. Pa dîbà adi paudi ukafika mu ngiikadilu wa mushindu awu mpa dîbà adi paudi—paudi mwa . . . paudi mu Bukalenge Bwende.

¹²³ Bwalu budi ne, kutudi twêtù, ne . . . kî nne tudi ne butekètè bupitepite to, bwalu budi ne twêtù tudi ne bukole bupitepite bûngi. Tudi—tudi—tudi anu ne bukole bupitepite bûngi. Kwajiki. Cintu cidiku ncyà ne tudi ne mutu mupitepite bukole. Ncyà bushuwa, tudi ne bukole bupitepite bûngi mu mitu yetu. Tudi bamanye bipitepite bûngi. Nzambi mmuswe kupatula aci mu twêtù. Ncyà bushuwa. Tudi ne dikanda dipitepite bûngi, tudi ne dikanda dipitepite bûngi bwa kudilekelela kudiYe. Tudi ne . . . Tudi—tudi tudilekelela kutudi twêtù biine. Bikengela twikale tudyambidila ne: “Ee, mpindyewu, mwab’ewu, ndi—ndi ne cyumvwilu cikumbane bwa kumanya’s!”

¹²⁴ Mvwa mukeme bikole kukaadi ndambu wa matuku pavwa maman usaama, mu lupitaadi mwamwa. Mêmè kuya ku . . . Kuvwa inâbànzà kampanda mutekete ku mushiku uvwa mulondele . . . Piikala inâbànzà mutekete awu mwab’ewu, umfwileku luse, mwaneetu wa bakaji. Nnsongaakaji mutekete wa ku Kentucky mufumine kwine aku, nenku tuvwa . . . nenku yêyè awu uvwa mmâmwenèndè. Nenku mvwa nyiikilangana nende bufuku abu, mukajaanyi ne mêmè, tukaavwa twipacila dîbà umwe wa bufuku. Nenku bayende uvwa mudyädije panshi muye ne mu tulu; nsongaakaji awu kwambaye ne: “Patuka mwab’ewu! Kwêna dikwacisha nansha dikese kudi mamwêbè to, twamb’eku twamb’eku.” Ki kumwipataye pambelu, bayende’s, pambelu paa cibambalu aci, bwalu uvwa mudyädije mucyamakane mu mushiku wa mbelu mu mushindu

wa baaminganga bakaji, nansha nganyi kayiku ne mushindu wa kubwela to; mwikale wonona anu byono's, panshi piine apu. Ki kumujuulaye e kumwipata kuyaye pambelu.

¹²⁵ Ki kubangaye kuyiikila mwaba awu. Mêmè kubanga kwakula nende pa bidi bitangila Mukalenge, ne bikwabo. Ki yêyè ne: "Ee," yêyè ne, "cyanyi paanyi cyônsò cîntù mumanye cidi anu lukasu lwa mushishi mu kaabudimi kaa mfwanka, dinda bwebwebwe, kukosa bisoosa ne kwipila mfwanka, ne bikwabo bya mushindu awu." Yêyè ne: "Kadi, ndi nkwabwila," yêyè ne, "papa wakatutuma, muntu ne muntu, mu kalaasa." Ki yêyè ne: "Katwena anu banji kupeta cyumvwidu to."

Mêmè kudyambidila ne: "Ee, pâmwăpa ki bwalu kaayi's."

¹²⁶ Nwamonu's, bikengela wêwè—wêwè kuumusha maalu a pa buloba kûdi. Mpindyewu, ncyêna ntwa dipanga nyama ku mikolo to, kî—kî ng'aci to, kadi ndi nteeta kwela meeji paudi ukafika pa kaaba kaa wela meeji mu mushindu wa ne anu wêwè—anu wêwè ngudi mumanye byâbûngî mu mushindu wa muntu mukwabo nansha umwe kayiku yêyè mumanye cintu pa bwalu abu to. Dimanya dyebe ndimpè padidi kadiyi—kadiyi dipangisha milayi ya Nzambi to.

¹²⁷ Tudi tukontononyiibwa kudi byumvwilu bitaanu, ne biine byumvwilu bitaanu abi (lumono, lulabulu, lulengu, lununku, ne lumvu) mbîmpè menemene padibi kabiyi bikacyamakana cyumvwilu cya Diitabuuja to. Pashiishe pakaadibi bibengangana ne Diitabuuja...Kadi udi umanya munyi ne ncyèpi cidi cîmpè? Bwalu Diitabuuja dyôdi nediikale misangu yônsò anu mu dipetangana ne Dîyi. Nenu pa dîbà adi piikala—piikala diitabuuja dyebe dibengangana ne Dîyi, anyi wêwè udyambidila ne bidi nanku, pa dîbà adi kwèna ne Diitabuuja nansha. Udi naadi dya budîngîbudîngî. Udi ne maditambishi mu byumvwilu byebe abi, a dilonga kampanda dyûdi mulonge, anyi cintu kampanda. Kadi paudi uya kule ne cyôci aci bwa kweyemena anu Diitabuuja mu kaabujima, paadi Diitabuuja didi mwa kwibakiibwa anu pa Dîyi dya Nzambi (Diitabuuja dya dijaalame adi).

¹²⁸ Ngangabuka mukwabo wakangambila mûngà musangu, ne: "Mêmè ndi ngiitabuuja, Billy, ne piikala bantu abu. . . bu wêwè mwa kubambila bwa kupatukabo kwaka ne kulenga dikunji dyadya, mucu wawa, paabo biitabuuja ne nebûmvwè bîmpè, s'mbafwanyine anu kuumvwa bîmpè mushindu umweumwe awu."

¹²⁹ Mêmè ne: "To, mukalenge. Kacyena mwa kwenzeka to, ngangabuka, bwa cintu cimwepele eci, wamonu's, bantu abu mbamanye ne aci cidi anu ndikunji. Mbamanye ne kakwena bukole anyi dikanda kampanda mu dikunji adi to."

¹³⁰ Kadi muntu kana yônsò wa mutu mujaalame ewu mmufwanyine kumanya ne n'Dîyi dya Nzambi udi ne mwoyi,

ne mêmè ndi mwa kujaadikilapu diitabuuja dyanyi ne kumanya ne Cidi EMU MMUDI MUKALENGE WAMBA! Kadi cintu kampana cyôcì ciikale cibengangana ne Aci, pa dîbà adi ncyèna ngiitabuuja byumvwilu byanyi abi to. To, mukalenge, lekela aci anu mudici amu. Londa cyumvwilu cyebe cikwabo aci, cyumvwilu cya Diitabuuja.

¹³¹ Eyo, Nzambi utu wangata bôbò bantu abu bwa kwenza. . . Padibo bantu cyanaana, nebadilekelele kudiYe.

¹³² D. L. Moody wa mu Chicago, uvwa wa mu Boston, uvwa mulongolwedyanganyi wa bisabaata; kaamuntu kaa katupa, kakese, kakayi kakumbane to, kayi udyeyemena yèyè mwine to. Mpindyewu, angataayi bilongelu binene bidibo naabi ebi, Cilongelu cya Moody kuntu kwaka, bu Dwight Moody mwa kujuuka ku bafwe kadi kumona cilongelu aci, cintu cya kumpala cidi Dwight Moody mufwanyine kwenza s'nkuumusha ciine cilongelu aci.

¹³³ Bu Martin Luther mwa kujuuka ku bafwe, cintu cya kumpala cidiye mufwanyine kwenza s'nkuumusha bulongolodi bwa ba-Luthériens abu. John Wesley mmufwanyine kwenza cintu cimwecimwe aci. Bantu abu kabaakaasaku malongolodi awu nansha, mbantu baakabalonda bôbò, ki bààkacyènzà.

¹³⁴ Pôlò kaakavwijaku ekeleeziya nansha umwe bulongolodi to, bwalu wakamba, yèyè mwine ne: “Paanyima paa diya dyanyi, bantu baa mu misumba yenu nwènu biine nebajuuke munkaci mwenu, biikale baakula bintu bya kanyawu.” Mpaanyima paa lufu lwa Pôlò, bidimu lukama (anyi nkama ibidi) paanyima paa ciine aci, paakenzabo ekeleeziya wa Katolike, bulongolodi bwa kumpala.

¹³⁵ Bantu baakajuuka! Mpaanyima paa lufu lwa Moody paakenzabo Cilongelu cya Moody aci; paanyima paa lufu lwa Wesley mpaakenzabo ekeleeziya wa Wesley; paanyima paa lufu lwa Luther mpaakenzabo ekeleeziya wa Luther. Nzambi utu utuma bilobo; nenku badi biibaka. . .

¹³⁶ Kabyena bikemesha to paakamba Yesu ne: “Bimanu bilaaba lupemba naanyi nwe—nwe!” Yèyè ne: “Nudi—nudi nulengeja nkita ya baprofeta, nwènu's mbààkabèlâmu!” S'ncyà bushuwa.

¹³⁷ Bantu banene aba baakajuuka; pashiishe kubiibakilabo bibumba bya bivulukilu. Ndi ngeela meeji, anu bu Davidi, “Wakasadila Nzambi bîmpè mu lukongo lwende.” Nenku ki mushindu wa kucyenza ngwôwô awu. Lekelaayi malongolodi ne bikwabo abi anu mwaba awu, bidì bishààla kule neenu abi.

¹³⁸ Moody, kalongolodi kaa bisabaata kaa kale, uvwa ne butekètè. Yèyè uvwa cileejiyu cya butekètè. Cintu cya kumpala cidibo bàmba ne Moody wakenza. . . Kavwa ne kalaasa kiine kavwaye mulonge to, ne wende mwakulu mwine uvwa mushaadile bikole mwenze ne bwôwà. Muntu kampana kulwaye kudiye musangu mukwabo e kwamba ne: “Mukalenge

Moody,” wamba ne, “webe mwakulu kadi ki wa mutambe kushaadila wũnkaadiku muumvwe wa kacya bandela.”

139 Yèyè ne: “Mémè mwine nyewu mpetaku misuuka ku dipanga dyanyi diine adi, kadi wèwè cyùdì wenza ne dimanya dyebe adi ncinyi?” Ngeela meeji ne adi divwa dyandamuna dilenga. Cya bushuwa’s!

140 Nunku mpindyewu, paudi ulwa cidimba cya ciine Cilongelu aci, bikengela bushuwa wikale mumanyi wa dibàla wa kapelu. Neya bushuwa. [Mwaneetu mukwabo udi wamba ne: “Bǎfùmu ku dicikudimuna!”—Muf.] Mpindyewu, eyo, “bǎcìkùdimunu” ki bulelela, baalukile cyanyima batangile luseke lukwabo.

141 Aci’s nciidi bantu benza. Pámvwà ngamba ku ntwadijilu kwa diyiisha dyanyi. . . Pamutu paa beena Kilisto kudipwekeshabo ne kudishiyabo munda mutupu bwa kupeta mwaba wàbùngì bwa Nzambi, badi bôbò bakeba kudiibaka mu dimanya dya dikwatakajila ku mbanza yabo, anyi dimanya kampanda dya mu tulaasa twa tekenika, anyi cintu kampanda, cidi cibàsàka kule memene ne Nzambi kupita paakabangabo.

142 Ki cìntù ndyambidila bwa mabiikila a ku cyoshelu adibo bakwatakaja aa. Umubwejamu, kadi musangu udi ulonda bidi bilwa bikole misangu dikumi bwa kumupingaja cyakabidi. Mulekele ashaale musòmbe uteeleja too ne paamwenzela Nzambi cintu kampanda! Nunku pashiishe mulekele alwe acijikule, kadi ajuuke, mwikale usoka Dìnà dya Mukalenge. Neya bushuwa.

143 Monaayi Moody, ne butekètè mu tulaasa tulonga, ne butekètè mu dyakula, mwikale unungeena mu dyùlu. Mvwa mbala bwalu bulonda bwende dituku dikwabo ne: “Ûvwa unungeena mu dyùlu, disaama dya mu dyùlu.” Mwikale mukese bwa mubidi, muntu wa dibàla, ne mvedi cipamba ku. . . ?. . . ; kaamuntu kakesee, kancii, kaa katupa. Bwa mubidi, anu bu cibalakata. Nunku yèyè civwaye naaci kacivwa cìngà cintu to anu butekètè kacya anu bwangatangana. Kadi Nzambi wakakwata nende mudimu bwa kunyungisha buloba bujima mu dituku dyende!

144 Musangu kampanda kuvwa kamona-kamba mukwabo muye mu disangisha dyende (abi mbímvwà mbala’s), ne baakamona-kamba, bwa kufila mulubu pa ne mwine ewu uvwa muntu wa mushindu kaayi (muntu munene, mulumyana munene).

145 Mbota mukese unutu nwimanyika nende mikaba ya mêyi ewu udi penyi? Ng’ewu anyi? Nebikengele mémè kumukwacila mwaba awu.

146 Mu—muntu munene, ki civwa Moody. Ûvwa muntu mwîmpè maaluu. Pa nanku ùvwa mwa kukoka ntema ya bantu, kubalama bashaala bu bakwacike ku nzembu. Pa nanku kuvwa kamona-kamba kampanda wákaya kudi Moody ne kwambaye ne. . .

kuyaye mu disangisha bwa kwenza mulubu pa ne mwine ewu uvwa muntu munene mwibakiibwe wa mushindu kaayi. . .

¹⁴⁷ Mùvwà kàmòna-kàmba muye bwa kwenzaye mulubu pa bivwa bitangila mutangadiki mukwabo munene, matuku mashaale aa, kwambaye ne: “Muntu awu mmwakudi wa ngaakwilu wa kapelu. N’Docteur mu Bunzambi. Ùdi ne mwakulu mutambe bulenga wa kacya paanyi ngúmŵwa. Ùdi ulama bantu mu dilonga dyende dya nsòmbelu amu. Ùdi mwa kulama bantu bashaala bu bakwacike ku nzembu.”

¹⁴⁸ “Dwight Moody,” paakaya kamona-kamba awu, yêyè ne, “Mémè ncyèna mmona cidi mu yêyè cidi cikoka ntema ya muntu weto ewu to.” Yêyè ne: “Cintu cya kumpala, wa bwalu mmubi wa nkotooto mwenze ne eyo. Cintu ciibidi, mubidi wende ncibalakata. Cintu cidi cilonda” wakamba ne “ùdi, kí mmulonge nanshà kalaasa to. Wende mwakulu ngwa mutambe kushaqdila wa kacya mémè ewu ngúmŵwakù paanyi!” Ki yêyè ne: “Ùdi wakwila mu dyùlu ne mweyelu wende udi wenza mutooyi padiye uyiisha.” Ki yêyè ne: “Ncyèna mmona cintu nansha cimwe mu Dwight Moody cidi mwa kukoka ntema ya muntu wetu ewu to.”

¹⁴⁹ Kutwadilabo Mukalenge Moody kaabwalu aku. Kukabalaye, kwenzaye bu udi udisekela mu yêyè, e kwambaye ne: “Bulelela kacýenamù to; n’Nzambi. Bushuwa! Bantu kabeena balwa bwa kumona Dwight Moody to, badi balwa bwa kumona Nzambi.”

¹⁵⁰ Bantu bôbò kabeena bacyuka búngì bwa majaadiki audi ufila awu to, mbaswe kumona bulelela budi mu nsòmbelu webe budi bujaadika ne Nzambi udi neebe mu cyanza. Nansha wêwè mwikale Méthodiste, Baptiste, mwena Mpenta, cyònsò cyùdi mwa kwikala aci, bôbò mbaswe kumona Nzambi. Ncyà bushuwa, bantu baa. . . bantu banene, bantu baa butekètè ne biikale bafika ku dimanya butekètè bwabo abu.

¹⁵¹ Tangilaayi numone Mòsà, nsongaalume wa mamanya a mu mutu awu. Kaa, yêyè’s uvwa mumanyi wa dibàla. Ùvwa mulongeshiibwe mu lungenyi lwònsò lwa beena Ejipitu mu mushindu wa mufwanyine kulongesha beena Ebelu. Ùvwa mwa kulongesha beena Ejipitu. Ùvwa mwa kulongesha ní nganyi ní nganyi yònsò, bwalu Mòsà uvwa muntu munene, mulumyana wa meeji matwe. Kaa, ùvwa muntu wa bukole.

¹⁵² Mu mmwenenu wa cyôci aci wa Cecil DeMille, dibà—dibà dyakenzejaye dinaya dya *Mikenji Dikumi*, ne kulombaye bwa muntu ewu alwe wa bwena. . . Nyewu ngápù mwoyi dínà dya mwine muntu uvwa munaye mwaba wa Mòsà mwine muntwamu awu, munayi kampana, kadi muntu munene muleemule wa kafyondo ne maboko manene ne dikanda. Nenku pámwápa Mòsà uvwa muntu wa mushindu awu’s.

¹⁵³ Tudi bamanye ne ùvwa ne dikanda ne mulongeshiibwe bimpè, nenku wákadyàngacila bwalu abu mu byanza, mumone dijinga dya dituku adi. (Kaa, Nzambi ènzèku bwa bwalu ebu

bupweke too ne mu ndondo's we!) Paakamonaye dijinga dya dituku adi, Mòsà ne makole ende a mamanya a mu mutu awu ne dikumbanyina divwaye naadi bwa kucyenza naadi. . . Ùvwa muntu wa meeji matwe. Yèyè nguwwa ushaala Pâlò uvwa ulonda. Ùvwa ne dilonga dya nsòmbelu. Ùvwa ne—ùvwa ne bukole. Ùvwa ne dikanda dya mubidi. Ùvwa ne—ùvwa ne byònsò. Ki kwambaye ne: “Ndi mudipaye mu byònsò. Ndi mumanye byònsò abi. Ne kwòkò kwikale muntu mu ditunga emu udi mwa kucyenza, s'mmèmè. Pa nanku, mèmè ki muntu wa dībà edi nanku ndi mpatuka.” Ki kupatukaye bwa kuya kakumbaja mudimu uvwa mujaalame ne mu diswa dya Nzambi, kadi kufilaye makumbanyina ende a mubidi. Kadi Nzambi kucibengaye! Yèyè kavwaku mwa kukwata mudimu ne cintu nansha cimwe civwa naaci Mòsà to.

154 Kavwa mwa kukwata naaci mudimu pa dībà adi to, anyi mene Yèyè. . . nansha mpindyewu Yèyè kèna mwa kukwata naaci mudimu to. Nzambi kèna mwa kukwata mudimu ne makumbanyina etu a mubidi to. Bidi bikengela twètù kudyumusha mu njila twètù biine ne makumbanyina etu, ne kudilekelela ku diswa ne bukole bwa Nzambi.

155 Wèwè udi wamba ne: “Ee, mwaneetu, mèmè's ndi mwa kuyiisha.” Yèyè kèna mwa kukwata mudimu ne aci to paudi *wèwè* mwa kuyiisha. “S'mmwòmò, mèmè's ndi mwa kwenza *cikampanda*, ndi mwa kwenza *cikansanga*.” Kwèna wèwè ne cyùdi mwa kwenza nansha cimwe to. Ee, pa dībà adi Nzambi kèna mwa kukwata naaci mudimu to. Kadi bu wèwè mwa kudilekelela kudi Nzambi ne kuMulekela Yèyè ucyenza!

156 Wèwè udi wamba ne: “Ee, Mwaneetu Branham, mèmè's ndi mumanye. S'ndi mulongeshi.” Ee, bu mudibi ne *wèwè ke* mulongeshi mwine, mona's, Yèyè kaakuyaku kule menemene to. Kadi Nyuma Mwîmpè ke wetu Mulongeshi. Cya bushuwa, n'Yèyè! Nzambi mmutume Nyuma Mwîmpè bwa kwikala Ndeji kumutu kwa Ekeleeziya.

157 Bamwe bantu bayaaya mu tulaasa benza bidimu ne bidimu ne bidimu. Cidibo benza ncinyi? Babala maalu a mu Cibambalu cya Kuulu, nenku (kaa, aci's ncîmpè) nwananga dileesona dya kalaasa kaa Dyalumingu kaa Ditunga. Ncyèna cilumbu ne ciine aci to. M'Méyi a Nzambi, ne bikwabo, kadi mmasambakaja ne mamanya a mu mitu! Bidi bikengela bilwe ku bukole ne dibiika dya Kilisto, ne kanwena mwa kweyemena makumbanyina enu a mubidi nansha.

158 Pa nanku, Mòsà, nsongaalume wa citende ewu, muntu wa mpolondo wa dikanda ne maalu mîmpè, muntu wa mamanya a mu mutu ewu, ki kupatukaye bwa kwenza mudimu mwîmpè; kadi Nzambi mu bupwekele bwònsò, kakuyi mpatà to kavwa mwa kukwataku naabi mudimu to. Kavwaku mwa kukwata mudimu ne makumbanyina ende a mubidi awu to.

¹⁵⁹ Ne twètù katwenaku mwa...Kî ndeelu ewu to, utudi katuyi mwa...Nzambi kêna mwa kukwataku mudimu ne makumbanyina etu a mubidi to.

¹⁶⁰ Kadi kudi cintu cimwepele civwa naaci Môsà cîndiku mêmè nkacila, ùvwa ne cyumvwidi cikumbane bwa kumanya ne ùvwa mucimunyiibwe. Twètù katwena naaci to. Kwajiki. “Netwènzè dingumba *dipyadipy*. Netwangate muntu mukwabo udi ne dipà dya dyondopa, anyi cintu kampana,” beena Mpenta’s, nwamonu. Nwamonu anyi? Twètù—twètù katwena anu bamanye bikumbane bwa kufika ku dyumvwa ne tudi bacimunyiibwe to. Ekeleeziya wa beena Mpenta, beena Assemblées de Dieu, Basanga, ne bakwabo baa kudibo, mbimweneke anu bu ne kabeenaku bôbò ne dikumbanyina dya kumanya ne mbacimunyiibwe to. Aleluuyah! Kaa, ndi njingaku bwa kwenza ne eci cilamate. Mbacimunyiibwe. Bulongolodi bwa ekeleeziya mbucimunyiibwe! Anu mudibi ne États-Unis ewu mmucimunyiibwe, munkaci mwa kuzakala ne kuciina, ne bombes milebelele kwaka mibîndile, bamanye ne bakaadi baye benda baja maja ne bakangishe mwoyi wabo ku iferno. Nenku bakaadi bacimunyiibwe, ne Nyuma ukaadi mumane kubapatuka. Mbifwanyine kukengela bwa nwênù kukebulula mu mici bwa kupeta nsongaalume ya dituma ku busalaayi; mbamone cyènzèkèdi bakwabo aci. Tudi bacimunyiibwe! Ekeleeziya mmucimunyiibwe. Bôbò’s mbamanye ciine aci.

¹⁶¹ Môsà yêyè wakafika ku dyumvwa aci, pashiishe kumanyaye bikumbane pa dîbà adi...Nzambi kumwangata kuya nende lwa mundekeelu, mu cipeela, bwa kumulongesha ndambu wa butekètè bwa buntu. Wakamwangata kuya nende lwa mundekeelu mwamwa bwa kumulongesha ne byònsò abi bivwa ncinyi. Nenku ki kulongaye bilenga’s! Kaa, ekelekele, ki kupetaye dileesona’s! Nzambi uvwa ne cya kwikala mupicishe nende cikondo cikole kuntwaku! Nudi bamanye’s, Môsà uvwa ne cijji; ki Nzambi kumupa mukaji dyende dînà Seforah, mwikale naaci, yêyè pende. Nenku ncyèna anu ngeela meeji ne maalu ônsò avwa anu masanka lwa mundekeelu mwa cipeela amu to bwa cikondo ndambu, pwa biiji byabo byònsò bibidi abi bijuukile kuulu musangu umwe.

¹⁶² Ndi ngeela meeji ne mmwenenu wende wa mu mutu wa muvwa dilonga dya nsòmbelu ne cya kukontonona muntu awu kaakiikala ne dikwacisha menemene to, bwalu, pavwaye mu njila wenda upweka mutangile ku Ejipitu apu, ndi mmona Seforah mucikàle anu ne cilunji cibi. Wakakosa musoso wa mwanende wa balume ne wakawukupu kumpala kwa Môsà, wamba ne: “Wêwè udi mulume wa mashi bwanyî mêmè.”

¹⁶³ Ne Nzambi uvwa mumufiikile munda bikole mu mushindu wa ne Yêyè...mumukebele mu cilaala-beenyi, bu Yêyè mudidinge anu mumupete nunku Mmumushipe. Ngeela meeji ne kuvwa tuntu tukese tuvwa tukengela bwa Nzambi amulongeshe

kuntwaku, nwamonu's, twa ne yêyè uvwa muntu. Lungenyi lwende lwònsò lwa mu Ejipitu alu ne makole ende ònsò a mu mutu awu, Nzambi kavwaku mwa kukwata mudimu nansha ne cimwe cya ku byòbì to.

¹⁶⁴ Wêwè udi ulwa, wamba ne: “Mpindyewu, Mukalenge, ndi mulongeshiibwe mu tulaasa kukaadi bidimu makumi anaayi mpindyewu, ndi—ndi mulongi wa mamanya a mu mutu. Ndi mwa kuteela bidi mu Bible awu mwikale mubwite kwîsù.” Nzambi kêna mwa kukwataku mudimu nansha ne cimwe cya ku abi nansha. Nwamonu anyi? To.

¹⁶⁵ “Kaa, mêmè's ndi wa mu ekeleeziya udi mutambe bunene wa mu ditunga. Ndi—ndi . . . Ndi *cikampanda*, Mukalenge. Kaa, s'ndi mwena Mpenta. Ndi . . . Butumbi kudi Nzambi's we! Ndi mufume ku dipeta Nyuma Mwîmpè diloolo adi. Aleluuyah! Wêwè neungenzeje *cikampanda*.” Nzambi kêna mwa kukwata mudimu nansha ne kakese kaa bya nanku to. To!

¹⁶⁶ Dîbà dyònsò dyûdî ulwa mucimunyiibwe ne ufika ku dyumvwa ne udi mucimunyiibwe adi, nenku pa dîbà adi alukila cyanyima udipwekeshe. Shaala mu butekètè, ujandule ne udi muntu. Nenu kakwena nansha dimwe dya ku mamanya ebe a mu mutu didi mwa kwenza bwa . . . Matekètè a buntu awu Nzambi katu mwa kukwataku naawu mudimu to; Nzambi ku matekètè a buntu awu ùdi ùDìpòngolola munda mwebe, pashiishe Yêyè ukwata mudimu ne Yêyè mwine. Wêwè udi ulwa anu cyamu cya mudimu cyanaana. Cya bushuwa's! Bidi bikengela bwa wêwè mwine ùdyùmùshè mu njila.

¹⁶⁷ Mòsà, kaa, wakayiila, wakayiila matekètè a buntu bîmpè be. Wakaayiila bîmpè be, mu mushindu wa ne, paakamubiikila Nzambi, uvwa ne matekètè mwandamutekete avwaye naawu bwa kumona mwa kukokangana ne dibiikila dya Nzambi. Kacya nukaadiku balonge mu citupa cya kumpala cya Ekesoode, matekètè mwandamutekete awu anyi? Ndi—ndi naawu mafunda mwaba ewu. Ndi muswe nuateeleje. Butekètè bwa kumpala buvwaye naabu buvwa ndipanga kwikala ne mukenji. Butekètè bwibìdì buvwaye naabu buvwa ndipanga kwikala ne bukookeshi. Butekètè bwisâtù buvwaye naabu buvwa ndipanga kwikala ne ngaakwilu wa kapelu. Bwinâyì buvwa ndikumbanangana. Bwitânù buvwa ndituuta dya dyakalenga. Ne bwisambombo buvwa nkansungansunga.

¹⁶⁸ Mpindyewu, fwanyikijaaku ebe wêwè ne ende awu kadi umone ní udiku mwa kutwala peebe abi, umone ní udiku wêwè mwa kulwa mu butekètè mushindu uvwaye yêyè awu. “Mukalenge, ncyèna—ncyèna mwîmpè to. Ncyèna mumanye mwa kwakula to. Ndi—ndi—ndi mushipe mwena Ejipitu. Ncyèna mwa kukwalukila to. Kaa, byònsò's! Kabakungaakidila to. Ncyèna ne mukenji to. Ndi ne . . . Ncyèna mumanye mwa kwakula to. Ne mêmè—mêmè mwine ndi ne lujooko mu dyakula.”

Nenku nwamonu mushindu uvwaye yêyè anyi? Yêyè's uvwa cintu cyanaana! Mwaneetu, yêyè's ukaavwa mwondopiibwe. Eyo, Nzambi uvwa mwa kukwata nende mudimu pa dîbà adi paanyima paa yêyè mumane kwondopiibwa. Nwamonu anyi? Eyo.

¹⁶⁹ Eyo, Yêyè udi mwa kukwata neetu mudimu paanyima paa twètù bamane kwondopiibwa, bwa kujandula ne “mapolome aanyi a Ph.D. ne LL.D. ne L.D. misangu ibidi awu,” anyi nî ncinyi cyònsò ciwabi bifwanyine kwikala aci, “mapolome aanyi ònsò awu adi bintu cyanaana.” Nzambi kèna mwa kukwata naawu mudimu to!

¹⁷⁰ “Ee, mêmè ndi mwena Assemblée de Dieu. Ndi Unitaire. Ndi Baptiste. Ndi Presbytérien.” Nzambi kèna mwa kukwata mudimu nansha ne kakese kaa ku byôbi abi to! Paudi udisaka kule naabi ne lukasa lwònsò, ee, ki pawa—pawa—pawadilekelela wêwè mwine bilenga menemene kudi Nzambi.

¹⁷¹ Muvwa muprofeta, kwambaye ne: “Ndi muntu wa mishiku mibiipe, ne munkaci mwa bantu babiipe.” Ki Mwanjelo kuya kangata—lukwatu, kubàndayè ku cyoshelu e kwangata dikala dya mudilu ne kulengaye mishiku yende. Ki pa dîbà adi kwelaye lubila ne: “Mukalenge, ki mêmè ewu; ntumaaku.” Eyo, paanyima paa yêyè mumane kufika ku dyumvwa ne ùvwa... Nansha muvwaye muprofeta amu, kadi ùvwa ne mishiku mibiipe.

¹⁷² Patudi anu tufika ku dyumvwa ne tudi—tudi bintu cyanaana, ne wêwè udi cintu cyanaana, udi lupwishi lwa buloba... Nzambi kèna mwa kukwata neebe mudimu... Eyo, dyebe dilabul-... Ebe matekètè ònsò awu kaenaku mwa kufika pa a Mòsà to. Yêyè nyawu uvwa ne matekètè asambombo mashiileshilangane mwaba ewu, ne yêyè ùvwa muyiile mudi butekètè bwa muntu.

¹⁷³ Mpindyewu tangilaayi dishiilangana pankaci paa *awu* Mòsà mwikale utuutakeena ne Nzambi, ne *Mòsà* mwikale utangila pa...?... bu mudi leelu ewu. Wêwè wambi ne: “Twämbè tũng, s'bidi bitukengela *cikampanda!* S'bidi bitukengela ditabuluja mu ditunga. Nènnwämbilè cingènzà, ndi ngaalukila nkalonga too ne pängäapetà dipolome dyanyi dya B.A. Uh-huh! Ndi ngaalukila nkalonga too ne panjidilabo bu LL.D. Nènkalongè difunda dya mikanda. Nènkenzè byònsò ebi, pashiishe mpatuke nshaale ‘muntu wa cikondo.’ Nèmbwikidijè balumyana bònsò bààkabangà pambelu apa aba mukana.” (Kaa, mwaneetu!) “Nèmpetè nzubu wa miliyò isatu ya ndola. Nèmpetè mashinyi a cadillac dikumi ne abidi. Nenku...” Kaa, mwaneetu! Abi's mbipiciibwe—mbipiciibwe ne wêwè kuyi mene mubange to, bwalu ukaadi mucimunyiibwe anu kuntwadijilu kwine, wamonu's. Kadi lutatu lùdiku ndwa ne kî mbacimanye to!

¹⁷⁴ Badi bôbò beela meeji ne bikengela wikale ne nsuki ya mvwangala ne uvwale nkoooci ya tuxedo ne wämbè “aa-men”

bilenga menemene, ne byônsò mushindu ewu, ne kwikala mwànà wa mfumu. Awu's mmuntu wa benzeja maalu kudi mukaji's!

Nzambi mmuswe balume, balume baa difwana dya Nzambi, balume badi mwa kunyungishangana abu!

175 Kadi leelu ewu twètù tudi baswe Hollywood. Tudi baswe cintu kampanda cya—cya cisankisha mèsù. Tudi baswe cintu kampanda cidi mwa kwakula mu mushindu wa mamanya a mu mutu bwa watulaadikaku tulu munda mwa tusunsa tutaanu padiye. . . mu dyalumingu mu dinda.

176 Nzambi utu muswe batapuludi bìikalà mwa kuyiisha cyenze bu mukenyi upenya, kupiisha mpekaatu too ne ku miji, (ncyà bushuwa) kumujoomona kumwela pambelu.

177 Kadi twètù tudi. . . Tudi baswe bampaasata beetu baa mamanya a mu mitu abu. Ciibûngì cya bantu mbaswe mpaasata wa unungeena mu matama awu, muntu wa wamba ne: “Eyowa's, munanga wanyi mêmè.”

Nzambi utu muswe nkuba! Eyowa's, mukalenge.

178 Kubatuuta cyanza paanyima, ne nsuki mîpì ayi ne bilaabu bya kwîsù abi, ne bikwabo byônsò, ne divwala dya bilàmbà byenze bu babapongolwelemu, ne byônsò mushindu awu, kadi kayi wamba dîyi pa bwalu abu to.

179 Muntu munene kampanda wakambiikila mu birô byende muneemu emu, (kamuvwa mu birô byende to) mu birô byende bya mu budimi bwa bwambi, anu abidi adi pansha aa, wamba ne: “Ndi muswe nkutenteketele byanza bwa ulekele bwalu abu!”

Mêmè ne: “Kucyënjîku to. Kucyënjîku to. To, mukalenge.”

180 Paudi wimanyika aci, s'udi wimanyika Mukenji. S'udi wimanyika Nzambi paudi wenza aci nanku. Eyowa's, mukalenge. Katwena baswe bya nanku awu to.

181 Nzambi wakumvwilaku Mòsà luse ne matekètè ende ônsò awu, ne: “Mukwacikwetu Mòsà, ncyà bushuwa ne cintu kampanda—cintu kampanda ncikwenzekele, wâpwekì milongo pa bidi bitangila dipolome dyebe. Kaa, ekelekele! Mona, eyo, wêwè ewu's uvwa muntu munene, mwena mamanya a mu mutu, ne kakuyiku cintu civwa mwa kukwimanyika to. Mwaneetu, s'uvwa ne mapolome ebe ônsò a Ph.D. ne a LL.D. awu, ne bikwabo byônsò, kadi mpindyewu ki wêwè ukaadi ulwa utonda mùdì cintu cyanaana ewu, kuciya ne cyùdì mwa kwenza nansha cimwe. Ukaadi—ukaadi anu ne butekètè bwa dikema”? To! Nzambi kaakamuumvwilaku luse to. Nzambi kaakamuumvwilaku luse to. Nzambi wakamwondopa anu piine apu ku bintu byônsò abi. Kaakamuumvwilaku luse to.

182 Kadi tudi tusangana, panwikala nufunda bwalu abu, Ekesoode 4.14: “Cijji cya Nzambi cyakamuteemena.” Nzambi kaakamuumvwilaku luse ne bwalu nyawu uvwa ne butekètè to.

183 Wêwè udi wamba ne: “Éyì Mukalenge, ndi ndyumvwa bibi be, ncyèna ngiitabuuja ne ndi mufwanyine kucyenza to.” Nzambi kèna ukuumvwilaku luse to; udi udyumvwa muswè bwa kukutwa miseba ndambu wenda wenda neebe kadyàbâta. Nwamonu anyi? Nwamonu anyi? Bushuwa’s. Nzambi kèna ukuumvwila luse to; Yêyè—Yêyè udi ukufiikila munda. Wêwè udi anu wenda ushaala mu mushindu wa Yêyè kumona mwa kukwata neebe mudimu. Eyo.

184 Mòsà mwikale wondopiibwa, Nzambi udi mwa kukwata nende mudimu. Yêyè wàkapeta bwanga, ùkaavwa usanganyiibwa kule ne makumbanyina a buntu pa dîbà adi. Kaciyiku ne cintu nansha cimwe civwaye mufwanyine kweyemena pa dîbà adi to, bwalu yêyè—yêyè ukaavwa pa dîbà adi mudilongolole bwa mudimu.

185 Nzambi kwamba ne: “Kukaadi bidimu makumi anaayi mwab’ewu bîNdi munulekele wêwè ne Seforah nukokangana ne wenza maalu a lukutukutu mu cipeela emu, bwa ne ne uvwaku mwa kujandula ne butekètè bwa muntu bùtukù anyi kabùtukù, mùdì mwimane kwaka amu bu mwânà munene wa mfumu ne: ‘Wetwawu, Docteur Mòsà. Mwoyaawu, Révérend, Mukalenge. Eyowa’s, mukalenge. Mòsà, wêwè’s ki mwânà wa mfumu wâlwa. Bònsò. . . Twètù bònsò tudi tukwelela wêwè meeji.’ Mpindyewu ukaadi mu cipeela emu ne cisumbu cya mikooko ne mukaji wa cilunji cya cijii cikole.” Nwamonu anyi? Aci kadi kumuteekaci pa kaaba kende. Eyowa’s, mukalenge. Mòsà mu mushindu mubi be, kadi Yêyè ne: “Mpindyewu Ndi mwa kukwata neebe mudimu, paudi ufika ku dyumvwa ne udi cintu cyanaana. Mpindyewu seemènàku apa pabwîpi ne cipuka cidi cilakuka kapya eci, Ndi muswe nkutume muntu mwamwa.” Kaa, ekelekele!

186 Nzambi, watùpèeshékù kabidi baa mushindu awu’s, tupeesheku kabidi baa butekètè. Ki cidi citukengela ncyòci aci, beena butekètè. Cya bushuwa’s!

187 Ûvwa n’Yakobo, nudi bamanye. Yakobo uvwa musangu kampana udyambidila muvwaye muntu munene, nudi bamanye’s, ùvwa anu mwa kwibila kayi unyookiibwa to bwa cintu kana cyònsò. Uya ukeela tuumici twa cilombalomba mwaba uvwa mikooko ne ngombe ya tatwëndè—mwenu pavwayi ne mafu apu, uyikudimuna yilwa mikooko ya makejimizeji, mwikale wela mushindu awu pavwayi yiya ku màyi bwa kunwa. Nenku, katanci aka anyi, Yakobo kulwaye muntu munene. Bushuwa’s. Ûvwa. . . “Neya bushuwa ne yêyè mbamwinyike Yakobo, kakuyi ntupakanyi to,” mwakamba Esawu, “ùvwa ‘munyengyanganyi wa mwaba wa bende’ anu wa cya bushuwa ewu.” Nenku yêyè uvwa mwibidi. Ûvwa wenda utanta bilenga be, ùpeta bintu, kupetaye bisumbu binene bya nyama ne bakaji ne mikooko ne ngombe mikaji ne ngombe milume, ne—ne bintu byònsò, ùkaavwa ne bintu byònsò.

188 Kadi bufuku kampanda (kaa, ekelekele!) pavwaye wenda upweka ku kasulu kakese kaa mâyi musangu kampanda, ûkaavwa anu ne asabuke, kufikaye pa kaaba kaakalwa Mwanjelo kumupya. Mwaneetu, mukulumpe Yakobo kukandamanaye bufuku bujima. Ncya bushuwa ne yêyè wakakandamana mukùngùlù mule. Kadi paakadilekelelaye, paakalwaye ne butekètè kaciciyi mwa kukandamana to . . .

189 Éyi Nzambi, swaku bwa ekeleeziya afike mu mushindu awu, afike pa . . . ekeleeziya afike pa kaaba kaa kaciyi mwa kukandamana kabidi ne makumbanyina ende a mubidi awu to, kadi bimukengela kudilekelela kudi Nzambi. Ba-Méthodistes bàdÿúmvwè bundu bwa mudibo ba-Méthodistes. Ba-Baptistes ne beena Mpenta bàdÿúmvwè bôbô biine bundu, balekele kukandamana, kadi badilekelele kudi Nyuma.

190 Pa dîbà adi ki paakalwa Yakobo “mwânà wa mfumu wa Nzambi.” Bible ngudi mwambe ne yêyè wakalwa “mwânà wa mfumu,” ne dînà dyende dyakashintuludiibwa. Nwamonu anyi? Nenku—nenku, nwavulukaayi ne, yêyè uvwa muntu munene wa dikanda luseke lwa *dyamunu*, mwikale ne bukole bwa mamanya a mu mutu; kadi luseke lwa *dyamwamwa* ûkaavwa mwânà wa mfumu wa wenda utebuka, wa butekètè ne mucyokakane, kadi ùvwa ne bukole kumpala kwa Nzambi.

191 Eyowa’s, wêwè udi mufwanyine . . . Bulongolodi bwenu mbufwanyine kwikala bupanduluke tupese tupese. Dikwanyina didibo bakwanyina kudi beena mutumba adi, wêwè udi mwa kushaala “cikololo cya cyena kale” kubangila pa dîbà adi, kudi beena mutumba. Aci’s ncifwanyine kwikala cya bushuwa. Kadi ndi nkwabwila, newikale ne bukole kudi Nzambi. Mbipiciibwe ne mêmè mwikale nanku awu. Nêndondè njila awu pa dîba kana dyônsò.

192 Bayiidi baakaalukila benda bacyonkomoka bwalu bavwa ne disanka dya mwakabadiibwabo bakumbanyine kutwala bundu bwa Kiipacila ne bwa Yesu. Bushuwa’s! Nebakwinyike ne “munsantu mubunguluki wa mu malaba.”

193 Patuka mu mwaba awu musangu kampanda, ucilekele cìpandulukè. Suuluka mu byebe bya ne: “Ee, twâmbè ne, ndi Méthodiste,” anyi “Presbytérien” anyi “Ndi mwena Assemblées,” “ndi Unitaire, ndi mwîmpè anu mùdì peebe amu.” Eyo. Anji anu patuka muntwamu musangu kampanda, ubilekelele. Angata byônsò . . .

194 Mwanjelo ànjì anu akupye musangu kampanda, mwanjelo wa Mukalenge wâkutwâdila Bulelela bwa Mukenji. Yêyè ànjì anu akupye musangu anu umwe cyanaana, neudipwekeshe ukafike too ne ku dibatiiza dya mu Dînà dya Yesu, neudipwekeshe ukafike too ne ku bikwabo bya Cyôci aci abi. Eyowa’s, neücyênzè, ncya bushuwa ne neücyênzè. Eyo, wêwè’s

neupwe—wêwè's neupwe anu mwoyi mamanya ônsò a mu mutu awu.

¹⁹⁵ Kukaadi ndambu wa matuku, umwe wa ku balunda baa kalolo bândi naabo, muntu mwîmpè maalu, ùvwa ùngambila, mwikale wumuka mu cibambalu paanyima paa mêmè mumane kwenza muyiiki wa babidi, kuumukaye mu cibambalu amu, wamba ne: “Mwaneetu Branham. . .” Kabidi mwine muntu ewu uvwa umwe wa ku bantuudidi baa mfranga mu disangisha dya kwôkò kuntu aku. Mêmè mufike mu mushindu wa nciyi mwa kumanya ne nêngênzè bishi bwa kwendesha cintu aci to, mweyemene anu Nzambi; muntu ewu uvwa mufwanyine kucifuta cyônsò. Eyo, anu muntu mwîmpè maalu wetu ewu's! Kadi muntu ewu kwenzaye lwendu mufumine ku cimenga kampanda cya cinene, kukaadi maloolo ndambu mwab'ewu, ki kwimanaye mu cibambalu amu ne kungambilaye diloolo kampanda, ne: “Mwaneetu Branham,” wamba ne, “ndi muswe kwamba cintu anu cimwepele cyanaana.” Yêyè ne: “Kakwenaku muntu ûndi mêmè ewu mumanye udi kayi mukunange to.”

Mêmè ne: “Kadi ngäsànkikù be bwa aci.”

¹⁹⁶ Yêyè ne: “Mwaneetu Branham, kudi cintu anu cimwepele, cintu cimwepele cya cibi.”

Mêmè ne: “Ncinyi ciine aci's, mwaneetu wa bakaji?”

¹⁹⁷ Yêyè ne: “Ee, cintu cimwepele aci ncyôci eci, Mwaneetu Branham, ncya ne bu wêwè mwa kudyaku cibanga pa kantu kakese kaa Dilongesha dyûdi naadi adi,” ne, “bulongolodi ne bulongolodi bwônsò mbufwanyine kukwakidilaku's.”

¹⁹⁸ Mêmè kumba kucimona anu mwaba awu, mêmè kudyambidila. . . Mêmè kwamba ne: “N'Dilongesha kaayi adi, mwaneetu wa bakaji?”

Ki yêyè ne: “Kaa, dya dibatiiza mu Dîna dya Yesu adi's.”

¹⁹⁹ “Kaa!” Mêmè ne: “Kadi, mwaneetu wa bakaji, kwêna mufwanyine kukeba bwa mêmè kudya cibanga pa Dîyì dya Nzambi kadi kushaala anu musadidi wa Nzambi to.”

²⁰⁰ Ki yêyè ne: “Ee, monaaku, kudi musumba mujima wa bambi bândi mulwe kuleejila mpala mwab'ewu baa mu cimenga cinene eci.” Yêyè ne: “Bu wêwè mwa kubambilaku ne Mwanjelo wa Mukalenge utu ukupa bikeena-kumona ebi awu ngudi mukwambile bwa kubatiiza mu Dîna dya Yesu, apu kaayi nebasweku bwa kuCiitaba.”

²⁰¹ “Ee,” mêmè ne, “dilabula dyabo ndipeepele dishaadile ne kudi mâyi masukula naawu malongo!” Mêmè ne: “Ncyêna ncyuka cidi mwanjelo kana mufwanyine kwamba nansha, piikalaci kaciyi cikumbanangane ne Dîyì ncyêna neciitabuujaku to!” Mêmè ne: “Mwanjelo awu yêyè mungambile cintu cishiilangane ne Dyôdi adi, ncyêna mufwanyineku kwitabuujja mwanjelo awu to.” Cya bushuwa's! Dîyì dya Nzambi ndidi

kumpala, kumutu kwa banjelo bônsò ne bikwabo byônsò! Mwanjelo mulelela. . . Mêmè ne: “Yèyè kayi mungambile Aci to, ncyêna mufwanyine kumuteelejaku to.” Eyo.

²⁰² Inăbànzà awu kupangaye cya dyenza’s. Yèyè ne: “Kacya nçitu mwanji kuumvwa cya nanku to. Kacya nçituku mwanji kumanya pa bidi bitangila Aci to.” Nwamonu’s, ki bwalu mbwôbò abu. Ki mêmè kupa inăbànzà mutekete awu ndambu wa Mifundu. Ki yèyè ne: “Ndi ngaalukila buludi kwanyi kumbelu nkalonge Dipungila Dipyadipya. Kacya nçitu mwanji kuDilongaku to.” Nwamonu’s, ki bwalu mbwôbò abu. Kaa, ekelekele! Kaa, ekelekele! Ki mwaba wûdì ukafika ngwawu. Kaa, ekelekele!

²⁰³ Lekela kuteeta kukandamana. Lekelela! Ki cìdì cîmpè bwa wêwè kwenza: kulekelela. Yakobo, paakalekelelaye wakalwa bîmpè, wakalwa mwânà wa mfumu ne wakapeta bukole kudi Nzambi.

²⁰⁴ Ûvwa n’Davidi *mukese* muvwale nkooci wa cyena ntendeleelu wa Shawula awu, mupatuke bwa—bwa—bwa kulwangana ne Goliyata. Kadi paakapatuka Davidi kwaka bwa kulwangana ne Goliyata mwikale ne bya mvita byônsò binene ebi bivwala, ki kwenza wàkènzakana, wàtàngila paanyima, ùvwa mufwanangane ne bakwabo bônsò abu, ki kwambaye ne: “Kudi cintu cipampalamuke mwab’ewu.”

²⁰⁵ Paucidi anu mufwanangane ne baa pa buloba ne mwikale udyá cibanga pamwe ne baa pa buloba, ne wenza cintu cimwecimwe cidì baa pa buloba benza, kudi cintu cipampalamuke.

²⁰⁶ Davidi kwambaye ne: “Eci cidì cimweneka citambe kwikala cikolesha be. Ngaapeci Dipolome dya Docteur, ngaapeci dipolome dya Ph.D. Nwamonu’s, nkaadi wa mu bulongolodi bunene, mmunyi mûndiku mufwanyine kuya kalwangana ne bintu byônsò ebi? Ncyêna mumanye kantu nansha kamwe pa byôbì ebi to. Ncyêna mumanye kantu nansha kamwe pa byôbì ebi to!” Davidi kwambaye ne: “Ngumushaayi bintu ebi pambidi.” Ncyâ bushuwa. “Piikalabi ne nyaaya kalwangana bwa Nzambi ncyêna muswe kwikala mufwanangane ne musumba wa batulumuke badi biimane apa aba to, bavwale bya mvita too ne ku mènù ne bakûngwile kaaba kamwe. Ncyêna mwa kwenza disangisha . . .”

²⁰⁷ Masangisha àbûngì, bantu bààbûngì, bambi bààbûngì badi balwa kûndì biikale batonda mudibo biitabuuja ne mu Dinà dya Yesu Kilisto ki mudi mukumbane kubatiijiibwa, kadi bamba ne: “Bulongolodi bwetu mbufwanyine kutwipata.” Mwena kabingila kapeepele naanyi we! Kopola bya mvita bya Shawula abi!

²⁰⁸ Mpèèshè mêmè bukole ne dikanda dya Nyuma Mwîmpè! Nzambi, ntùmè mêmè ne ndundu wa nyuunyi, nansha mwikale

wa bishi (nansha kiikàle kakese), nèntuutè mwena lukuna ngëndè nende kadyàbàta. Ncya bushuwa. Ntùmè mèmè, kadi kundekedi mvwala mudi bakwabo aba ne mapolome a L.L., Ph.D., ba-Docteurs to, bintakanyi byònsò bya mushindu awu abi to.

209 Davidi kwambaye ne: “Cintu eci kaciyena cimweka cîmpè to.” Yèyè ne: “Ncyèna mumanye kantu nansha kamwe pa cyòci aci to.” Yèyè ne: “Cintu cimwepele cîndi mèmè mumanye, cîndi naaci ncyà ne ndi. . . Mundekeelu mwa cipeela mwamwa mvwa ndama mikooko ya taatù wanyi.” Ki yèyè ne: “Nyama wa ntambwe kulwaye e kubakula kânà kaa mukooko ne kunyeemaye naaku, kadi mèmè mvwa mumanye ne kavwa nkânà kaa mukooko kaa taatù wanyi, nenku, kaa, mèmè—mèmè—mèmè. . . Ncivwa mudipaye to, kadi mèmè kwangata anu ndundu wanyi wa nyuunyi kadi kwasa dilumbatangana nende.” Yèyè ne: “Mèmè kumushipa kadi kwalukila ne kânà kaa mukooko aku.” Kaa, ekelekele! Abu nkacya biimana pààpa’s, muntu ne muntu ne difuma mu cyanza, kabayiku bafwanyine bôbò kwikala bacyènzè to.

210 Ki lutatu ludiku leelu ewu ndwòlò alu. Nzambi udi ne mikooko bûngì cyanaana yidi mipambuke, malongolodi ne bikwabo mbiyîbè, kuyipatula kadi kuyibweja mu dilonga dya nsòmbelu. Nzambi atupeku ba-Davidi badi ne Dìyì dya Nzambi ne bukole bwa Nzambi, bwa kubiludikila patuyaaya bwa katwilangana ne bantu baa mpolondo baa mamanya a mu mitu abu (Elaayibi meeji!) ne mapolome a Ph. ònsò aa, ma-LL.D., ma-Q.U.S.T., anyi byònsò bidi bifwanyine kwikalaku abi. Mpèeshè mèmè Dìyì dya Nzambi ne bukole bwa Nyuma Mwîmpè kadi, ndi nkwambila ne, tudi mwa kushipa muntu wa mpolondo yònsò mu cyalu. Cya bushuwa! Bidi bitukengela bantu badi mwa. . .

211 Mona’s, Davidi ki uvwa mwena kabingila kaa katambe kupeepela kavwa mu cyalu amu, bwa kuya kalwangana ne muntu wa mpolondo awu. Yèyè mwine awu, mona’s, uvwa anu kansongalume keetu aka. Ne Bible mmwambe ne kavwa “kakunzubile,” kalumyana kaa kamweka kanyiikanyi kaa kale, pàmwàpa ne tukaaya tukobame, kadijingile kapese kaa ciseba cya mukooko. Kavwaku nansha ne dimwe dya ku mapolome enu a mamanya a mu mitu aa ne a badi balonge bikole aba awu to. Kavwa mumanye cintu nansha cimwe pa bidi bitangila mwele wa mvita to. Kavwa mumanye cintu nansha cimwe pa bidi bitangila dilongesha dyònsò edi divwa Shawula. . .

212 Shawula ki mutambe bwîmpè uvwabo bôbò mwa kwikala bapete, Mwepiskopo Shawula. Ncya bushuwa ne, uvwa ne mutu ne makaaya kumutu kwa bakwabo bònsò baa mu cilwilo amu. Mona’s, yèyè—yèyè’s ki uvwa ne cya kuya kamulwisha, kadi uvwa ne bwòwà bu kamwe.

²¹³ Ne leelu ewu tudi bamanye ne bidi bitukengela ditabuluja. Tudi bamanye ne bidi bitukengela disanguluja munkaci mwa bantu. Kabyakukengela Docteur mu Bunzambi nansha. Nebikengele mwena butekete (Aleluuyah) wíkala mwa kwangata Dîyi dya Nzambi mu bukole bwa dibiika dya ku lufu dya Kilisto kadi kushipa cintakanyi eci. Neditwadile ditunga Kilisto mu... bwa kubaleeja ne Yêyè uci anu mwa kutabaja mèsù a bampofo, kwondopa babeedi, kubiisha bafwe, ne Yêyè udi Nzambi, Mucimunyi! Amen. Bidi bitukengela Davidi kampanda, udi kayi mulongeshiibwe mu bilongelu bya teoloji to, bidi bitukengela muntu udi kayi mumanye cintu nansha cimwe pa biine abi to, nsongaalume mukese muludiki wa ditempu dya nkasu anyi cintu kampanda, kalumyana kakese kampanda kaa tukaaya tukobame, kakayi kaa bantu batamba kutangila to, kalwa kenda kapweka ne njila kiikale ne bukole bwa Nzambi.

²¹⁴ Maamu uvwa ùpunga ne lufu, kwambaye ne: “Billy, ntu mukweyemene ne mukwitabuuje. Wêwê ewu ki uvwa dyanyi dikanda dya nyuma, wêwê ngutu mundombole kudi Nzambi.”

²¹⁵ Mêmè kwamba ne: “Maman, mêmè ewu pâncivwà mwânà... Bwa wetu muji, mu bushuwa bwa bwalu, wa ba-Irlandais, tuvwa bafwanyine kwikala baneemenene ndambu ku Katolike.” Ki mêmè ne: “Ekeleeziya uvwa wamba ne bavwa—bavwa cisumbu cya bantu, ne bôbò ki bavwa naaci cyônsò, ne cyônsò civwabo bôbò benza civwa anu cikumbane. Mêmè ncivwa mwa kwitabuujuaku aci to, bwalu ba-Luthériens bavwa bamba ne: ‘Twêtù tudi cisumbu cya bantu, twêtù ki badi naaci cyônsò.’ Ba-Baptistes paabo ne: ‘Twêtù ki cisumbu mene, twêtù ki badi naaci cyônsò.’ Badi bûngì bupitepite, kudi malongolodi mashiileshiilangane matwe ku nkama citeema.” Mêmè ne: “Maman, ncivwaku mwa kuteeka dyeyemena mu cyôci aci to, bùdi bulelela ku ôwò awu ki bwèpi?”

²¹⁶ Mêmè kulwa kujandula, ndi ngamba bwalu ebu ne didipwekesha ne kalolo kônsò, kadi ncyêna ngiitabuuja ne nansha bumwe bwa kudiwu mbulelela to. Ncya bushuwa. Mêmè pândi ngaalukila ku Dîyi dya Nzambi, ndi mumone civwa Dyôdi adi dyenze kale wawa. (Ne pa nanku, Nzambi, swaku bwa twêtù bônsò twalukile kwôkò aku.) Nenu ne butekètè, kakuyi dikwacisha dya kudi bulongolodi to, kakuyi dikwacisha dya kudi mangumba to, kakuyi dikwacisha dya kudi ndongolwelu kampanda wa ntendeleelu to, kadi mu didipwekesha ne bukole bwa Nyuma Mwîmpè wâkapòna dya Mpenta awu, ne mukenji umweumwe uvwa Peetelo naawu Dituku dya Mpenta awu ne: “Nyingalalaayi, muntu ne muntu wa kunudi, nubatiijibwe mu Dîna dya Yesu Kilisto bwa dilekelediibwa dya mpekaatu yenu.”

²¹⁷ Kwakwikala muswikiibwe bu mudi musumba wa bamanyi beena teoloji aba to, ne nshingu yenu ya miteelu mikudimuna ne mapolome a B.A. Kadi, mwaneetu, newikale ne cintu kampanda mu cyanza cyebe, ne padi anu Nyuma wa Nzambi

ubwela mu Dìyì adi Yèyè neacimune ne nealuje mikooko yidi mipambuke ayi. Amen! Tutondaayi matekètè etu! Imansha Dilongesha dyebe dya Bunzambi adi! Imansha buucimanya-byònsò bwebe, buumambala bwebe abu! Divuula wèwè mwine kumpala kwa Nzambi, mu cyakwidi cya nyuma, ne udibiikile bu “udi kayi mukumbanyine!” Pa dîbà adi Nzambi udi mwa kubanga kukwata neebe mudimu. Kwikadi wambila bwalu abu anu mukana cyanaana to, ubupatwile munda mwa mwoyi webe.

²¹⁸ Yakobo, Davidi, byakakengela kudivuulabo bôbò biine. Yèyè nguvwa ne butekètè butambidile mu musumba mujima awu.

²¹⁹ Elaayibi meeji ku, pàmwâpa, masalaayi binunu dikumi anyi binunu lukama pa kakuna apu. Bònsò bavwa balongeshiibwe, yònsò wa kudibo mwikale ne dipolome dya Ph.D., yònsò wa kudibo mwikale ne mafuma, bavwa masalaayi. Yònsò wa kudibo uvwa Kapalaalu *Kampanda*, Diikidi *Kansanga* (nansha ku ba-Diikidi), Kalàlà *Kankenga*, Lufuteena *Kankenga*. “Kalàlà munene Shawula wa mitooto inaayi, Mwepiskopo, eyo, Wa kuneemekiibwa, Mukalenge!” Yònsò wa kudibo mwimane mwaba awu, bantu balongeshiibwe.

²²⁰ Ki mwena lukuna pende mwimane pa kakuna, wamba ne: “Bitulumuke naanyi nwê.” Kaa!

²²¹ Ki mu cituudilu amu kulwamu kaamuntu kakese, kaa tukaaya tukobame, (Éyì Nzambi!), kakese kaa mmwenekelu wa mukunzubile, ndundu mukese wa nyuunyi mwela paanyima, ne munyiinyi mukàlanga ne tumuma twa mvinyo mu cyanza bwa tuutwèndè. Ki muntu wa mpolondo awu kupatukaye ne kwelaye lubila kupicisha musangu awu. Yèyè ne: “Nudi baswe kungambila ne nwènù musumba mujima wa bantu balongesha mwab’ewu aba nudi nushaala biimane mwaba awu nulekela mwena Peleshete udi kayi mutengula wawa wela Dìyì dya Nzambi udi ne mwoyi kadyombo anyi?” Amen! Yèyè ne: “Nudi numuumvwa bwôwà anyi?”

²²² Shawula kwambaye ne: “Pawikala muswe kuya, vwila apa. Nê—nê—nênkutùmè mu kalaasa munda mwa bidimu makumi abidi mpindyewu, nenku nênkupetèlè dipolome dya—dya Ph.D. Ndi nkwambila cingenzà, nênkupèèshè anu dyanyi dipolome.”

²²³ Yèyè ne: “Umusha cintu eci.” Kaa, ekelekele! “Ncyêna muswe kwikala naaci bwalu to.” Yèyè uvwa muswe kweyemena Nzambi. Yèyè ne: “Ndi mumanye cikaadi Nzambi mwenze naanyi ne eci, nenku mêmè ndi mudilongolole bwa kwikala mweyemene naaci Nzambi kumpala kwa nî ncinyi cyònsò.” Amen! Ki dilabula dya mwena Kilisto ndyôdi adi.

²²⁴ Nansha Shawula pende, kumpala kwa kulekelaye bya mvita byende, wakanji kukopola bya mvita byende bya cyena ntendeleelu, kwenzaye mwakenza Davidi amu. Kadi paakafika Shawula kundekeelu kwa njila, wakamba ne: “Ngaalwanganyi mvita mîmpè.” Awu nguvwa mwena lukuna wa ndekeelu wa

kucimuna. “Ngaalwanganyi mvita mîmpè, ngaajikiji lubilu lwanyi, ngaalami Diitabuuja. Kubangila ku leelu ewu kudi cifulu cya butumbi cinteekela, cìikalà Mukalenge, Mulumbulwishi mwakane, mwa kumpa mu dituku adi.” Yèyè ne: “Kî ng’anu mèmè nkayaanyi to, kadi bônso badi banange dimweneka Dyende.”

225 Kaa, lufu kwamba ne: “Kadi’s nênkupètè mu tusunsa tukese emu.” Ki lukita ne: “Mèmè’s nênkuboleshe muntwamu.”

226 Yèyè kwamba ne: “Wèwè lufu, kalonda keebe kadi penyi? Wèwè lukita, bucimunyi bwebe budi penyi? Ndi mumanye ne ndi mulaadika mwab’ewu mu kàshô kaa beena Loomo aka, muswika nkanu, maboko aanyi ne byanza, ne ndi—ndi mupete mibundabunda makumi asatu ne citeema mu mwongo mwanyi emu. Ndi mwab’ewu ne binsonji bingosha mu mèsu mu mushindu wa nciyi mwa kumona kabidi to. Ncyèna mwa kumona ne dîsù dyanyi dya mubidi to, kadi ndi mwa kumona cifulu cya butumbi cya bwakane citeeka dyamwamwa. Tupombo twanyi tukaadi tupeluke. Nkaadi munyaanunuke bikole bwa dyâmpà dya kale dikwate bundundu didîbo biimanshe mwab’ewu, ne nkose mindandale pambidi, ne ntanda ne bikwabo, mu mushindu wa ne nkaadi muteketangane.” Kadi yèyè uvwa mwa kwimana kumpala kwa lufu ne kwamba ne: “Kalonda keebe kadi penyi? Lukita, bucimunyi bwebe budi penyi?” ne nkanu yinyungakana ku byanza. Aleluuyah! (Ki cidi citukengela ncyôci aci.) “Lukita, bucimunyi bwebe budi penyi?”

Lukita kwamba ne: “Mèmè’s nênkubolèshè, Pòlò.”

227 Yèyè kwamba ne: “Kadi twasakidila kudi Nzambi, nkaadi mumane kupeta bucimunyi mu Mukalenge wetu Yesu Kilisto.”

228 Pavwaye ne butekètè apu, cyende—cyende cya cyena ntendelelu, cyende. . . byende byônso bya mishingà bikaavwa bimana kwengulula ne byumusha kudiye. Mabeji ende a diteekiibwa mu mudimu bakaavwa bamane kuàngata. Kacivwa kabidi mwena Assemblées to, anyi mwena. . . yônso wa ku yôyi ayi. Nwamonu’s, kacivwa kabidi mwena nî ngwèpi wa ku yôyi ayi to. Ûkaavwa mwakule bikole uyilwisha mu mushindu wa ne beepiskopo abu bakaavwa. . . bambe ne: “Wèwè udi uswa kungambila ne muntu mu buloko bwa beena Loomo bwa bidimu makumi abidi muntwamu udi mwa kutwambila bwa kubenga kulekela bakaji beetu kuyiishabo anyi? Huh! Kùtwâmbidî aci to,” ne, “tudi bamanye bipite apu. Yèyè mulumyana mwine wawa nganyi pende’s, twamb’eku twamb’eku, ùtwâmbila pende bwa twètù kwenza *cikampanda*, *cikansanga* anyi *cikankenga*?” Bôbò ne: “Twètù’s tudi bamanye citudi twenza.”

229 “Eyo,” mwakamba Pòlò, “kudi bantu baajuuka munkaci mwenu amu, biikalà mwa kubanga bulongolodi anu abidi adi panshi aa, bajuuka ne buumushangana ku Diitabuuja mushindu awu, kabayi ne Nyuma wa Nzambi to.” Yèyè ne:

“Bakaadi bamane kupatuka munkaci mwetu bwalu kabavwa baa kutudi to.”

²³⁰ Nenku, ciine aci, cyakenzeka anyi? Cyakabwela buludi mu ekeleeziya wa Katolike; kuumuka mu Katolike kubwela mu ba-Luthériens; amu nanku too ne ku wa ndekeelu, Assemblées de Dieu, cintu cimwecimwe aci, benza cintu cimwecimwe aci.

Dìbà dyònsò, cintu cimwecimwe aci!

²³¹ Kadi, kaa, bwebe wêwè mulume anyi mukaji udi ne butekètè bukumbane, udi ufika ku dyumvwa butekètè bwebe awu, wíkala mwa kulekela Nzambi ukwata neebe mudimu awu! Nyewu ndi anu mutungunuke ne kwakula, ngeela meeji ne mêmè ntu ngaakula ntanta mule be.

²³² Mpindyewu, civwa ncinyi ciine aci? Mpindyewu, yêyè uvwa . . . Davidi ki uvwa kayi mutambe kulonga mu musumba awu. Kavwa muye mu kalaasa kaa dilwangana dya mvita to, kavwa ne civwaye mumanye pa biine abi to. Nenku kavwa ne kalaasa kalonga pa mvita yivwa miteeka kumpala kwende eyi to, kadi ùvwa mujingulule ne kuvwaku Nzambi kampanda. Ki kwangataye kaacintu kavwa katambe kwikala kaa butekètè; bôbô bavwa ne mafuma, ne bya mvita, mata a mikete, ne bikwabo byònsò, kadi Davidi uvwa ne ndundu mukese wa nyuunyi ne lusakalabwa lwelamu. Kadi, nwamonu’s, yêyè uvwa mumanye civwaye mwa kweyemena. Wakatonda butekètè bwende, kadi diitabuuya dyende mu Nzambi.

²³³ Kwambaye ne: “Ncyèna muswe ngabu mwikale munjike bwa kutondolaye ní ncinyi ní ncinyi nansha. Ncyèna muswe kukafika kwaka, ngamba ne: ‘Mpindyewu, nwênù bânà beetu nudiku baswe bwa kungeela mu diboko anyi? Mêmè ndi wa mu beena Assemblées, ndi wa ba-Presbytériens, ndi Méthodiste, ndi Baptiste, nwênù bânà beetu nudiku mwa kuswa bwa kungeela mu diboko anyi?’ Ncyèna muswe kumanya cintu nansha cimwe cya ku bintakanyi abi to. ‘Mona, nênkuleejè mu mpaaya mwanyi emu, ndi ne dipolome dyanyi. Ndi mfuma ku dipeta dipolome dyanyi dya B.A. Ndi mupatukile mu Tulaasa tutumbuke twa *Kampanda*, ki mûndi mêmè—mêmè mulongele. Ntu mupete nanku. Kaa, s’ndi mwa kwakula’s! Ndi *cikampanda*, *cikansanga*, anyi *cikankenga*.’” Kavwa yêyè muswe nansha cimwe cya ku bintakanyi abi to!

²³⁴ Cyònsò civwaye muswe, wakamba ne: “Ndi mêmè ne dyeyemena dyanyi mu Nzambi nenku’s ki mêmè uyaaya ewu.” Ki cyòci aci. Ki muntu wa mpolondo awu kulaalaye panshi. Ncyà bushuwa.

²³⁵ Ki cidi cikutengela leelu wa Ndaaya ewu, mwaneetu. Bidi bitukengela, leelu ewu, bantu bu Davidi, kî mmalabula a tulaasa tutumbuke nansha.

²³⁶ Ùvwa m’Miika mukese awu, Miika mukese awu, mwânà wa Imla, mupele, mubengiibwe, mwipata mu mangumba ònsò bwa

mushindu uvwaye mwimane ne lulamatu kumpala kwa Nzambi. Kadi kulwaku muntu wa Nzambi musangu kampanda, mupweke kuntwaku, dînà dyende Yehoshafata, ki kwambaye mwômò amu ne: “Ndi muswe kumanya Dîyî dilelela dya Nzambi.”

²³⁷ Shawula kwambaye ne: “Ndi naabo nkama inaayi baa batambe bwîmpè baa kacya wâmanya.” Yêyè ne: “Bônsò mbapete mapolome abo, bônsò mbalongeshiibwe mu tulaasa twa mwaba ewu.” Yêyè ne: “Mona’s, mbyaiishi batambe bwîmpè baa kacya kuyiku mwanji kuteeleja to.” Yêyè ne: “Nêmbàpàtùlè pambelu apa bwa twètù kukonka Mukalenge bwebwe wêwè.”

²³⁸ Kadi pashiishe kupatukaye mwaba awu ne kukenzakanaye, Yehoshafata kwambaye ne: “Eyo, ndi ngumvwa ewu wamba *cikampanda*, ne ndi ngumvwa wawa naka ucyaamba, kadi,” yêyè ne, “udiku ne mukwabo anyi? Kwênàku ne mukwabo anyi?”

²³⁹ Nzambi uvwa ujinga kufila mukenji kudi mwoyi wa lulamatu ewu. Kuvwa anu umwepele wa kudibo mwimane mwaba awu, kadi Nzambi udi ne muntu bwa wôwò awu. Amen. Kwôkò mwoyi wa lulamatu anu umwepele, mwaba kampanda Nzambi udi ne muntu bwende yêyè. Yehoshafata uvwa muntu wa bushuwa, mfumu wa uciina Nzambi, ne ùvwa ne cyumvwidi cikumbane bwa kumanya ne mikenji yabo ayi yivwa ya mafi. Ùvwa mumanye ne civwa cibengangana ne Dîyî, amen (Kaa, Mwaneetu Neville!), Yehoshafata’s uvwa mumanye aci.

²⁴⁰ Yêyè ne: “Ee, ndi—ndi muye too ne kundekeelu kwa bwalu bujima, dizola edi mu seminere ewu, ndi mupatwile yônsò wa kudibo mwômò emu.” Yêyè ne: “Tangila kuneeku, ewu yêyè utu mupete. . . ee, tangila mapolome adiyè mupete. Tangila ewu nunku,” ne, “tangila—tangila mapolome adiyè mupete. Tangilaaku Zedekiya ewu, yêyè ki mfumu wa cyônsò aci. Mona’s, yêyè ngudi mwepiskopo, yêyè ngudi kumutu kwetu bônsò. S’ncyà bushuwa ne wêwè neutwe ku cyende!”

Yehoshafata ne: “Eyo,” yêyè ne, “ndi—ndi—ndi. . .”

²⁴¹ “Ee, tangila, tangila, bakwabo bônsò badi bapetangana nende. Bônsò mbadyênzè cimuku! Kabidi kwêna mwa kwamba ne kî mbeena Ebelu to. Kwêna mwa kwamba ne kî mbaprofeta to, dipolome’s ndyôdî edi dijaadika ne ki cidibo.”

²⁴² Yehoshafata ne: “Eyo, ndi—ndi—ndi mumanye, Aakaba.” Yêyè ne: “Aci—aci cidî anu cîmpè, kadi. . .”

²⁴³ Yêyè ne: “Ncinyi cyûdî. . . Mmunyi muwandomba kabidi mukwabo? Cilongelu cyanyi cijima’s ncyôci aci! Malongolodi ônsò’s ngôwò awu pamwe.”

²⁴⁴ “Kadi kwênàku ne mukwabo udi kayi wa mu kasumbu kiine aku anyi? Kakwenaku mukwabo, kaaba kampanda anyi?”

²⁴⁵ “Ee, awu yêyè mmufwanyine kwikala wa bishi’s? S’mmufwanyine kwikala cinyonga kaciyi cilonge kalaasa’s!

Ee, cyûdì mufwanyine kukeba ncinyi kudi muntu wa mushindu awu?”

²⁴⁶ “Kadi—kadi’s ndi nkukonka paanyi cyanaana, kwênàku nende, kaaba kampanda anyi?”

²⁴⁷ “Kaa,” yêyè ne, “eyo, kudi wa nanku awu’s.” (Mwaba awu, kaa, twasakidila kudi Nzambi bwa aci!) “Kudi wa nanku awu, kadi,” yêyè ne, “ntu mumukine. Ne bakwabo bônso mbamukine, nansha bôbò.” Yêyè ne: “Tutu bamwipate, batu bamwipate mu bulongolodi amu, bulongolodi ne bulongolodi bwônso.” Yêyè ne: “Wakalwa muneemu emu bwa kwenza disangisha, ki twêtù kumwipata mu cimenga emu. Eyowa’s mukalenge. Twêtù katwakwikalaku nende dijinga to. Ee,” yêyè ne, “udi ne butekètè be, kabidi mmufumine mu famiye wa bapele baa menemene. Wende mwakulu mwine’s mmubi be.” (Uh-huh, bu Moody, nudi bamanye’s.) “Eyo, wende mwakulu mwine’s mmubi be.” Ki yêyè ne: “Mu bulelela, bwa mwena teoloji, yêyè kadi ki mupele wa kacya ngúmvwakù paanyi. Ncituku mwanji kuumvwa cintu bu yêyè awu to. Kaa, yêyè udi anu unyangakaja mushingà wabo. Mona’s, Diitaba dyabo dya Bapostolo yêyè’s mmudivingile anu panshi. Kacya ncituku mêmè mwanji kuumvwa cintu cya bu nanku to! Kaa, yêyè udi anu ubisunsulula, nenku bôbò mbamukine ne mêmè paanyi ndi mumukine, bantu bônso mbamukine.”

²⁴⁸ “Kaa,” ki Yehoshafata awu, “mfumu kambiku nanku to, kadi mêmè ndi muswe kumuteeleja.” Yêyè awu nguvwa mumanye civwa Elisha mwambe! Ûvwa mumanye cìvwàku.

²⁴⁹ Nzambi uvwa mucinguluke bayiishi banene bônso, baa dikanda, baa mamanya a mu mitu abu, kadi kuteeka Mukenji Wende mu kaamuntu kavwa kamba ne kî nkamanye cintu aku. Kadi yêyè awu cyakenzaye ncinyi?

²⁵⁰ Kumwelabo diteeta, kwambabo ne: “Mpindyewu, wămbè peebe anu cintu cimwecimwe cidibo bôbò bambe aci.”

Yêyè ne: “Mêmè nêngămbè cidi Nzambi uteeka mukana mwanyi aci, kwajiki.”

²⁵¹ Awu ne: “Pawikala muswe kulwa ne dikanda mpindyewu, vuluka ne udi anu . . . udi—udi mu mushindu kampanda pambelu paa bulongame mwab’ewu, mulumyana. Wavuluka ne, wêwè ewu batu bakwipate mu bulongolodi abu. Mbafwanyineku kutangilula buumambala bwebe bu wêwè mwa kupetangana naabo ku mêtî mu cikondo cya cimvundu bu eci. Tudi bônso munkaci mwa kudilongolola bwa kwenza kampanye kanene,” yêyè ne, “bu wêwè mwa kupetangana naanyi ku mêtî.”

²⁵² Yêyè ne: “Ncyakwambaku cintu to anu cidi Nzambi mwambe!” Kudya cibanga, nudiku bafwanyine kwindila ne muntu wa Nzambi adye cibanga pa Dîyî dya Nzambi anyi? To, mukalenge, aci kacitu mu bôbò to.

253 Awu ne: “Kadi wêwè’s nyawu ne butekètè bwa dikema. S’udi wa mu famiye mupele. Mona’s, udi mumanye mudi bwalu, mbafwanyine. . .”

“Ncyèna ntanga cidibo bôbò benza to.”

254 “Ee, s’nebakwambule mu ndeke baye neebe ku ditunga ne ku ditunga. S’mbafwanyine kwenza nî ncinyi cyônsò, wamonu’s, bu wêwè—bu wêwè anu. . .”

255 “To, to. Mémè nêngâmbè anu cidi Nzambi uteeka mukana mwanyi aci.” Nzambi wakacinguluka musumba mujima awu, (eyowa’s, mukalenge, diimana dyende dya bushuwa ndyakacyenzà) kucinguluka nkama inaayi ayi kadi kumupa yèyè EMU MMUDI MUKALENGE WAMBA!

256 Pa dîbà adi baakaCiitaba anyi? To, mukalenge! Baakamba ne: “Aci kî ng’EMU MMUDI MUKALENGE WAMBA to, wetu seminere katu ulongesha bintu bya nanku to. Ee, wetu mwepiskopo’s nyèyè ewu, ùkaadi mumane kwamba dîyî, yèyè ngutu mufunde mushingà awu. Tudi badisangishe bônsò pamwe, benze bilongelu byetu. Nzambi udi neetu twètù! Nzambi mmupatuke mulonde njila kaayi bwa kuumuka kutudi kadi kulwa kûdi wêwè?”

Yèyè ne: “S’nenumone, kumpala eku.” Uh-huh, ncyà bushuwa.

257 Yèyè uvwa bishi? Ûvwa ne butekètè, kadi yèyè nguvwa mutambe kwikala ne dikanda munkaci mwabo. Bwa cinyi? Bwalu ùvwa ne Dîyî dya Mukalenge. Kaa, mwaneetu, ndishiilangana kaayi didi cyôci aci cyenza pa. . .cintu cikwabo cyônsò paudi wêwè ne EMU MMUDI MUKALENGE WAMBA?

258 “Amba tûng, Mwaneetu Branham, bu wêwè mwa kudyaku cibanga pa Dînà dya Yesu pa bidi bitangila dibatiiza, ee, s’netwènzè disangisha dinene mu Chicago anyi mu myaba mikwabo bu mudi ewu.” Huh! Nudi nwela meeji ne nenwènzè nanku? Kunudi nudisangishila nansha kwikale penyi, ne ciine cinudi nwenza aci, mwaneetu, shaala ne EMU MMUDI MUKALENGE WAMBA.

259 Ndi muswe bamwe baabo balwe bangambile mwaba udi Aci ciikale cya mafi. Ndeejaayi mu Dîyî dya Nzambi mwaba udi Aci ciikale cya mafi. Eyo. Kabaakubundulaku aci to. To, mukalenge. Kadi Cidi ng’EMU MMUDI MUKALENGE WAMBA! Shaala naaCi, piikala yônsò wa kudibo mukwipate. Nansha wêwè mushaale ne butekètè bwa bishi: “Pa dîbà adi ki pândi ndwa ne dikanda.” Pangipatabo, Nzambi neangaakidile. Uh-huh, eyo. Nzambi. . .Badi bakwipata, Nzambi ukwakidila.

260 Wavuluka ne, anu bisota ki bitu Nzambi misangu yônsò wangula, bantu cyanaana abu. Pa dîbà adi Yèyè udi ubavwija *baakampanda* bwende Yèyè. Bidi mwa kwenzeka ne kiikadi

mucimanye mu eci cikondo, kadi necimanyike mu cilwalwà; nwamonu's, ki yêyè awu.

²⁶¹ Ki kumupa EMU MMUDI MUKALENGE WAMBA, bwa cinyi? Yêyè uvwa mushaale ne Dîyi. Ûvwa ne Mukenji wa bushuwa. Nzambi wakamupa cikeena-kumona. Bakwabo abu kabavwa ne cikeena-kumona nansha cimwe to. Nwamonu anyi? Yêyè wakapeta cikeena-kumona. Bwa cinyi? Bwalu yêyè uvwa mushaale ne Dîyi. Pa mwaba awu ki patudi bamwene bimanyinu ne maalu a kukema. Bwalu. . . Bakwabo abu badi babikwatakaja bifwanangane naaCi, kadi yêyè uvwa mushaale ne Dîyi. Mpindyewu tulwijakajayi.

²⁶² Eliya, mpa dîbà divwa ekeleeziya wende mumwipate ne mumulekele muye ku maalu a pa buloba a cyena leelu. Ngeela meeji ne Eliya uvwa mubayoobeshe anu menemene. Kanwena nudifwanyikijilaku peenu nanku anyi? S'nudi bamanye civwa Eliya. Ndi ndifwanyikijila ne, ku ntwadijilu wa mudimu wende wa bwambi, wakiimana kwaka e kwamba ne: “Mona's, nwênù bakaji badi bakeba kufwanangana ne Inăbànzà wa Kumpala aba,” bavwa bavwale tufulu twa bonnets abu, nudi bamanye's, “Mandemwazele Izabela! Nwênù bakaji baa cyena leelu aba, badi bafwanangane ne Inăbànzà wa Kumpala wa ditunga, nuvwala bu yêyè, nwenza maalu bu yêyè. Nwênù bayiishi!” Kaa, ekelekele, mushindu mwine wakabayoobeshaye's we! Kadi baakatungunuka ne kudishinda misangu yônsò too ne paakashaalaku kakuciya muntu nansha umwe to.

²⁶³ Bivwa bikengela afike kundekeelu kwa njila wende. Muntu nansha umwe kacivwa muswe kumwela mu diboko to. Nansha umwe wa ku maekeleeziya kaakaswaku kumwela mu diboko to. Bônsò baa mu ekeleeziya wende baakamushiya, kwalukilabo mu maalu a pa buloba (bya mwomumwe ne mudibi mpindyewu), ncyá bushuwa, baakaalukila mu maalu a pa buloba. Anu bakese menemene mbaakashaala bakwateku, umwe apa ne mukwabo pààpa, bafumina mu ditunga dijima muvwabi bikengela nwênù kuya kamumona amu, ne bikwabo. Ûkaavwa mu mushindu mubi be, ùkaavwa mufike kundekeelu kwa dimanya dyende.

²⁶⁴ Kwambaye ne: “Mukalenge, ngîmànyì pa Dîyi Dyebe, ngâmbì Bulelela. Kadi bônsò baa kudibo nyewu baayi, kakuciya nansha umwepele mushaale mwab'ewu. Nyewu nciciyi, nciciyi nansha ne muntu mwine wa mêmè kuyiisha to.” Amen. “Eyo, ngîmànyì pa Dîyi Dyebe, Mukalenge, kadi monaaku kûnkaadì mpindyewu, nansha umwe wabo kayi muswe kungaakidila. Ndi mbwela mu cimenga, bamba ne: 'S'ki mukulakaji wa cimfiikaamunda ulwâlwa ewu. Eyo, eyo, s'ki mukulakaji wa cimfiikaamunda ulwâlwa mu cimenga ewu, mpindyewu neabange kwenza maalu a lukutukutu—lukutukutu pa bidi bitangila nsômbelu wa cyena leelu ewu ne bikwabo byônsò.”

265 “Kanumwakididiku to! Mpaasata, kwedi mulumyana awu mu diboko to! To, mukalenge!”

266 Mpaasata ne: “Mpindyewu mukoleshi wa maalu wa kale awu nyawu cyakabidi mu cimenga. Nwamonu’s, Eliya wawa, mukulakaji wa dibàlà awu. Kanuteyiku ntema kudi mulumyana mukulakaji awu to. Mutangilaayi numone, kayiku nansha muvwale mùtù mulombodi wa ekeleeziya uvwala mizabi ya bunsaserdose mudi wanyi mèmè ewu to (cifulu cyende, nudi bamanye’s; wimana kumpala aku, ne nshingu wa nkoòlò awu, nudi bamanye’s).” Yèyè ne: “Yèyè kèna. . .” Yèyè ne: “Ùdi—ùdi. . .ùdi. . .ùdi mushindu mushiilangane wa. . .Mmu—mmulumyana wa mushindu wa pabwawu.”

267 Nenu ndi ndifwanyikijila bamwe baa ku balumyana baa banene abu bamba ne: “Udi mumanye mudi bwalu anyi? Yèyè—yèyè’s mmunyanguluke mutu. Uh-huh, eyowa’s, yèyè—yèyè’s mmunyanguluke mutu, mukasòmbèle yèyè mu cipeela mwamwa, ùshààla mu meetu misangu yàbùngì, ùlwa muneemu mudijingile kapese kaa ciseba cya mukooko. Kaa, ekelekele! Ki pashiishe ùpiissha bakaji abu! Mèmè kacyakacya nciwu mwanji kumonaku cintu bu nanku to. Kanwikadi. . . kanwikadiku—kanwikadiku—kanwikadiku nende bwalu nansha bumwe to, nansha kakese! Kanumwediku mu dibokweee!”

268 Ee, nsangilu wa bambi ukaavwa mudisangishe, nudi bamanye’s, mwambe ne: “Kanwikadiku—kanwikadiku bònso bwalu nansha bumwe bwa. . .Mulekelelaayi, ndekeelu wa byònso yèyè. . .yèyè meeji neamushiikile. Nwènù mulekelaayi—mulekelaayi àsamè too ne mwamutaayika bwongo. Kwajiki, mulekelaayi.”

269 Kadi mukulumpe Eliya, wenda anu mu lulamatu kudi Nzambi, (Ekelekele, ekelekele.) kushaalaye anu ne Dîyi. Bavwa mwa kwenza kaadisangisha kakese lwa kwinshi aku, ne yèyè mufwanyine kutuma mèsù mu bateeleji amu, kwamba ne: “Nwènù bònso ba-Izabela aba!”

270 “Kaa, dikamakama kaayi! Mèmè ncyadyakuyaku kateeleja muntu awu kabidyee! To, mukalenge. Nansha kakese!”

271 Aci kacyakamwimanyikaku to, wakashaala mwaba awu anu bu ne kakwena bwalu to. Paakajimijaye ekeleeziya wende, paakajimijaye ende. . . mangumba ònsò kumukudimukilawu, ki pa dîbà adi (paakapetaye butekètè) paakambaye ne: “Mèmè ki umwepele udi mushaale, kadi nyewu benda bakeba bwa kunshipa.” Yèyè ne: “Mbafwanyine kungaasa cingoma bu ne bavwa mwa kucyenza kabayi banyookiibwa to.” Uh-huh. Nwamonu anyi? “Kadi ndi. . .Badi benda bakebangana ne mwoyi wanyi. Nenu mèmè ki umwepele udi mushaale, Mukalenge, cindì mwa kwenza ncinyi?”

272 Pa dîbà adi, paakashaalaye mu butekètè (kadi mwikale mwimane mu lulamatu, utonda butekètè bwende ne bikwabo

byònsò), ki paakamba Nzambi ne: “Bànda pa mukuna, Nénkupè mukenji mupyamupya. Nénkutùminè mukenji mupyamupya mpindyewu. Nkaadi mumane kukwambila ne: ‘Nda ukapiishe bintu ebi,’ mpindyewu Nénkwalùjèku ne cintu kampanda bwa kujaadika ne Aci civwa ncyà bushuwa.” Yèyè ne: “Wenji mudimu mwìmpè, Eliya. Wabàmbìdì bwa Inàbànzà wa Kumpala, ne byònsò abi, ne mushindu udibo benze. Wapiishi Aakaba ne bintakanyi byende byònsò bya cyena leelu ne ekeleeziya yònsò ya cyena leelu ayi, ne twambidi bayiishi abu luseke ludibo basanganyiibwa. Wèwè nguvwa cileejilu. Wimanyi mwaba awu kuyi ne dikwacisha nansha dimwe, kuyi ne bulongolodi nansha bumwe, kuyi ne cintu nansha cimwe paanyima peebe, kadi washaadi ne Dìyì Dyanyi. Mpindyewu Nèngùikalè mwa kukupa cintu kampanda. Pweka kuntu kwaka wambile cyena lubombo aci ne: ‘EMU MMUDI MUKALENGE WAMBA! Kakwakumataku nansha lumuma mu Dyulu to too ne pàngàalubiikilà mèmè.’” Ekelekele! Ekelekele! Yèyè kumubàndisha pa mukuna apu bwa kumuleeja cintu kampanda!

²⁷³ Kaa, ndi mwa kumumona mu dinda adi, wenda ulwa, wenda upweka ne njila wa ku Samaaleya awu. Kavwaku ne bulenga bwine bwa kutambabo kumutangila to, cya bushuwa’s, mutu wa dibàlà awu ubalakana ne muunya, ne mvyà ne mwedi cipambà ku cibanga, ne kapesè kaa ciseba cya mukooko. Bible mmwambe ne yèyè uvwa “ne myòsà” pambidi, myòsà pambidi pajima, ndi ndifwanyikijila ne uvwa ne bukooya pa kumutangila; ne kaadikombo kakesè kaa kale aku mu cyanza, ne twisù tukese tukulakaji atu tutangija buludi mu maulu, wenda upweka ne njila. Nenku nudi...yèyè...ngela meeji ne uvwa wenza maalu bu muntu wa bidimu dikumi ne bisambombo pende mwikale naabi bitwe ku makumi mwandamukulu. Ki yèyè ulwàlwa ewu, wenda upweka ne njila, mutangile buludi ku Samaaleya. Mwaneetu, yèyè’s ukaavwa pa dibà adi mumane kuvwijiibwa ne dikanda mu butekètè bwende abu: “Dikanda Dyanyi ndikumbane. Kwikadi utacisha mwoyi bwa malongolodi to, wèwè Eliya. Kwikadi utacisha mwoyi bwa òwò awu to, dikanda Dyanyi ki cyònsò cidi cikukengela.”

²⁷⁴ Ndi mvuluka ne mvwa mwimane ku luseke lwa ntempelu munene kampanda musangu mukwabo, ki mèmè kwamba ne: “Mukalenge, ndi mufwanyine kukina bwa bòbò kulwabo ku byanyi—byanyi bìrò.”

KwambaYe ne: “Mèmè ki cyebe Citupa cikwabanyina.” Nwamonu anyi? “Mèmè ki cyebe Citupa cikwabanyina.”

²⁷⁵ “Mu—mu butekètè pa dibà adi ki mûndi—ki mûndi... Dyanyi dikanda dikole. Diswa Dyanyi dipwangane didi mwa kwenjiibwa (Pòlò, anyi Eliya, nansha wèwè nganyi) paudi umuka mu njila.” Nwamonu anyi? “Mu butekètè bwebè wèwè abu, pa

dìbà adi Mémè ndi mvwijiibwa ne dikanda. Mémè ki Yèyè awu! Mémè ki Wa Dikanda udi ubwela ne uuja.”

²⁷⁶ Ndi mwa kumumona wenda upweka ne njila wa ku Samaaleya awu, twisù tukese tukulakaji atu tutangile mushindu *ewu*, balumyana wa yaaya, ne mimwemwe ndambu kwisù's. Mwaneetu, kuyaye tamakatamaka too ne pabwîpî ne Aakaba. Kaakakukuminaku to, kaakazaazabalaku to. To, to! Mwinshi mwa kaacyâdi kakese kaa kakulakaji kâkaavwâ kashaale anu dikoba aku mùvwa mùtuuta mwoyi uvwa ne Nyuma Mwîmpè musòmbèlemù. Eyowa, bushuwa's! Kulwaye wenda upweka ne njila, kuyaye tamakatamaka too ne kumpala kwa Aakaba, kwambaye ne: “Nansha lumuma kalwakumataku to too ne pângààlùbùikilà mémè.”

²⁷⁷ Ûtuuta mikuma ya makàsà panshi, ùkùdimuka, ki yèyè udi walukila mu cipeela wawa. KwambaYe ne: “Civwa mudimu mwîmpè, Eliya. Bândaaku kuneeku, Ndi mutumine bikololo byònsò dîyî bwa kukudiishabi mpindyewu, ne...nenku anji sòmbelà panshi ndambu mwab'ewu.” Kaa, ekelekele!

²⁷⁸ Pavwaye ne butekètè apu, ki paakalwaye ne dikanda. Eyowa's, mukalenge. Kunyukushaye maulu bwa mvula kamaci to. Ki paakalwaye ne dikanda mpòpò apu, paakajimijaye ekeleeziya wende, paakajimijaye byònsò bivwaye naabi, bikwabo byònsò. Kadi wakashaala ne Dîyî dya Nzambi, pa dìbà adi ki paakapetaye bukole bwa kukanga maulu.

²⁷⁹ Paakajimija Yakobo dikanda dyende dyònsò, pa dìbà adi ki paakamupa Nzambi bukole bwa kulwaye mwànà wa mfumu. Nwamonu anyi?

²⁸⁰ Paakajimija Pòlò tulaasa twende twònsò tulonga ne teoloji wende awu, Nzambi wakamuvwija missionnaire ku baa Bisamba bya bende.

²⁸¹ Paakajimija Mòsà dikumbanyina dyende dyònsò ne kulwaye ne butekètè, Nzambi wakamuvwija wa bukole ne wakamutuma mu Ejipitu mu bukole bwa Nyuma, pakaavwaye ne bidimu makumi mwandamukulu; ne mwedi cipambà, mukajende musòmbè pa kampundu ne mwànà mwambula ku lubese, ne dikombo mu cyanza, kupwekaye e kucimuna Ejipitu. Eyo. Nwamonu anyi? Kayi ne cilwilu paanyima pende to, muvwaye ujinga kuya, kadi mu bukole bwa Nyuma. Amen!

Paudi ne butekètè mpa dìbà adi paudi ne dikanda.

²⁸² Wenda wenda anu mu njila amu, kaakazaazabalaku to, kaakatetukaku to, kaakenzaku cintu nansha cimwe to, wakaya tamakatamaka too ne kumpala kwa Aakaba, kwambaye ne: “Ndi ne Dîyî dya Mukalenge.”

Awu ne: “Wèwè ngudi utacisha Izaleela's.”

²⁸³ Yèyè ne: “Wèwè ngudi utacisha Izaleela.” Eyowa's, mukalenge. Kaa, mwaneetu! Eyowa's, mukalenge. “Twala

baakwidi baa mamanya a mu mitu baudi naabo mwab'ewu abu, bwa tumone ne udi Nzambi nganyi.” Ki bwalu mbwabu's. “Bàndaayi ku mutu wa Mukuna wa Kaamèlèlè, Nzambi wa bwena wâkandamuna dya Mpenta awu andamune cyakabidi. Tumonaayibi Nzambi ní uci di Nzambi umwèumwè awu, Yesu ní udi umwèumwè awu makeelela, leelu, too ne kashidi.” Yèyè kutuuluka ku mukuna, mwikale ne Mukenji. Eyo. Ùkaavwa mulwe ne butekètè bwa dikema kumpala, nansha nanku, ùkaavwa mujimije byònsò kumpala kwa kucyenzaye. Byakakengela bwa kulwaye ne butekètè kumpala kwa kumonaye mwa kulwa ne dikanda.

²⁸⁴ Bupwekele bwa Evanjeeliyo mbudi bulendwisha bantu. Bòbò mbaswe kuCivwija cintu kampanda cikwabo cinene cya mamanya a mu mitu, padici ciikale bupwekele. Kadi Nzambi utu wangata cyamu ciine cya mudimu cya didipwekesha ne butekètè ne bupwekele aci, bwa kukwata naaci midimu Yende. Citu anu cyamu cya mudimu cyanaana mu cyanza cya Nzambi.

²⁸⁵ Yone Mubatiji, Mukenji wende, mudyanjididi wa Kilsto awu, mutambe kupwekela bikole mu mushindu wa ne Wòwò wakapicila bantu pa mitu. Telejaayi anu kakese cyanaana. (Ndi ntekemena ne ncyèna nmulama mukùngùlù mupitepite bule nansha, nwènu badi biimane balonde bimanu abu, nwamonu's.) Tangilaayi! Yone, pavwa...Baprofeta bònsò baakafila bujaadiki bwa dilwa dya Maasiya. Umwe wabo wakamba ne “Mikuna neyitupike bu twànà twa bimpanga bya mikooko.” Bakwabo kwambabo ne: “Mabeji neatuute bikashi.” Mukwabo ne: “Myaba yònsò ya mipweke neyivwijiibwe mibànde, ne myaba ya mibande neyivwijiibwe mipweke.” Kaa, ekelekele! Ndituku kaayipu's we!

²⁸⁶ Nukaadiku badifwanyikijile Cilongelu cya Baprofeta ne mmwenenu wa mu mutu wa ciine aci anyi? Kaa, ekelekele, bòbò kuvwija byònsò abi bya tulaasa's! Kadi paakenzeka bwalu abu, mu cipeela kupatukamu muyiishi mukulumpe uvwa kacya kayiku mupete dituku nansha dimwe dya kulonga kalaasa to kacya baamulela, pàmwāpa mwakulu wende uvwa mushaadile bikole. Tatwèndè uvwa mwakwidi, kadi Nzambi kumuumusha ku ciine aci. (Tuvwa bacimone mu dileesona dya dyalumingu dyàshàadi edi.) Kayi mwa kuswa bwa kumulekela ukabwelakana ne mangumba awu to, ki kumupatwila kuya nende mu cipeela bwa Yèyè mwine kumulongesha. Wa mushindu awu—wa mushindu awu ngwashaala ne Dìyi dya Nzambi.

²⁸⁷ Kupatukilaye mu cipeela, mwikale ne bidimu bitwe ku makumi asatu; ndi ndifwanyikijila mwedi mufiike mulembelele ku cibanga, mushitakane; cipese cya kale cya ciseba cya mukooko cijingila pambidi; mwimanyine mu bitoci, bimufikile ne mu binù; wamba ne: “Mémè ki wâkambabò kudi muprofeta Yeshaayi awu.” Ki bamwe baa mu mangumba kupatukabo; yèyè kwamba ne: “Kanwikadi nwadyelela meeji munda mwenu

amu ne: ‘Tudi ne *cikampanda* ne *cikansanga*’ to, Nzambi udi ne bukole bwa ku mabwe aa kujuudila Abraham bàna!” Kaa, ekelekele! Bwa cinyi? Ûvwa ne EMU MMUDI MUKALENGE WAMBA! Ûvwa ne Mukenji. Nzambi ukaavwa mudyanjile kwamba ne nealwe. Kadi kabingila. . . Wàkalwa mu bupwekele bwàbùngì, mu mushindu wa ne Cyakabapicila pa mitu.

²⁸⁸ Paakalwa Yesu, Wakamba ne: “Nuvwa bapatuke bwa kuya kamona cinyi, mwakudi wa mamanya a mu mutu udibo mwa kukudimuna kuumumusha ku bu-Méthodiste kumutuma ku bu-Baptiste, ne kuumumusha ku bu-Baptiste kumutuma ku bu-Presbytérien, kuumumusha ku bu-Presbytérien kumutuma ku bwena Mpenta, ne kuumumusha ku bwena Mpenta kumutuma ku cintu kampanda cikwabo anyi? Nuvwa bapatuke bwa kuya kamona dilèngà didibo banyungisha kudi lupeepele kana lwònsò anyi? Bwa Yone to!” Yèyè ne: “Nenku nuvwa bapatuke bwa kuya kamona muntu muvwale bilàmbà bya lina mufinunuke anyi?” Yèyè ne: “Abu batu mu nzubu ya bukalenge ya bamfumu, mwambi wa mushindu awu.” Yèyè ne: “Nuvwa bapatuke bwa kuya kamona cinyi, muprofeta anyi?” Yèyè ne: “Mutambe ne muprofeta!”

²⁸⁹ Yone uvwa mutambe ne muprofeta. Kadi, tangilaayi, wakalwa mwikale mupwekele kutamba bwònsò bwabo. Kadi uvwa mutambe ne muprofeta. Nudi bamanye civwa Yone anyi? Ûvwa musanjeela wa cipungidi. Cya bushuwa’s, ki civwaye. Wàkaya kule kutamba ne pa muprofeta. *Muprofeta* mmwena lùmòndò udi umona maalu. Yone uvwa umona, yèyè pende, kadi ùvwa mupite ne piine apu. Ûvwa musanjeela wa cipungidi. Wàkamba ne: “Eyo, yèyè ewu ki wàkambabò ne: ‘Nèntumè musanjeela Wanyi kumpala Kwebe.’” Ûvwa nyèyè awu, ùvwa musanjeela wa cipungidi. Cya bushuwa. Mu mushindu wende mupwekele wa dilwa ewu, cyakafomija beena mamanya a mu mitu.

²⁹⁰ Mpindyewu bikengela tujikije mu katanci kakese emu, mu ndambu wa tusunsa tukwabo etu, neidi ne ndambu wa maalu mwab’ewu àndi njinga kwamba, ndambu wa Mifundu ne maalu mafunda pa mabeji.

²⁹¹ Twàmbè bishi bwa mukaji mukamba uvwa ne dyanza dya bukula awu? Wàkafika too ne ku butekètè bwende, pàmwàpa yèyè mwine ukaavwa ufwa lwa nzala. Kavwa ne kakula to. Kavwa ne kukwabo kuvwaye mwa kuya bwa kusomba bukula to, muntu mukwabo nansha umwe kavwa pende naabu to. Kadi wàkafika pa kaaba kampanda, mwena kwitabuujja munene, bayende uvwa muntu munene wa Nzambi. Kadi yèyè ukaavwa mukaji mukamba, mwikale ne mwànà. Kadi ùvwa anu ne dyanza dya bukula, kadi dyòdi adi divwa dikumbane, ki cyònsò civwa cimukengela; mudilambule mu byanza bya Nzambi, kushaalaye ne mwoyi ku dyòdi adi munda mwa bidimu bisatu

ne ngondo isambombo, ku dyanza dya bukula. Ûkaavwa mulwe ne butekètè.

²⁹² Kupatukaye mu dinda amu bwa kwangula tukunyi tubidi, bwa kutucibula ne kututwangaja. Nudi numona's, tukunyi tubidi atu n'Nkuruse. Nwamonu anyi? Kucibula... Wákamba ne: "Nyaaya kangula tukunyi tubidi." Kaakambaku ne: "Ndi nkatwangula diboko tente" to, mpindyewu, anu tukunyi tubidi cyanaana. Ki cyôci aci's. Nudi numona cimfwanyi aci anyi?

²⁹³ Nenku, eyo, mushindu wa kalekale... Mushindu wa kuteemesha mudilu mpindyewu, ngwa kwangata mici kadi kuyicyamakaja, kuyiteemeshila mudilu anu pankaci menemene apu. Pântù nya bwa kwenza kampoonyi, ntu... pa mikuna mêmà a bufuku, bwa kubenga kuuminyina ne mashika, ntu nteeka mucu mu ewu mushindu ne mucu mu ewu mushindu, nenku mu mêmà a bufuku awu mwikale anu nsaka ntengu ayi, ne mudilu uyoosha anu mushindu awu paudi useemena, nwamonu's, anu lwa mu nkuruse amu menemene.

²⁹⁴ "Ndi mwangule tukunyi tubidi. Nyaaya bwa kwosha dyâmpà, kulongolola bukula ebu, dyanza dikese dya bukula edi, bwa kwenza kâtô kamwe bwanyi mêmè ne mwanaanyi wa balume. Tukàdya peetu tumba tufwa." Yèyè uvwa bulelela mu butekètè, kî mmwômò anyi? Kwambaye ne... Kadi kukudimukaye e kubanga kwalukila. Kaa, dinda dya luuya lukole adi! Kaa, kukaavwa ntanta mule be kakuyi cintu to. Byônsò... Kakuyi mâyi to, bantu beela mbila, bantu bapùnga ne lufu, myaba yônsò; kakuyi mwaba wa kuya kasomba cintu, kakuyi cya dyanza nansha cimwe to. Ûkaavwa kundekeelu kwa njila. Ûkaavwa mu butekètè bwende. Kwambaye ne: "Nyaaya nkabulongolole bwanyi mêmè ne mwanaanyi wa balume, pashiishe netudye kadi tufwe." Ki yèyè kukudimuka e kwamba...

²⁹⁵ "Indila kakese!" Kutangilaye paanyima. Ki mpala mukulakaji mubwikakane awu winangidila dyamwamwa dya ciibi cya lupangu lwa kwinshi kwaka, wamba ne: "Anji nda ukangenzele mêmè dyambedi kâtô kakese, ukantwadile." Kaa! "Kankebele ndambu wa mâyi mu cyanza cyebe amu, ne cipese cya dyâmpà, bwalu, EMU MMUDI MUKALENGE WAMBA!" Kaa, ekelekele, aci kadi kwenza bwalu's. Kaa, ekelekele! Kakese kavwaye naaku aku, nwamonu's, kukalambulaye kudi Nzambi. Kôkò aku's kavwa kakumbane bwa kudyaye cikondo civwa cishaale aci. Eyowa's. Nwamonu's, pakaavwaye mu butekètè apu ki pavwaye ne dikanda.

²⁹⁶ Mukwabo yèyè uvwa anu ne dibungu ne ndambu mukese wa maanyi mwômò. Kadi kavwa ne kantu to, bivwa bikengela bwa bânà bende baa balume babidi basumbishiibwe bu bapika. Kavwa ne cikwabo civwaye mufwanyine kwenza ne dibungu

dikese dya maanyi edi to. Kaàvwa àbûngì menemene to, yêyè ukaavwa kundekeelu.

Eliya kumwambilaye, ne: “Udi ne cinyi mu nzubu mwebe amu?”

Yêyè ne: “Anu twanyi tukese mu dibungu.”

Yêyè ne: “Nda kudi beena mutumba neebe, usombe mabungu àbûngì.”

²⁹⁷ Mwaba awu, tangilaayi, ùdìlongolola kumpala mene kwa bwalu kabuyi nansha bwanji kwenzeka to. Hmm? Kudìlongolola! Davidi wakumvwa mutooyi awu mu bikutukutu bya mici ya mùriers abi. Elisha wakamona kaadivuba anu bunene bwa cyanza, yêyè ne: “Ndi ngumvwa mutooyi wa mvula wabûngì.” Nzambi wapetaku mabungu a munda mutupu’s we! Ncya bushuwa.

Yêyè ne: “Ujà nzubu tente ne mabungu awu.” Amen!

²⁹⁸ Nudi numona cidì Nzambi muswe anyi? Bikengela Nzambi apete mabungu a munda mutupu. Teelejaayi! Tukaadi bapetepete malongesha bûngì cyanaana, lukutukutu lwa cyena ntendeleelu bûngì cyanaana, too ne mutwavu kufika kundekeelu kwa cipanza. Nkushaale cintu anu cimwepele, kukudimukila kudi Nzambi ne ku Dîyì Dyende. Nenku nwênù baswe kwenza aci, angataayi mabungu a munda mutupu. Patulaayi bu-Méthodiste bwônsò bùdì mwómò abu, bwena Mpenta bwônsò bùdì mwómò abu, ne bu-Baptiste bwônsò bùdì mwómò abu, kadi nùàshiyè ikale anu mabungu pa mabungu, ne nùàshikikè mwaba kampana mu nzubu. Ne pashiishe nwangate bidì mu edi Dibungu kadi nubange kupongolola, amen, nubange nwênù anu kupongolola cyanaana.

²⁹⁹ Mukaji awu wakapeta bûngì bukumbane bwa kudikubaye yêyè ne bânà bende abu, ne bikwabo byônsò, ne kufuta mabanza ônsò kujikija. Bwa cinyi? Bwa cinyi? Anu kakese kavwaye naaku aku, kavwaye mulambule kudi Nzambi aku, ne mu kulonda kwa dîyì dya muprofeta ewu amu, yêyè kukumbaja mwanda.

³⁰⁰ Nzambi, tutumineku muprofeta wíkala mwa kwangata Dîyì dya Nzambi, wíkala kayi mwa kwangata *cikampanda cikwabo* to, kadi wângata anu mabungu a munda mutupu. Bu Nzambi mwa kupetaku anu mabungu a munda mutupu, ne pashiishe kwangata Dîyì dya Nzambi kuDìpongolwela mu muntu awu’s we.

³⁰¹ Pa kuumusha bamwe bàdì bamba ne: “Kaa, ngâkanyùkuka pângààkaMupetà. Ngâkaakula mu myakulu pângààkaMupetà. Ngâkajà maja mu Nyuma.” Pwa aci mwoyi, wamonu’s, pwa aci mwoyi!

³⁰² Shaala wêwè anu mwaba awu too ne paalwaYe, kwajiki, too ne padi dibungu dyula tente. Ki mudibi. Mushindu awu ngùdì wenza. Eyowa’s, mukalenge, bupwekele bwa Cyôci

aci's! “Mabungu awu kuulawu tente,” mushindu mwine utudi bafwanyine kushaala pa cyôci aci's we!

³⁰³ Bavwa mbayiidi, biikale balubakanangane bikole dîngà dituku, Yesu kubambila, ne: “Nyewu kudi bantu binunu bitaanu mwab'ewu,” ki kwambaye ne, “bakaadi bafwa cipuuka, bakaadi bafwa ne nzala.” Kaa, s'ndi mufwanyine kushaala pa aci dîbà dikwabo dijima's. “Binunu bitaanu, bafwa ne nzala,” s'kudi binunu lukama bya miliyô munkaci mwa kufwa ne nzala's!

Bôbò ne: “Bapingaje mu mààbò's.”

Yêyè ne: “Kabyena bikengela kwenza nanku to.” Yêyè ne: “Bapeeshaayi cya kudya.”

³⁰⁴ Kaa, ekelekele! Mêmè's ndi mwa kudifwanyikijilabo biikale bàngulula byônsò bivwabo bafwanyine kupeta abi, ne nwênù nudi bamanye ne paakamanabo kwangulula byônsò (bintu byônsò) bivwa . . . Numfwe luse bwa dîyì dya “kwangulula.” Kadi baakangata byônsò, kwambabo ne: “Mpindyewu, mwaba ewu, tudi batambakane eku ne eku mu cituudilu cijima. Katwena bapete nansha dikuta ditubula to, pa nanku katwena mwa kwenza kampanye aka to.” Nudi numona anyi? “Pa nanku nyewu twâpèci bintu byônsò mwab'ewu, kadi cintu cimwepele citudi mwa kupeta cidì anu tuumâmpà tukese tutaanu ne tuumishipa tukese tubidi twa kudi kaamwânà kashaawuke” bu Davidi, kapatukile mu cipeela mwamwa. “Ki cyônsò citudi bapete. Ki cyônsò citudi mwa kupeta. Meeji mmatushiikile. Katwenaku ne cikwabo citudi mwa kwenza to, Yone.” Peetelo kwamba ne: “Ki cyônsò citudi peetu mwa kwenza. Ki cyônsò citudi peetu mwa kwenza. Meeji mmatushiikile. Ki cintu cimwepele citudi peetu bapete bu cyakudya ncyôci aci.”

³⁰⁵ Ee, ndi mwa kwangata anu kaaMufundu kakese kamwepele cyanaana, Byenzedi 2.38, ne ki cyônsò cidì cîtùkèngelà, anu kutumikila Aci. Kabyena bikengela bwa wêwè kuya kalonga mu ma-seminere, pa byônsò bya *cikampanda*, *cikansanga*, ne *cikankenga* to, angata wêwè anu Aci. Eyo, angata wêwè anu—anu Aci cyanaana, ki cyônsò cidì cikukengela: “Nyingalalaayi, muntu ne muntu wa kunudi, nubatiijiibwe mu Dîna dya Yesu Kilisto bwa dilekelediibwa dya mpekaatu yenu, nenku nenuujiibwe tente ne Maanyi awu.” Nwamonu anyi? Dishiyè wêwè anu munda mutupu cyanaana, udilongolole bwa Yêyè awu, ki cyônsò cidì cikukengela. Ela anu dimata munda amu, tangila umone mudici cyula tente.

³⁰⁶ Nudi bamanye's, kaàvwa cibwîpì ne kukumbanawu mu dibungu adi to bwa kwela dimata dimwe cyanaana mu dyônsò dya kudiwu. Pàmwâpa wakangata munu wende, mushindu *ewu*, kudimacisha anu mu dyônsò dya kudiwu mushindu awu; dya ùtàngila anu paanyima nunku pende umba umona ne dikaavwa dyûle. Anu kumacishamu dimata cyanaana, nwamonu's, ki cyônsò civwa cimukengela, bwalu avwa mmaanyi mabeneshà.

307 Kwangaci dilabula kampanda dya seminere to. Angata Dìyì dya Nzambi umacishe dimata dyaDi mwômò amu, umone mudibi bifwanyine kuula tente.

308 Yèyè wakamba ne: “Ee, ndimata dya mushindu kaayi ditudi ne cya kumacisha? Pàmwăpa tudi mwa kwangata cintu kampanda mu Misambu’s.”

309 Angata cingănwămbidi mêmè aci ne: “Nyingalalaayi, nubatiijiibwe mu Dînà dya Yesu Kilisto bwa dilekelediibwa dya mpekaatu, nenku nenuujiibwe tente kuumukila ku Dimata adi.” Ela wêwè anu dimata adi muntwamu, nenku neuujiibwe tente kuumukila ku Dimata adi. Ki Dimata dyakakwata naadi Peetelo mudimu Dituku dya Mpenta. Ki Dimata dyakakwata naadi Pôlò mudimu. Ki Dimata dyakakwatabo naadi mudimu kudi bayiidi bônso. Bikwabo bidi bishaala nebisakidiibwe, angata wêwè anu Dimata adi ulonde aci too ne kundekeelu, nenku bikwabo bidi bishaala ne bikumbanangane.

310 Shaala ne butekètè! Shaala munda mutupu! Umusha byônso ùshaalè munda mutupu, nenku kubangila pa dîbà adi nekwikale anu mamata matungunuke, ne Nzambi neélè mamata adi ashaala awu. Enza wêwè anu aci cyanaana. Twa binù witabè aci ne mwoyi webe wônso. Macisha dimata mu mwoyi webe mpindyewu mene wămbè ne: “Nzambi, ndi nCiitabuuja, ne mwoyi wanyi wônso!” Nzambi neatangile bwalu bwa makwabo mamata adi mashaale awu, necyujiiibwe tente ne: “Nenuujiibwe cyakab- . . . ne Nyuma Mwîmpè.”

311 Mpindyewu bôbò bavwa ne tuumâmpà tukese tutaanu ne tuumishipa tukese tubidi. Pa nanku ciwabo mwa kwenza ki cinyi? Ki kulwabo e kwamba ne: “Ki byônso bitudi mwa kwangulula mbyebi. Meeji mmatushiikile. Katwena mwa kupeta cipese cikwabo cya dyâmpà mwaba nansha umwe, kakwena muntu nansha umwe to. Kadi kânà kaa balume katekete, pàmwăpa kiikale cimfwanyi. . . kapumbishe mu kalaasa, kaye mu kalaasa mu dinda emu, kupanga kubwela mu kalaasa kadi kuya kaloba mishipa kwinshi eku. Ki twêtù kukangata, ku kasulu kwaka, kulwaku bwa kuteeleja. Nenku, mwaba wawa, kadi naayi itaanu.” Twasakidila kudi Nzambi bwa kânà kaa balume aku! Eyowa’s, mukalenge. Bôbò ne: “Tudi . . . cintu cimwepele citudi bapete cidi mwa kuvwijaku mwoyi cidi anu kaadimata kakese menemene aka.” Bôbò ne . . .

312 Yesu kwamba ne: “Abi’s mbikumbane. Lwâyi naabi kuneeku.” Nwamonu anyi? “Lwâyi naabi kuneeku, Mêmè mbyăngàtè. Lekelaayi Mêmè ngangate kaadimata kakese aku, Néntangilè bwalu bwa bidi bishaala abi. Mpindyewu, tungunukaayi anu ne kwabanya pândi Mêmè ngenda nnupeesha kuumukila ku dimata edi apa.”

313 Nenku muntu ne muntu wa kunudi angate dimata dya Byenzedi 2.38 mu dinda emu, mu mwoyi wenu, nenku

nwangacile anu mwaba awu kadi numone mudiYe ubanga kunucibwila Dyâmpà dya Mwoyi adi. Udi unyingalala, ubatijiibwa mu Dîná dya Yesu Kilisto bwa dilekelediibwa dya mpekaatu yebe, kadi umone pa dîbà adi Nyuma Mwîmpè ní kèna welamu mamata, utungunuke wêwè anu ne kwela mamata pa *cikampanda* ne kwela mamata pa *cikansanga*, wela mamata *apa* wela mamata *pààpa*, ne wela mamata *pààpa*, nenku nekwenzeke dyujiibwa dya tente dya Nyuma Mwîmpè! Cya bushuwa's!

³¹⁴ Kabyena bikengela bwa wêwè kuya ku ma-seminere to. Kabyena bikengela bwa wêwè kwikala ne meeji matwe to. Cintu cimwepele cidi cikengela bwa wêwè kwenza nkujingulula ne kwèna mumanye cintu to. Lekela Nzambi akupye mu cyanza, Yèyè neatangile bwalu bwa bidi bishaala.

³¹⁵ Eyo, pashiishe Dîyì kwamba ne: “Lwâyi naabi kuneeku.” Ki cidi Nzambi ukeba mu dinda emu, bwa kuMutwadila musumba wa mabungu a munda mutupu. Yèyè neatangile bwalu bwa bidi bishaala. Eyowa's, mukalenge.

³¹⁶ Mpofo Baatimaayo musòmbe pabwîpì ne ciibi, muvwale mbondya, mu mashika, kaa, cikondo cyende cya butekètè butambidile, paakumvwaye Dîyì, ne: “Lwâyi nende kuneeku.” Ncya bushuwa, cyôci, pâmwâpa, ki cyebe peebe cikondo cya butekètè butambidile.

³¹⁷ Kuvwa Mariya ku lukita, mwoyi mucibuluke, Mwanende mulela, Mwanende wa balume uvwa mushipiibwe, ne byônso abi, ditekemena dyônso dikaavwa diye. Ki kuyaye bwa kwela citalu Cyende bwanga bwa kaciya mwa kubola, kadi mubidi Wende mwine kawuciyimu to. Ki kuumvwaye Dîyì dyamba ne: “Udi udila bwa cinyi, mukaji?”

³¹⁸ Yèyè ne: “Mbangate Mukalenge wanyi baye nende. Nenku ndi...” Mukwacikwetu, Mwanende uvwa muteekiibwe ku bundu; baMuvuule bilâmbà mushaale butaka bwa pulupulu ne baMukudike kuulu ku Nkuruse kwaka, baMupopeleku ne baMutuucile misonso kuulu kwaka, paanyima paa Yèyè mwambe ne ùvwa Maasiya, paanyima paa yèyè mukaji ewu mumanye ne Nyuma Mwîmpè wakamubwikila ne mundidimbi ne yèyè kulela Mwânà mwine ewu. Ùvwa m'Mwânà wa Nzambi. Mukaji ewu uvwa mumone byenzedi Byende, ne bikwabo byônso, ne mumone ku cikondo cya butekètè butambidile. . .

³¹⁹ Ne mwaba awu Yesu uvwa mwimane ulwishangana ne bubu, mwimane ulwishangana ne malongolodi awu, mwimane ulwishangana ne Bafaalesa abu; ne wakalwa mu butekètè ne wakaDilekelela kudi lufu, ne wakafwa mwenze bu ngènzâmpèkââtù pa Nkuruse, mwambule mpekaatu yetu. Misambu miine, baprofeta biine bavwabo biitabuuja abu, bakaavwa bambe (bidimu nkama kumpala) Mèyì miine akambaYe ku Kalvariyo awu, kadi kupangabo mwa kucimona. Balombodi baabo banene baa ntendeleel- . . .

³²⁰ “Nzambi wanyi,” mwakamba Davidi, “Nzambi wanyi, bwa cinyi Wêwê wândekèdi?” Misambu 22: “Mifuba yanyi yônsò, mbashaale bantangle, nansha umwe wa ku yôyi kî mbawucibule to. Badi bàkùpa mitu bamba ne: ‘Yêyè wakeeyemena bakwabo...Yêyè—Yêyè wakasungila bakwabo, Kaciyi mwa kudisungila Yêyè mwine.’” Ne maalu ônsò àkambà baprofeta awu, avwa mwaba awu mene! Nenku Yesu, mwikale ùpunga ne lufu, mukwate Dîyi adi, wakaDilekelela. Nzambi, Emanuwele, wakashaala mu butekètè mu mushindu wa ne Yêyè mwine wakaDilekelela kudi lufu, ne kudi lukita, ne musuuka Wende kudi iferno. Butekètè’s! Kadi mu didilekelela mu kaabujima adi...kupatika mu dinda dya Paasaka adi, Cifumina mu myaba mitambe kupwekela.

³²¹ Yêyè uvwa Mutambe kutumbuka, kadi wakashaala mutambe kupwekela. Wàkalwa kudi bantu bavwa batambe kupwekela, wakaya mu cimenga civwa citambe kupwekela. Ne byakakengela ne muntu uvwa mutambe bwîpî wa mu cimenga atangle panshi bwa kuMumona. Wakuumuka aku e kuya ku lufu, kuumuka ku lufu kuya mu lukita, ne kuumuka mu lukita kuya mu iferno; ku mwaba uvwa mutambe kupwekela uvwa mufwanyine kwikalaku awu, mu iferno wa mutambe kupwekela uvwabo mwa kwelela meeji awu, ki mwakayaYe.

³²² Kadi pashiishe, kuumuka amu, Nzambi kubanga kuMubandisha. Kupicila mu Mpaladiizo, kuumuka amu kuya mu—kuya mu majambu, ne kuumuka mu majambu e kuya mu Butumbi, nenku mutambe Mutumbuke mu mushindu wa bikengela bwa ikale utangila panshi bwa kumona Dyulu. Wakabandisha nkwasu Yende ya butumbi mu Dyulu!

³²³ Kaamaamù kakese kàvwà ne mwoyi mucibuluke aku, kakayi kamanye ciine eci to, kiimane mwaba awu ne: “Mbanganate Mukalenge wanyi baye nende, kadi ncyèna mumanye ne mpenyi to.” Kaamaamù aku kavwa... cikondo cya butekètè butambidile cya kacya kaapeta. Mukalenge wende—wende uvwa muye. Bavwa baMupoopole pa nkuruse, kadi Yêyè wakalekela ewu... baMupoopole pa nkuruse mu bundu bwa kuMukudika kuulu aku butaka kumpala kwa bantu abu; ne baMutwe difuma mu lubadi, màzòloloka mashi, ne bàMuumvwa wela lubila pa Nkuruse, ne bàmona buloba bukanka, ne maulu ônsò àjingulula ne Yêyè wakafwa. KuMutuululabo, muumakane ne mukwate mashika, ne kuMulaadikabo mu lukita. Kaamaamù aka kudyambidilaku ne: “Kaneemu kaa ndekeelu kândiku mwa kuleeja Mwanaanyi munanga nkaa kulwa kwela citalu Cyende bwanga bwa kaciyi mwa kubola, kadi mpindhewu nyawu bakaadi baMwangate baye nende.” Nenku ùkaavwa mwimane mwaba awu udila mwadi, kaamaamu aka kiimane mwaba awu kadila mwadi, kashikunkila. Kaa, cikondo cya butekètè butambidile’s we!

“Udi udila mwadi bwa cinyi, mukaji?” mwakamba Dîyi adi paanyima pende.

324 Kwelaye meeji ne ùvwa mmulami wa mu nkita, kwambaye ne: “Kaa, mbangate...” Kayi nansha ne mushindu wa kukudimuka to, ùvwa ne butekètè bwa menemene. Kwambaye ne: “Ndi mushaale anu kacya ngātabala matuku ônsò asatu a muunya ne a bufuku aa. Mvwa mwimane ntangila dipoopediibwa dya pa nkuruse, ntangila Munanga wanyi mēmè ùndi mumanye ne ùvwa Mwânà wa Nzambi awu. Ndi mumanye ne ki civwaYe! Kadi mona ne bôbò...” (Mutangile luseke lukwabo, kadi Yèyè mwikale paanyima.) “Kadi baaMwangaci baaMupoopedi pa nkuruse. Nkaavwaku muMumone ujuula mufwe mu lukita. Nkaavwaku muMumone wenza bishima pa bishima. Ne ndi mumanye ne Nyuma Mwîmpè... Nzambi mmumanye mwoyi wanyi, mvwa nciyi ne bubi bwenza to mu kantu nansha kamwe, ki Nyuma Mwîmpè kumpa Mwânà awu nciyiku mumanye mulume to. Mushindu mwine wùndi mēmè mwine ewu mumanye ne aci civwa bulelela’s! Kadi mēmè kumona baMufwisha bundu ne... baMunyenga bilāmbà Byende, ne baMukudika kuulu kwaka ne baMuvuula bilāmbà byônsò. Mmufwe lufu lwa lutambe kwenza ne bwôwà. Mēmè ndi muMunange, cidibo baMwenze nansha ciikāle cinyi. Ncidi anu muswe bwa kuMujiika, ndi muswe—ndi muswe kuMupa dijiikiibwa didi dikengediibwa, kadi nyawu baMwangāte bayè nende. Ndi nunku matuku malondangane aa, mwoyi wanyi mucibuluke. Ndi nsanganyiibwa anu mu mushindu wùndi ewu. Ncyèna mumanye cidibo benze ne Mukalenge wanyi to.”

325 Awu ne: “Mariya.” Ki pa dîbà adi kulwaye ne dikanda. Amen! “Nda kambila bayiidi Baanyi ne Nênkatuutākèènè naabo mu Ngalela.” Kaa, ekelekele!

326 Mu butekètè pa dîbà adi ki mutudi tuvwijiibwa ne dikanda. Paudi mu butekètè, kipauidi ulwa ne dikanda.

327 Peetelo, paanyima paa mupatuke muye kaloba kuntu kwaka, ùvwa... wende mudimu uvwa nkuloba. Mēmè ntukù munange mudimu wende awu. Nenku, ùvwa mupatuke kuntu aku muye kaloba, mutekete mu maboko tekete, mumanye ne ùvwa muvile Kilisto. Kaa, ekelekele! Muumvwe muprofeta awu mwimane mwaba awu umwambila ne: “Peetelo, wamba ne udi muNnange?”

328 Yèyè ne: “Éyi Mukalenge, Wèwè’s udi mumanye ne ntu muKunange.” Yèyè ne: “Ndi muKunange. Ndi mudilongolole bwa kufwa Bwebe Wèwè.”

329 Yèyè ne: “Peetelo, wèwè ngudi udyambidila ne udi ne meeji awu, kadi’s neuMvile misangu isatu kumpala kwa... NeuMvile kumpala kwa citaala kusamaci bwa musangu mwisātù. Wamonu’s, neuMvile misangu isatu kumpala kwa citaala kusamaci.”

330 Nenku paakamonaye aci cyenzeka, paakiimanaye mwaba awu e kwamba ne: “Mēmè ncyèna muMumanye to. To, ncyèna

mumanyeku cintu nansha cimwe pa bidi bitangila beena Mpenta baba to.”

³³¹ Dìbà kî ndikumbane dya kwimanyika diyiiisha to, cidi anu ndìbà dyanyi dya ku diboko didi dikwàcike muzàkàla [Kangonga kaa dîbà dya ku diboko dya Mwaneetu Branham kadi kadila—Muf.] Nwamonu anyi? Kwambaye ne . . . Ndi—ndi—ndi mumanye ne ndi—ndi ne cya kwimanyika mpindyewu, kadi ncyêna—ncyêna mwa kumba kwimanyika anu pa dîbà edi to, nwamonu’s, pa nanku bikengela njikije bwalu ebu mwab’ewu mu katanci emu.

³³² Yêyè ne: “Ndi—ndi—ndi—ndi mumanye ne ndi muMuvile. Ndi muMuvile kumpala kwa Pilaatu. Ndi muMuvile mwaba awu paalu mukaji mutekete awu mwaba wúmvwà awu, wamba ne: ‘Wèwè ewu kwêna umwe wa kudibo anyi?’ ‘To!’ Mémè kulaka ne mu dikàsà!” Kaa, yêyè’s uvwa mu mushindu wa wenza ne bwôwà. Yêyè ne: “Ndi—ndi—ndi . . .” Mukaji awu kuvila . . . Yêyè uvwa muMuvile. Ne wakamona Yesu mwimane mumwoshe dîsù, pa dîbà adi ki paakasama citaala, mwoshe Peetelo dîsù. Kupatukaye pambelu. Kaa, ùvwa mutekete mu maboko anu yêyè mwine, wamba ne: “Cîndi mene mushaadile ne mwoyi ncinyi’s?”

³³³ Ki pasiishe, pa kuumusha aci, kwambaye ne: “Ngeela meeji ne bikengela ngaalukile cyakabidi ku diloba. Ncyêna mwa kuyiisha kabidi to, nenku nêngàalukilè nkabangulule anu diloba.” Ûkaavwa mwele makondo ende awu mu mâyì ne mumane kuèla bufuku bujima, kayi mukwate nansha kansèlèlèngà to. Nenku ùkaavwa pa mwaba wa butekètè, kayi mupete kantu nansha kamwe to, mutekete mu maboko yêyè mwine, mufike kundekeelu kwa makumbanyina ende.

³³⁴ Ee, ùvwa ùdyàmbidila muvwaye muntu munene, mukose maci a mwànà wa mwakwidi munene mushindu awu. Ee, ùdyàmbidila muvwaye muntu munene, nudi bamanye’s, mukaavwaye muyiile cintu kampanda. Kadi kavwa mumanye cintu to! Byakamukengela bwa kupwaye byònsò abi mwoyi.

³³⁵ Nenku ki yêyè awu pambelu apu, wamba ne: “Ee, ndi mumanye cintu cumwepele ne, ntu mulobi. Ndi anu mwa kuditambakeena’s, mu diloba.” Kwelaye bukondo bufuku bujima kayi mukwate nansha kantu to. Kaa, diteketa kaayi dya mu maboko’s we! Musangu wònsò uvwaye ukoka bukondo, anu munda mutupu. Ki kuteketaye mu maboko bikole! Ûkaavwa mu mwaba wa butekètè butambidile, yêyè ne: “Ebi’s mbipiciibwe ne mutupike mupatuke mu bwâtù bwine ebu’s. Ncyêna ne mushinga kabidi nansha mukese to, twamb’eku twamb’eku.”

Yêyè ne: “Nudiku ne mishipa anyi, nwênù bânà?”

³³⁶ Dya utuma mèsù ku mwelelu, ki Muntu udi mwimane wawa. Yêyè ne: “To, tudi batate bufuku bujima katuyi bakwate nansha kantu to. Paanyi’s mvwa ndyambidila mûndi mulobi.”

“Awu ngwêwè anyi, Simona?”

337 “Eyo. Ee, ndi mutate bufuku bujima nciyi mukwate nansha kantu to. Kaa, ndi—ndi . . . Katwena ne mishipa mwab’ewu to.”

Yèyè ne: “Ee, ela bukondo bwebe abu luseke lukwabo alu.”

338 “Tudi benze . . . Cinyi?” Pa dîbà adi yèyè kubang- . . . Yèyè ne: “Luseke lukwabo elu? S’ki citukaadi benze!”

“Ela ku luseke lukwabo alu.”

339 Kukùpayè makondo ende awu, nenku kukokaye. Yèyè ne . . . Ki yèyè kulwa ne dikanda. Kaa, ekelekele! Kwangataye nkooici wende wa kale wa diloba nende awu e kudinjingilaye, wamba ne: “Bànà beetu, Wawa’s udi anu n’Yèyè!” Ki kufikilaye bakwabo abu kumpala ku mukuna kumpala kwa kukùfikabò, benda biita màtù awu lukasa ne mwabo mwónsò. Yèyè kwowela kubashiya, muvwale nkooici wa diloba nende mishipa awu, kufikaye ku mwelelu. Bwa cinyi? Pavwaye ne dikanda. Pavwaye ne dikanda kavwa mwa kwenza cintu to, kadi paakalwaye ne butekètè ki pa dîbà adi paakalwaye ne dikanda. Eyowa’s, mukalenge.

340 Kaa, mushindu wa dyenza wa Nzambi ngwa kwangata bantu biikale mabungu a munda mutupu kadi kunyungisha naabo buloba. (Mpindyewu, anu kakese cyanaana kadi tuye.) Bu dya Mpenta, dya Mpenta, cyakenzaYe ncinyi? Byakakengela matuku dikumi awu bwa kushaalabo bônso munda mutupu. Kadi bavwa bônso biimane mwaba awu ne mabungu abo meele mishiku muulu, ki Nzambi kudyangata Yèyè mwine e kuwuja tente. Kwajiki! Bòbò kunyungisha buloba; kudipongwela Yèyè mwine munda mwabo.

341 Ki cidi cikengela leelu ewu ncyòcì aci. Ki cidi citukengela leelu ewu, mmabungu a munda mutupu, eyowa’s, mukalenge, bwa Nzambi amone mwa kuwuja tente. Nenku kwèna mwa kuàngata . . . Bidi bikengela ncinguluke byàbùngì mwab’ewu. Nzambi kêna mwa kukwata naawu mudimu padiwu mamane kwikala mùle tente to. Pawikala mùle tente ne malongesha a teoloji, Nzambi kêna mwa kukwata neebe mudimu to. Bikengela Nzambi apete mabungu a munda mutupu bwa Yèyè amone mwa kuwuja.

342 Mpindyewu, Eliya kaakamba ne: “Nda kakeba ndambu wa mabungu ne ùkasombè mafuta, nenku netumone ní katwena mwa kuàtwila mushinga mwîmpè, kadi wangate ndambu mukese nenku umone mwa kufuta mwena mutumba mushindu awu” to. Yèyè wakamba ne: “Peta wèwè anu mabungu a munda mutupu. Ki cyònsò cidi cikukengela.”

343 Ki cyakadiku ku Mpenta, baakangata mabungu a munda mutupu bwa Nzambi kumona mwa kuwuja. Mwaneetu, ki cidi dituku edi dilomba’s. Dituku edi; bikengela kwikala ne aci. Anyi netwikale ne cyòcì aci anyi netubutuke. Ndi muswe kujikija mpindyewu, teelejaayaaku. Bidi bitukengela kwikala ne cyòcì aci anyi kubutuka. Eyowa’s, mukalenge.

³⁴⁴ Cishinyi cinene cya cyena ntendeleelu citudi naaci eci, cishinyi cinene cya ekeleeziya cikaadi cifwima mîshi eci, cikaadi ne dituuta dya mu nyuma munda mwaci. Mwaneetu Collins udi mwab'ewu kaaba kampanda, ne Mwaneetu Hickerson. Ntu ngeela meeji ne vilebrequin ki ukàadi mubi. Cintu kampanda cikaadi cinyanguke. Badi beelamu kasoloonyi kaa mushindu mubi, akaadi ônsò afwima mîshì. Mbakwate mudimu ne dilabula dya seminere pamutu paa Nyuma Mwîmpè.

³⁴⁵ Matabuluja etu manene a mu ditunga, bantu beetu banene, tumpanye twetu twa dyondopa, byônsò mbipangile bwalu. Ki citudi bamanye. Tangilaayi mutangadiki wetu wa ngiikadilu mulenga ewu, Billy Graham, mmukosolole ditunga edi waya walukila, waya walukila, waya walukila. Mbikwacishe ku cinyi? Oral Roberts, tumpanye twa dyondopa myaba yônsò, kadi ditunga didi dyenda ditamba kushaala ne lwonji misangu yônsò.

³⁴⁶ Bwalu didi dyônsò anu ba-Baptistes, ba-Presbytériens, beena Assemblées de Dieu, malongolodi mashiileshilangane makwabo ônsò aa, kuàsanga ônsò pamwe, ncinyi ciine aci? Cishinyi cinenaanaale cya cyena ntendeleelu, kadi Nzambi nyawu ukaadi mumane kunufwimishilaci mîshì's. Mpindyewu akaadi anu enza vruum, "vruum," kwela ne mpompi, kwela ne mpompi, kwela ne mpompi, "vruum," kwela ne mpompi, kwela ne mpompi, kwela ne mpompi, kandambu apa ne pààpa. Kwawu's nkujike! Kwawu nkumane kujika! Kasoloonyi nkajike kônsò, nukaadi bapongolwelemu mâyi. Byônsò bikaadi biye (eyowa's, mukalenge), ndundu mitubuke nseke yônsò ibidi. Tudi mu mushindu wa wenza bwôwà. Cishinyi cya cyena ntendeleelu cîmànyì.

³⁴⁷ Nenku, mwaneetu, cijiku cya ku iferno ncikanguke. S'ncyà bushuwa. Ne misulu ya bukole bwa badémons yikaadi yipongololokela myaba yônsò. Yikaadi mikwate matunga. Yikaadi mikwate cididi mu mushindu wa ne cyàlu kubola too ne penyi. Yikaadi mikwate maekleeziya mu mushindu wa kabaciyi bamanya cîngà cintu to anu dingumba.

Paudi wamba ne: "Udi mwena Kilisto anyi?"

"Mêmè ndi Méthodiste."

"Udi mwena Kilisto anyi?"

"Mêmè ndi—mêmè ndi mwena Mpenta."

³⁴⁸ Aci kacyena cyumvwija, bu mûmvwà ngamba dituku adi ne, kupita kwikala ngulube, anyi ngulube mufiike, anyi kabalu, anyi cintu kampanda nansha. Kacyena ne dipetangana naaCi to. Udi mwena Kilisto paudi mulediibwe cyakabidi ne muujiibwe tente ne Nyuma Mwîmpè, kî nkuyi mwanji kwikala aci, ne mudilekelele mu kaabujima kudi Nyuma to. Pawikala kuyi mudilekelele kudi Nyuma, pa dîbà adi kwèna mulediibwe cyakabidi ne kwèna ne Nyuma Mwîmpè to. Udi

mufwanyine kwakula mu myakulu ne kuzakalala, ne kutupika ne kunyeemakana mbilu, ne kwenza mishindu yònsò ya . . .

349 Pòlò wakamba ne: “Ndi mwa kutentemuna mikuna ku diitabuuja, ndi mwa kwondopa babeedi, ndi mwa kwikala ne dimanya dya Bible, ndi mwa kuya ku seminere ne kulonga bintu byònsò ebi, byònsò,” mmwambe ne, “ncidi anu cintu cyanaana!” Aleluuyah!

350 Kaa, ekelekele, nwênù badi bamba bwa cijiku cikangula ku mbidika’s! Démons miikale yitambakana, makole a dyabulu, mu dîná dya bwena Kilisto, “yilongesha mèyi a bantu bu Dilongesha,” malongesha a teoloji a mu seminere, balekela Bible.

351 Aleluuyah! Nganyi udi mukumbane, nganyi udi ne dikanda dikumbane, nganyi udi ne lungenyi lukumbane? Nganyi udi ne bukole bukumbane bwa kutekeshaku legona ewu udi uvuula bakaji beetu bilàmbà, mu dîná dya bayiishi, Méthodiste, Baptiste, anyi mene dya Mpenta? Balaaba bilaabu kwisù bu Izabela, ne babebula nsuki yabo, ne bavwala mipanu bu bantu balume. Bayiishi beetu, kabayiku ne dikima dikumbane bwa kubambila ciine aci to. Bakwata kudi dyabulu! Legona ngwâkapanda bilàmbà bivwaye muvwale. Ndémon kaayi udi ukungula ewu’s?

352 Udi ne dikanda dikumbane nganyi? Ndingumba dya—dya mushindu kaayi didi dikumbane kumukwata bwa kendakanyi ùbànda ùpweka mu nkita ya mangumba eyi, wenda wela mbila ne: “Matuku a bishima akaadi mamane kupita, ne kabyena bitukengela Nyuma Mwimpè”?

353 Nenu nganyi udi mwa kutekeshaku mwine démon awu? Nzambi! Katwena mwa kucyenza ne dingumba to. Katwena mwa kucyenza ku makole a cyena ntendeleelu to. Kadi kuvwaku Dìyi kampanda dyakenza cyòci aci musangu kampanda, amen, dyâkatekeshà démons ayi, kubaaluja mu ngiikadilu wabo mujaalame ne kubavwadika bilàmbà. Dìyi dimwedimwe adi nditupe mulayi ne: “Byenzedi bìndi Mêmè ngenza nenùbyènzè peenu.” Kwakucyenzaku ne kasoloonyi kaa cyena ntendeleelu mu kashinyi kafwima mîshì to. Kwakucyenzaku mu bulongolodi kampanda to. Neùcyènzè pawadishiya munda mutupu ne kulwa ne butekètè, udipongolola wèwè mwine yònsò, ne ulekela Nyuma Mwimpè ùbwela ne ùpaapala mu citupa ne citupa cyebe, ùpàcisha patapata cijiku ne cijiku cya mubidi webe. Ki cimwepele. . .kucyenza. Kabyena bitukengela bulongolodi bupyabupyaya to.

354 Cìdì citùkèngelà, Éyi Nzambi wa yaaya, ndi nCyumvwa cipongolokela mu nyungulukilu mwònsò mwa mwab’ewu emu mpindyewu. Cìdì citùkèngelà mbwa muprofeta wa Nzambi kujuukaye mwikale ne dikubakuba dya kudi Nzambi, mukenyi wa nyuma wikala mwa kunyungisha buloba ebu bwa

kudyumvwabu bundu! Aleluuyah! Dibungu dya munda mutupu ndidiYe naadi dijinga, ncyà bushuwa, Ekeleeziya mubiikila bwa kupatuka, banyaàbanyà bìikalà mwa kwakidila bukole bwa Nzambi ne mabenesha ne Mukenji Wende. Aleluuyah! Ki cidi citukengela ncyòci aci.

³⁵⁵ Shaala ne butekètè bwa ulwe ne dikanda. Aci necicimune démon yònsò. Necifikishe badi balonge tulaasa ku didyumvwa bundu. Necitwale balume ne bakaji badi Nzambi mubiikile, anu abu nkaayaabo.

³⁵⁶ Vulukaayi ne: “Bu mwakadibi mu matuku a Noa, ki mwikalabi kabidi ku dilwa dya Mwànà wa muntu, mwàkasùngidiibwa misuuka mwandamukulu.” Mu matuku a Eliya kuvwa anu binunu mwandamutekete cyanaana bivwa naaCi. Kaa, anji elaa yi meeji bwa mwaba utudi twètù ne mwoyi mpindyewu. Paakalwa Yone mu cyalu, ekeleeziya mukese awu uvwa bulelela wa banyaàbanyà, kadi kuvwa mabungu a munda mutupu bwa kupongolwelamu Maanyi. Aleluuyah!

Nzambi, swaku bwa tudishiye munda mutupu.

³⁵⁷ Dishiyaayi munda mutupu, balunda baanyi. Shaalayi ne butekètè! Bengaayi kwitaba dikumbanyina dyenu nwènù adi! Ne nwènù badi mu myaba yidi cisanji. . . kî ncisanji to, kadi pambelu mu. . . bàdì bàtèèlèjà mikaba ya mèyi eyi, kwònsò kwafikayi aku, dishiyaayi munda mutupu. Dipongolwelaayi pa cyoshelu cya Nzambi bu mulambu. Lekelaayi Mwanjelo alwe ne dikala dya Kapya, ùjè dibungu adi ne bukole bwa Nzambi wa Bukole bwònsò. Dishiyaayi. . . Pa dîbà adi Yéyè neanuvwije ne dikanda, Neanupe ngàsà bwa kwimana kuulu.

Twinyikaayi mitu yetu katanci kakese.

³⁵⁸ Éyi Nzambi, dikwabo dinda dya dyalumingu dyàpici, ne nyewu tudi basòmbe mu disangisha edi dya kadiyi tuseku to, mùdì balume ne bakaji badi baKumanye, mùdì Nyuma Webe musòmbèle munda mwa myoyi yabo, ne biikale baKwitabuuje ne benze maalu bilondeshile Dîyì dyònsò dyûdì Wèwè—dyûdì Wèwè mututume ne mudimu wa kwenza. Nenku nyewu tuKusakidila bwa bantu aba.

³⁵⁹ Nenku kudi mwa kwikala bakwabo pambelu pààpa mu ditunga edi mwaya mikaba ya mèyi eyi, mwikalà bakaji ne balume batekete badipwekeshe mwa kuyangata kubwela naayi mu nzubu yabo ne mu bisamba byabo mwamwa ne mu matunga makwabo. Nenku swaku bateeleje, Mukalenge, ne bùmvwè, badishiye munda mutupu bwa Nyuma Mwimpè àbùjè.

³⁶⁰ Kudi mwa kwikala bakwabo nansha apa mu dinda emu, Mukalenge, badi bafwanyine. . . bàkaadi badishiye munda mutupu kacya twàbanga kwakula, badi bafike ku dyumvwa ne bakaavwa batambe kweyemena meeji abo bòbò bikole, abo bòbò biine, badi. . . dikumbanyina dyabo bòbò, beeyemene mu—mu budimu bwa meeji abo bòbò mapwekele a buntu aa, miine adi

kaayi cîngà cintu to anu bukooya bwetu bwa cya bushuwa ebu kumpala kwa Nzambi awu. Éyi Nzambi, swaku bwa badishiye munda mutupu anu patudi twakulangana apa, badilekelele ne didipwekesha dyônsò ne balwe bwa dyujiibwa dya ne Nyuma. Enzaku nanku, Mukalenge.

Mbambe mu Bible ne: “Bûngì bwônsò bwa baakiitabuujja abu baakabatijjiibwa.”

³⁶¹ Nkusòmbe mu citanda emu mu dinda emu, Taatù, mukaji mutekete, musòmbe paanyima apa lwa mundekeelu emu, ne ndi mvuluka Mandamu Hicks kampanda mwikale wenda undonda diloolo dikwabo ne mushaale anu mifuba pa mifuba, cijilujilu, kaadikoba kaa cijilujilu kashaale kadikoke pambidi pajima, kansere kakaavwa kamukunye yêyè yônsò; bayende, kayi mwanji kwikala mwena Kilisto to. Kadi ndi mvuluka disambila dîngâkenzà diine diloolo adi ne: “Nzambi, Wêwè ewu wâkatùma kaa’Davidi kakese bwa kulumbatangana ne nyama wa ntambwe kiikale ne ndundu wetu mukese wa nyuunyi ewu, ne yêyè kwalukila ne mwânà wa mukooko awu.” Mêmè kwamba ne: “Kansere aka nkaakà kakwate mwaneetu wanyi wa bakaji; ndémon. Ndi mumanye ne Wêwè udi Nzambi. Nkaadiku muKumone, Mukalenge, ne ndi mumanye. Nkaadiku mwakule Neebe, ne Wêwè mwandamune.” “Ndi mulwe ndonda mukooko wa Nzambi; wêwè kansere, mulekelele!” Pashiishe mêmè kumutumina dîyì mu Dînà dya Yesu Kilisto ne “alukila kumbelu.” Nenku bayende, uvwa kayi mwanji kudilekelela awu, kwitabuujaye Dîyì adi ne kwalukilaye ne mukajende kumbelu. Mukaji awu’s ki yêyè ewu mu dinda emu, mukaji munene wa dikanda ne mubidi tumatuma, kansere kamane kuya, nyêyè ewu mulwe mu dinda emu bwa kubatijjiibwaye mu Dînà dya Yesu Kilisto. Éyi Nzambi, twasakidila bwa dibungu dya munda mutupu adi didi didilongolole bwa kuujiibwa. Nzambi, ndi ndomba bwa Wêwè kubenesha musuuka awu.

³⁶² Mukalenge, aci’s cidi anu cileejilu cimwepele mu bikwabo byâbûngì. Ndi ndomba bwa mabenesha Ebe ikale pa bateeleji aba, mu mushindu wa kakuyi tuseku to, Nzambi, kakuyi tuseku to. Piikala . . .

³⁶³ Nkushaale cintu anu cimwepele, Taatù, cîndì mwa kumona, cidi, anyi Wêwè ujuuka mwaba kampanda ne mabungu kampanda a munda mutupu bwa kufikisha buloba ebu ku didyumvwa bundu, anyi utuma Yesu lubilu. Bwalu nshiikidilu ukaadi pabwîpi apa, Mukalenge, nkushaale bintu anu bibidi bidi ne cya kwenjiibwa (ne tudi ne cya kubimona dyakamwe) bwalu tudi bamanye ne nku nshiikidilu; anyi netumone cintu kampanda cya bukole cijuuka dyakamwe, anyi netumone Dilwa dya Mukalenge.

³⁶⁴ Ciprofeta cyônsò ncyûle. Cintu cya ndekeelu cîvwà kumpala kwa Ekeleeziya kubiishiibwa ku lufu, kumpala kwa

kwambwibwaYe mu Bwakabuulwibwa nshapita 3, civwa ndilwa dya musanjeela ku Cikondo cya Ekeleziya wa Laodikiya, uvwa mwa “kukudimuna myoyi ya bantu kuyaaluja kudi baataatù baa ku cibangidilu,” kubaaluja ku Mpenta wa ciibidilu awu, cidibo bamba ne ncidibo bôbô naaci aci. Kuvwa mwa kwikala binunu kuvudija ku bununu, bu mwakadibi mu matuku a Noa, Mukalenge, bàvwà mwa kujimina. Bààbûngì baa kudibo bavwa mwa kujimina. Tudi tumona aci ne cikaadi cimane kuula, Taatù.

³⁶⁵ Lwâku, Mukalenge Yesu, wambule Ekeleziya Webe. Ne cyôci ciikale diswa Dyebe, Mukalenge, kumpala menemene kwa Ekeleziya awu kwambwibwa, swaku kujooke Bukole. Éyì Nzambi, ujaaku mabungu aa. Ajuuleku, Mukalenge! Nyungisha buloba ebu musangu ewu kabidi! Tudi bamanye ne dîbà nediiikale dimane kupita, kakwakwikala kanyinganyinga pa dîbà adi to, nekiikale kule menemene bwabo bôbô pa dîbà adi. Kadi leeaaku Bukole Bwebe, Mukalenge, ujaku mabungu awu ne nyungishaku buloba ebu mu mushindu utubu kacya kabuyi bwanji kunyungishiibwaku to! Wangate Ekeleziya Webe pa diine dîbà adi. Ushiye buloba mu cimvundu cyabu cidibu busanganyiibwa eci, Éyì Nzambi, nyewu badisuba.

³⁶⁶ Pashiishe tudi bamanye ne Nyuma Mwîmpè munene awu nealwe kudi beena Yuda pa dîbà adi. Patwakamona binunu lukama ne makumi anaayi ne binaayi biimane pa Mukuna wa Sinaayi, biimane ne Mwânà wa mukooko, kadi Mukaji musela’s ukaavwa mu Dyulu. Yêyè ukaavwa mumane kwambwibwa, ne Mwânà wa mukooko ukavwa mwalukile (Yozefu) bwa kuDimanyisha kudi cisamba Cyende. Ne Bible mmwambe ne nekwikale dicibuluka munkaci mwabo paatangilabo ne bamona Yêyè mwimane mwaba awu. PaaDimanyishaYe, nebâmbè ne: “Udi mupete abi bibangu penyì?”

KwambaYe ne: “Mu nzubu mwa balunda Baanyi.”

Pa dîbà adi nebâmbè ne: “N’Yêyè utwakapoopela pa nkuruse awu.”

³⁶⁷ Nenku Neâmbè mwakamba Yozefu ne: “Kanutacishi meeji to, bwalu Nzambi mmwenze cyôci eci bwa kusungila mwoyi wa baa Bisamba bya bende. Kacivwa cilema cyenu nwênù to.” Pashiishe kwambabo ne nebatapuluke, famiye pa bule ne mukwabo pa bule, nebadile bu badi badila mwânà wa balume umwepele uvwa mufwanyine kwikala muumushiibwe mu dîkù.

³⁶⁸ Éyì Taatù, dituku adi dikaadi pabwîpì, ki dijika dya mbingu makumi mwandamutekete ayi. Mbwena kwamba ne cikondo cikaadi pabwîpì, Mukalenge.

³⁶⁹ Éyì Nzambi, swaku bwa dîyì—dîyì dya baprofeta balelela baa Nzambi dyèlè lubila bwa kubengangana ne inâbânzà wa cyena leelu wa dituku edi ewu, ekeleziya wa cyena leelu ewu, teoloji wa ekeleziya wa cyena leelu ewu.

370 Nyungisha bayiishi badi baciina bwa kwamba Bulelela aba. Éyì Nzambi, angataku bantu aba ubanyungishe mu mushindu utubo kabayiku banji kunyungishiibwa kacya kwônsò eku to, ubafikisheku ku didyumvwa bundu.

371 Kadi tudi bamanye cintu cimwepele eci, ne tudi mwa kushaala ne dyeyemena dyônsò, ne: “Muntu nansha umwe kaakulwa to piikala Taatù kayi mumukoke. Ne bônsò badi Taatù mufile nebalwe.” Nebafike anu too ne mwaba wûdi Wêwê mwelele meeji ne necifike awu. Kadi Wêwê wâkamba ne: “Kuciinyi to, nwênù kasumbu kakese kaa mikooko, ndiswa dya Taatù wenu bwa kunupa Bukalenge.” Tudi bamanye ne Aci ncilelela. Wêwê utu mutudimwije misangu ne misangu ne nekwikale anu bakese, bakese menemene biikala badilongolole paalwa diine dîbà adi. Pashiishe nekwikale dibiika dinene dya ku lufu, nenku bapikula bônsò bavwa bapikudiibwe munda mwa bikondo nebajuuke. Kadi mu dituku dya ndekeelu edi, anu ku cikondo cya nshiikidilu menemene, dîbà adi Ekeleeziya neikale cya bushuwa wa bantu banyààbanyà.

372 Pa nanku tudi tumona aci, Taatù, tudi tumona Mukenji wa dituku. Tudi tumona mudibo baWubenga, tudi tumona matapuluka nkongo ne nsanzu, tudi tumona bintu byônsò ebi.

373 Tudi tusangana ne bantu Beebe badi batonda ne kabeena. . . badi “bintu cyanaana.” Mbaswe anu bwa kuujiibwa ne Wêwê, Mukalenge. Mpindyewu, ndi ndomba bwa Wêwê kunyungishaku naabo buloba, anu matuku makeke menemene kumpala kwa Dilwa dya Mukalenge.

374 Mpindyewu munkaci mwetu mmwemu mudi masaama, mudi bantu badi dijinga ne dyondopa dya mubidi. Katwena baswe kubenga kubateela to, Mukalenge, bwalu mbambe ne: “Kupu mwoyi bilenga Byende byônsò to: bya Ewu Udi ufwa bubi bwebe bwônsò luse; ne Udi wondopa masaama etu ônsò.” Tudi tulomba bwa bukole Bwende bunene bwa dyondopa bwikale pambidi paa muntu ne muntu udi kaaba aka. Piikalabi ne Wêwê udi mwa kusungila musuuka muntu mwamwa kuyi mutentemuke to, anu bwa mwoyi wende mukudimuna mutangija Kûdi cyanaana, kadi ambaaku tũng mûdi Wêwê mwa kupanga kwondopa mubidi!

375 Ki mishwala nyôyi eyi miteekiibwe mwab’ewu. Ndi nyibeneshu mu Dînà dya Mukalenge Yesu, mwakenza Mupostolo munene Pôlò. Swaku bwa ewu yônsò wawwala mishwala eyi ondopiibwe. Swaku bwa mèkù adi mapanduluke apingajiibwe. Swaku bwa bânà bakese, badi kabayi ne taatù, kabayi ne maamù, ne aba badi batapuluke, swaku bwa dîkù adi dyalukile cyakabidi mu bwobumwe. Enzaku nanku, Mukalenge. Ondopaku babeedi bônsò mpindyewu, ne badi mu ntatu, ùdyǎngàcìlè Wêwê mwine butumbi.

376 Nenku, Mukalenge, twêtù badi bateeta kulama mabungu etu miimanyika, mèsù etu matangija kuulu, myoyi yetu mitangija

kuulu kûdî Wêwè, biikale tubenga kwitaba ne tudi mene baswikakane ne baa pa buloba ebu. Bible mmwambe ne “Abraham wakapatuka mu dîkù dyende, wakapatuka mu cimenga cyende, bwa kusòmba bu mwenyi mu buloba bwa mulayi, mwikale utonda ne kavwa ‘wa pa buloba ebu to’ kadi uvwa ‘mwena lwendu ne mwenyi.’” Abraham ne Izaka ne Yakobo, bônso badi ne bujaadiki ebu ne “kabeena baa pa buloba ebu” abu, badi anu bamba ne bupwekele bwônso ne kudi Cimenga Cidi Mwibaki ne Mucyenji mwikale Nzambi, ne njila awu ngudibo benda balonda.

³⁷⁷ Swaku bwa myoyi yishintuludiibwe mpindyewu mene pândi nsambila apa, Taatù, ne swaku bwa mishindu kampana ya lwidi yangaciibwe. Ne paalwa mudimu wa dibatiiza, swaku bwa kwenzeke dibinduluka dinene munkaci mwa bantu, kwikaleku bantu bavwa kabayiku beelele meeji ku bwalu abu kwônso eku to, bwalu abu bubuuludiibwe. Ne Wêwè ngwâkamba ne aba bônso baWakadyanjila kubiikila, Wêwè—Wêwè neubatume.

³⁷⁸ Mpindyewu, ndi ndambula byônso Kûdî, Mukalenge, ne kaadiyiisha kakese kakosoloke aka kafumina mu dibungu dikwate ne bya luse kadiyi cintu munda, Mukalenge. Ndi ndomba bwa Wêwè kwangata anu Méyî awu ne kuèngulwila mu myoyi ya bantu, ne swaku bwa bôbò kabiikadiku ne mushindu wa kushiyangana naaWu to. Enzaku nanku, Mukalenge. Ndi mbilambula Kûdî mpindyewu, mu Dîna dya Yesu Kilisto. Amen.

³⁷⁹ [Mwaneetu wa balume kampana udi ufila mukenji—Muf.] Paudi munkaci mwa kwangata dipangadika dyebe apu, pangadikaaku. “Nudi nutankakana pankaci paa mmwenenu ibidi bwa cinyi?” Wâmanyî kuumvwa cyâmbiYe aci. Piikalabi ne Nzambi n’Nzambi, mukwacile mudimu; piikalabi ne maalu a pa buloba nanzambi, tungunuka anu nanku. Nwamonu anyi? Piikalabi ne njila wa cyena mangumba ki wa cya bushuwa, tungunuka ne kumulonda; kadi piikalabi ne Bible ki wa cya bushuwa, nanku lwâ kudiYe. Nwamonu anyi? Sungulaayi pa dibâ edi ne nganyi unudi baswe kukwacila mudimu.

³⁸⁰ Twânjàayi anu, mu Nyuma, kwimba musambu mpindyewu. Bible mmwambe ne: “Baakimba musambu ne baakatuka.” Twîmbàayi musambu wa kale mumanya bîmpè ewu wa ne, *Ndi MuMunangè*, ne mitu yetu ne myoyi yetu miinyika kumpala Kwende.

Ndi muMunange,

Mpindyewu pangadika bwa ciwikala mwa kwenza.

Ndi muMunange

Bwalu Yèyè wakannanga kumpala

Ne wakampetela lupandu

Pa mucu wa Kalvariyo.

³⁸¹ [Mwaneetu Branham udi ubanga kwimbila mu matama *Ndi MuMunangè*—Muf.] Udiku mwa kwangata dipangadika

dyebe bwa Kilisto anyi? Kî ndipangadika, menemene to, anu kudishiya wèwè mwine munda mutupu ne: “Mukalenge, ncyêna mwîmpè to. Kakwena cintu nansha cimwe mu mêmè cidi cîmpè to. Enzaku bwa mpwe mwoyi byônsò bînkaadiku mumanye abi. Mpindyewu lwâku, Mukalenge Yesu, kulekediku eci cimpicila pamutu to. Enzaku bwa nCyâkîdilè ne nguujibwe ne Nyuma Webe, Mukalenge. Kuumukila ku leelu ewu, mêmè yônsò ngiikale Webe.” Sambilaayi anu cyanaana mpindyewu, kaadisambila kakese cyanaana kudi Nzambi; kapeepele, kaadisambila aka, bânà, bônsò.

Wèwè Mwânà wa Mukooko wa Kalvariyo,
Musungidi wa kudi Nzambi; (nyingalala anu
cyanaana mu mwoyi webe amu)
. . . ngumvwileku pândi nsambila apa,
Umushaku mpekaatu yanyi yônsò,
Éyì anyishaku bwa kuumukila ku leelu ewu
Mêmè yônsò ngiikale Webe!

Pândi ngendela mu nyongolo wa mîdimà wa
njila mibwelakane wa panwapa apa,
Ne padi ntatu yipaasalala yinyungulukila,
Wèwè ikala Mulombodi wanyi;
Tumina mîdimà dîyì bwa yandamuke muunya,
Kupula kanyinganyinga, ne bwôwà,
Kundekediku mpambuka
Nya kule ne luseke Lwebe nansha.

³⁸² [Mwaneetu Branham udi ubanga kwimbila mu matama *Diitabuuja Dyànyì Nditàngija Kùdi*—Muf.] Aba bîtabùùjì abu, nwadishiya munda mutupu kumpala kwa Nzambi, ne nwangaci dipangadika dya ne kakwena cyanupangisha kabidi to, nwènù kanwadyakutondaku dikumbanyina nansha dikese to, ne panwikala nujinga kwangata dipangadika adi ditooke, dishindame kumpala kwa Nzambi, ciinà nyawu cidi ne mâyì mwômò, cilongolola bwa dibatiiza. Bakaji bayiile ku dyabalume dyanyi eku, ne balume ku dyabakaji dyanyi. Mudimu wa dibatiiza newenzeke anu mu katanci kakese aka. Aba badi badishiye munda mutupu, badi badilongolole bwa kubenga kwitabuuja bidi bambi bamba, bidi balombodi baa ekeleeziya bamba, bidi mangumba amba, kadi ne nulonda njila wa Mukalenge, nwitabuuja EMU MMUDI MUKALENGE WAMBA, lwâyi mpindyewu.

Pândi ngendela mu nyongolo wa mîdimà wa
njila mibwelakane wa panwapa apa,

Nekwikale bakaji lwa *eku*, balume lwa *eku*. Ki dibiikila dyenu dya ku cyoshelu ndyôdi adi's ne: “Bûngì bwônsò bwa baakiitabuuja, baakalwa ne baakabatijiibwa.”

... Mulombodi wanyi;
 Tumina mîdimà díyì bwa yandamuke dituku,
 Kupula bisonji bya kanyinganyinga kaanyi,
 Kundekediku mpambuka
 Nya kule ne luseke Lwebe nansha.

383 Mbakaji búngì kaayi muntwemu mu dinda emu... Ndi ngamba bwalu ebu mu Dîna dya Mukalenge Yesu! Mbanganyi baa kunudi badi badyũmvwè bundu bwa nsuki mîpì yinudi naayi ayi, bàdi baswe bwa Nzambi (ku ngàsà Wende) anuleepeshileyi? Nzambi anubeneshe.

384 Mbalume búngì kaayi badi badyũmvwè bundu bwa kulekela mukajeebe unwa mfwanka, ne uvwala mipanu yidi mu bushuwa bwa bwalu miikale yebe wèwè?

385 Ne Bible mmwambe ne: “Ncinyangu ku mèsù kwa Nzambi.” Nudi bamanye ne Nzambi kèna mwa kushintuluka anyi? Yèyè kèna mwa kushintuluka to. Udi ne ngiikadilu umwepele, ncijila. Kèna mwa kushintuluka to. Paudi kuyi ulwa mufwanangane Nende to, kwakuMumonaku to: “Kakuyi cijila to muntu nansha umwe kaakumonaku Mukalenge nansha.” Kadi piikalabi ne kuvwala kwa mipanu kudi...kudi kwendesha Nzambi ku mwoyi mu cifu Mwende ne ùlùka, ku mwoyi kudi kuMwenda, ne *cinyangu*, “bukooya,” mmunyi muwikala wèwè...mwikale ne nyuma wa mushindu awu munda mwebe muwayaku mu Dyulu? Mmunyi muwaya mu Dyulu ne nsuki mîpì, padi Nzambi mwambe ne: “Mbundu bwa mukaji kukosaye nsuki yende?” Mukaji awu’s udi uvila mèyì makulu miine a kwikala mukaji wa—wa nzubu. Nzambi katu ushintuluka to. Aci n’Diyì Dyende, mulunda wanyi, bikengela uteeleje.

386 Ne nwênù peenu balume badi balekela bakaji beenu benza ciine aci abu, kanutu nudyumvwaku bundu anyi? Kanutu nuumvwaku bundu anyi?

387 Kanufwanyanganyi ne Inăbànzà wa Kumpala wa ditunga to. Ikalaayi bafwanangane ne Nzambi! Nwamonu anyi? Dishiyaayi munda mutupu nuumushe mmwenenu wa cyena leelu wa pa buloba ewu, bwa Kilisto wamonaku mwa kuDipongolwela munda mwenu ne nwênù nwamona mwa kuujiibwa bulelela ne Nyuma Mwîmpè.

388 Yèyè kèna mwa kwenza aci to, Yèyè kèna mwa kucyenza to, cidi—cidi cibengangana ne mèyì makulu Ende; mbifwanyine kukengela bwa Yèyè kubengangana ne Dîyì Dyende, kadi aci paaci ncidiYe kayi mwa kwenzaku to; Yèyè kaakucyenza to paucidi—paucidi wèwè kuyi ukumbanangana ne Dîyì Dyende. Bikengela ulwe...Bikengela twètù tulwe ku Cyôcì eci kumpala mene kwa nî ncinyi nî ncinyi cikwabo kwenjiibwaci. Nudi bamanye aci, muntu ne muntu wa kunudi mmumanye aci. Mbanganyi badi biitabuuja aci, elaayi byanza byenu muulu. Cya

bushuwa, nudi nuciitabuuja, mpindyewu twēnzààyaaku cintu kampana pa bwalu abu.

³⁸⁹ Nzambi, ikalaku neetu luse! Mushindu mwine utudi Nende dijinga's we! Ki twètù aba, bônso bwetu pamwe mpindyewu. Nwavulukaayi mpindyewu ne, ku Cilumbulwidi, piikalabi ne mêmè...Nebikengele ngiimane (ne ciine aci cidi mwa kwenzeka kumpala kwa bufuku kwilabu) bwa kukungamangana ne Dìyì dyônso dîndì mwambe. Nwamonu's, nebikengele nkungamangane naaDi. Mpindyewu, vulukaayi ne bubi abu bùmùkù pa byanza byanyi, bùmùkù pa kondo kaanyi kaa mwoyi, bùmùkù pa musuuka wanyi, bùmùkù kudi Nzambi.

³⁹⁰ Pawikala kuyi...Pawikala mwimane mu ngiikadilu ayi cibi kuyi anu udyumvwa mupiishiibwe to (yoyòyò!), ncinyi—ncinyi—ncinyi ciwenzà? Pa dîbà adi's udi mumanye ne Nzambi kacyna uyiikilangana neebe to, udi mumanye ne ukaadi musambuke Aci. Wamonu anyi? Ukaadi musambuke Aci. Udi mufwanyine kwikala mutendeleedi wa mu umwe, udi mufwanyine kwikala mwena maekeleeziya ne bikwabo, kadi ukaadi mumane kusambuka Aci. Dìyì dya Nzambi didi dipweka dibwela dipatula muntu. Aci ki cintu cidi cimwaluja. Nwamonu anyi? Nenku ki Dìyì adi. Ndi nkonka mwambi kana yônso, muntu kana yônso, nî mpenyi nî mpenyi pônso, bwa kuvilaye Aci kwamba ne cidi cibengangana ne Dìyì dya Nzambi. Ncya bushuwa. Kabyena nanku to, nwamonu's.

³⁹¹ Pa nanku twikalaaayi beena Kilisto baa cya bushuwa. Nansha twètù bacidi bateeta, aba bacidi bateeta, bikengela batukose ne batubabaje. Eyowa's, mukalenge, ki cidi citukengela twètù bônso.

³⁹² Nzambi, ikalaku naanyi luse. Nzambi, ngangàtèku umfwimbe. Ki meeji ândi naawu, paanyima paa lumingu elu, mbwà kuya kumpala kwa Nzambi, bwa kujandula cidi cikengela kwenza pashiishe. Nzambi, ngangàtèku. Cidi. . . Cyônso—cyônso cidi cintàngilà (kadi mbyábungì be) ciikale kaciyi cimpè to, Nzambi, ucikose, ki disambila dyanyi mu dinda emu ndyôdi adi. Tengulaku mwoyi wanyi, maci aanyi, buumuntu bwanyi. Mvwijeku, Mukalenge, mvwijeku cintu cidi...cyônso cidiYe muswe bwa mêmè kwikala aci. Ki disambila dyanyi ndyôdi adi.

³⁹³ Cyônso cîndi nkengela ne ciikalè cikosa aci, ùcinkòsè, Mukalenge. Undeejeku mu Dìyì, ungambile, nēnye kacynza. Mukalenge àcyâmbè, ne mêmè nèn-. . .Ndiku mudilongolole bwa mêmè kukumbanangana naaci. Cyônso cidi Dìyì dya Nzambi dyamba aci, ki cîndi mêmè muswe kwikala. Ndi muswe kwikala mwena—mwena Kilisto mu Dìyì dya Nzambi ne: “Dìyì dyônso dya muntu diikale mashimi, kadi dya Nzambi diikale dilelela.” Aci kî ncifwanyine kwikala mmwenenu wa cikondo eci, kî ncifwanyine kwikala aci anyi? Mushindu ngùdì wèwè uciitabuuja anyi?

³⁹⁴ Udi ukeba kaaba kaa kubatijiibwa anyi, mwanaanyi wa balume? Eyo, lwa paanyima apa, mwaneetu, kwindidiku to. Eyo, anu uyiila lwa eku.

³⁹⁵ Bivwa bikengela bwa bààbûngì beenu kulwabo, balume ne bakaji badi beena kwitabuuja, badi biikale...batonda mpekaatu yabo, bwa kubatijiibwabo mu Dîna dya Yesu Kilisto. (Vwila eku, mwaneetu wa balume.) “Mu Dîna dya Yesu Kilisto bwa dilekelediibwa dya mpekaatu yabo, nenku nebuujiibwe tente ne Nyuma Mwîmpè.”

³⁹⁶ Mpindyewu, bwenu nwênù beena Katolike badi kaaba aka, ki dilekelediibwa dya mpekaatu ndyôdì adi. Nutu nwênù nwamba ne ekeleeziya ngutu ne bukookeshi bwa kulekeleelangana mpekaatu, ekeleeziya uvwa ulekeleelangana mpekaatu bishi? Nzambi...Yesu wakambila anu bîmpè ekeleeziya ne: “Ewu yônsò unwalekeleela mpekaatu awu, neyiikale mimulekeleela. Ewu yônsò unwayilaminyina awu, neyiikale mimulaminyina.” Bavwa balekeleelangana bishi ku cibangidilu, mpekaatu mu ekeleeziya wa ku cibangidilu? Bavwa bababiikila ku kanyinganyinga, ne bavwa bababatiiza mu Dîna dya Yesu Kilisto bwa dilekelediibwa dya mpekaatu yabo. Kaciyi mu kazubu kaa komfeesiyo to; to, nansha kakese. Kadi bavwa banyingalala kumpala kwa Nzambi, mu myoyi yabo pavwabo biimane mwaba awu, ne bavwa biitabuuja. “Nenku bûngì bwônsò bwa baakabatij-...baakiibatabuuja abu baakabatijiibwa mu Dîna dya Yesu Kilisto, ne baakuujiibwa ne Nyuma Mwîmpè.” Amen. Nudi baMunange anyi?

Mpindyewu tujuukilaayi kuulu.

³⁹⁷ Mpindyewu, nekwikale bààbûngì baajinga bwa kwindila mudimu wa dibatiiza. Kudi bakwabo kabidi badi baswe kulwa, bakwabo badi biitabuuje anyi? Lwâyì, nseke yônsò ibidi; balume ku dyabakaji; ku dyabalume, bakaji. Itabuujaayi Mukalenge Yesu ne mwoyi wenu wônsò, ne byônsò bidi munda mwenu.

³⁹⁸ Mpindyewu twinyikaayi mitu yetu cyapamwe, patudi twambulula cyapamwe disambila dya cileejilu edi, pâncidì ndyumvwa mu mushindu wa pabwawu musakiibwe bwa kwenza cyôci eci mpindyewu mene apa. Patudi twinyika mitu yetu apa, sambilaayi pamwe naanyi. [Mwaneetu Branham ne disangisha badi basambila cyapamwe—Muf.]

... Taatù wetu Udi mu dyulu, Dîna dyebe dijidiibwe.


Bukalenge bwebe bulwe. Diswa dyebe dyenzeke pa buloba, bu mùdìdì dyenzeka mu dyulu.

Utupe mu dituku edi dyâmpà dyetu dya ku dituku ne ku dituku.

Ne utufwile luse ku matomboka etu, bu mutùtù tufwila luse aba batu batwenzela matomboka peetu.

*Ne kutulombolu mu diteciibwa to, kadi utusungile
ku bubi: Bwalu bukalenge mbwebe wêwê, ne bukole, ne
butumbi, kashidi. Amen.*

³⁹⁹ Mpindyewu tushaalaayi ne mitu yetu miinyika. Nenku nêndombè Mwaneetu Neville bwa kulwaye kwamba dibenesha, kwamba cidi pa mwoyi wende, ne pasiishe kumanyisha bwa mudimu wa dibatiiza udibo balongolola mpindyewu ewu.

⁴⁰⁰ Nzambi anubeneshe, ki disambila dyanyi ndyôdi adi. Nênnûsambidilè, nwânsambidilaayi. Ndi bulelela dijinga ne masambila enu. 

DIKÀNDÀ DIPWÀNGÀNE KU BUTEKÈTÈ BUPWÀNGÀNE LUA61-1119

(Perfect Strength By Perfect Weakness)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyàlumingu mu dinda, mu matùkù 19 a ngondo wa dikumi ne umwe, cidimu cya 1961, mu Branham Tabernacle mu Jeffersonville, Indiana, U.S.A. Ndyumusha pa mukaba wa mēyì ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org